

ARRÜNA URRIA MANITACARRÜ COROBO UITI SAN LUCAS

Maconomonoti Lucas ümoti Teófilo

1 ¹Aboma sürümanama bama maconomonoma arrüna pasabo tücañe uyarrüpecu. ²Arrüma oncoimia nurarrüma bama amoncoma tücañe ichepeti Jesús auqui maübo, bama manunecana caüma nurarrti. ³Arrüñü ito yacatü rranquirio nurria pünanaquimia, nauqui atusi nurria iñemo arrüna pasabo auqui numo aübapae. Sane nauquiche rraconomoca tanu aemo, naqui Teófilo, ⁴nauqui atusi nurria aemo que ñemanauncurratoe arrüna manunecacarrü toncoi.

Urapoiticaü ángel nacarrti icu cürrü Juan Bautista

⁵Tücañe numo yüriaburrti Herodes au manu cürrü Judea, anati taman ñoñünrrü sacerdoterrti, nürirrti Zacarías. Arrti anati auqui manu gruporrü sacerdoterrü nürirri Abías. Nürri nicüpostoti Saberarrü. Tone ito auqui nesarrti familiarrü maniqui antiburrü sacerdoterrü Aarón. ⁶Arrti Zacarías y nicüpostoti bavivicoma isiu nirrancarrti Tuparrü. Icocotama nanaiña arrüba yacüpucurrti Señor. Champü causane nisüboriquirrimia. ⁷Pero arrüma champürrtü aübosioma, itopiqui Saberarrü chüpuerurrüppü aübosi y todaviarrü tüpoma, y sane ito arrti Zacarías tüpomatito.

⁸Taman nanenese tocabo ümo nesarrti gruporrü Zacarías aserebimia au niporrti Tuparrü. ⁹Arrümanuma sacerdoterrü ane yacheatarrüma suerteabo uimía, na atusi ñacuti naqui sürobotü au nicümuinta niporrti Tuparrü aiñonocoti rroriocorrü. Au manu nanenese tocabo ümoti Zacarías. ¹⁰Así que iñonocotati rroriocorrü au niporrti Tuparrü. Macirrtianuca meaboma ümoti Tuparrü türüpo. ¹¹Rrepenatai cuati taman ángel esati auqui napese esauiti Señor. Atüraitü au nepanauncu altar cauta omo manu rroriocorrü. ¹²Arrti Zacarías chütusiopü ümoti causane uiti, numo asaratitü ümoti. Cütobüsoti y birrubuti. ¹³Pero arrti ángel nanti ümoti:

—Tapü airruca Zacarías, itopiqui arrti Tuparrü oncoiti neanca. Naciuposü Saberarrü anati ñana ipiaümacarrü. Aña üriboti Juan. ¹⁴Tarucu napucünuncu icuatati, arrtü anati icu cürü, y sürümanama ito macrirrtianuca pucünuñama icuatati. ¹⁵Arrti chichabotipü vinorü, ni cualquierarrüpü arrüna ocoro. Tiene que atorri üriacaboti uiti Tuparrü, y anatito Espíritu Santo au nausasürri ante que anati icu cürü. ¹⁶Uiti caüma sürümanama bama israelitarrü iñorronconomacü isucarüti Señor naqui Tuparrü. ¹⁷Cusürüboti anati icu na cürü pünanaquiti Cristo. Tarucu nüriacarri y anati Espíritu Santo auti tacanati profetarrü Elías tücañe. Urapoiti arrüna niyequirri Cristo. Icoñocotati nisüboriqui genterü, tapü tüboricoma ümomantoe. Utitito macoconaurrüma bama chipiacapü acoconauma. Sane caüma puerurrüma asuriurumati Cristo.

¹⁸Auqui arrti Zacarías ñanquitioti pünanaquiti ángel:

—Aensapü pasao iñemo arrüna sane. Itopiqui arrüñü tüpomañü, y nisüposü isiatai.

¹⁹Arrti ángel iñumutati, nanti:

—Arrüñü nisüri Gabriel, imostorri Tuparrüñü. Icüpurutiñü nauqui suraboi asucarücü arrüna urriampae manitacarrü. ²⁰Tapü arrücü chaicocotapü. Sane nauquiche auquina caüma chüpuerurrüpü anitacaiqui, cheperrtü anati icu cürü maniqui ahü. Arrüna nisura aemo tiene que acoco ñana.

²¹Arrümanuma macrirrtianuca aboma türüpo barrüperarama ümoi Zacarías. Chütusiopü ümoma causane chücontopü ayeti tato türüpo. ²²Nauquiche iñataiti tato türüpo, chüpuerurrüpü anitatu ümoma. Esucutiatai ümoma. Ui arrüna sane tütusiatai ümoma, ta asaratitü auqui quiatarrü narrtarri au niporrti Tuparrü.

²³Arrti Zacarías cocono uiti manio naneneca yaserebiquirri au niporrti Tuparrü. Auqui süroti tato au niporrti. ²⁴Auqui caüma arrümanu Saberarrü nicüpostoti tanati cütüpü ipiaümacarrü. Ane au niporrtü ümo cinco panca, chüsalibopü. ²⁵Ane mapensara sane: “Nupu Tuparrü isamute saübuñü arrüna urriampae. Ui arrüna sane caüma chauqui chupunuñünquipü crirtianuca, itopiqui tütane nisaü”.

Urapoiticaü ángel nacarri icu cürü Jesús

²⁶Numo tabe seirri panca nacarri ipiaümacarrü icütüpü Saberarrü, arrti Tuparrü bacüpuruti ümoti maniqui ángel Gabriel au manu pueblurrü nürirri Nazaret. Ane au manu cürü Galilea. ²⁷Sürotitü esa manu taman cupiquirri nürirri Mariarrü. Arrüna rranrrü apo aübuti taman ñoñünrrü nürirri José, naqui auqui nesarri familiarrü yüriaburrü David tücañe. ²⁸Iñataiti ángel esa Mariarrü. Manquioti nurria ümo, nanti:

—Arrti Tuparrü anati achepecü y icunusüancanatiyü manrrü mopünanaqui nanaiña paüca icuqui na cürü. ²⁹Nauquiche tasaratü Mariarrü ümoti ángel, cütobüso ui na nurarri ümo. Nantü ümoantoe: “¿Causane anqui iñemo sane?” ³⁰Auqui arrti ángel nanti ümo:

—Tapü airruca María, itopiqui arrti Tuparrü urria ñaquioncorrti aemo y acurusüca uiti. ³¹Auquina caüma anati acütüpü apaümaca. Arrtü

tanati icu cürrü, aíña üriboti Jesús. ³²Artri caüma ane nüriacartri uiti Bae Tuparrü. Tonenti Aütorrti. Yüriaburtri ñana uiti Tuparrü tacanati yüriaburri David tücañe. ³³Ane nüriacartri ümo manuma israelitarri. Champü nitacüru nüriacartri.

³⁴Auqui ñanquítio Mariarrü pünanaquiti ángel:

—¿Causanempü apasa iñemo arrüna sane? Arrüñü chipocaiquipü aübu noñünrrü.

³⁵Aiñumuti ángel:

—Artri Espíritu Santo cuati aucü y arrüna nicusüurtri Tuparrü cuatito aemo. Sane nauquiche artri maniqui apaümaca tonenti Aütorrti Tuparrü. ³⁶Suraboira ito asucarücü, arrüna naporiente Saberarrü tütane seirri panca tanati ipiaümacarrü cütüpü au nipocorrü. Abu namatü tücañe que chüpuerurrüüpü aübosi. ³⁷Pero ümoti Tuparrü champü isane arrüna cuestarrü, nanaiñantai urriante uiti.

³⁸Auqui nantü Mariarrü:

—Arrüñü nicumanacata Señor, tari isamunena isiu nirrancarrü saübuñü, isiu arrüna nura.

Auqui manu süroti tato ángel.

Bapaseara Mariarrü ümo Saberarrü

³⁹Au manio naneneca sürotü Mariarrü apaseane Saberarrü au manu taman pueblurri ane omeana yirituca au manu cürrü Judea. ⁴⁰Besüro uirri au niporrti Zacarías. Manquio nurria ümo Saberarrü. ⁴¹Nauquiche manquio ümo, onquisio Saberarrü pocoroti maniqui ipiaümacarrü cütüpü. Abu artri Espíritu Santo süroti au nausasü Saberarrü. ⁴²Au manu rratorrü manitana fuerte, nantü sane:

—Nupu Tuparrü icunusüancanü pünanaqui nanaiña paüca, y icunusüancata ito napauimaca. ⁴³¿Isanempü niyaca nauqui apasearañü, arrücü nipiücü Señor?

⁴⁴Nauquiche tiñoncoi nanquiqui iñemo, arrüna nipiaümaca pocoro sübobiñü.

⁴⁵Urriampae naca, itopiqui aicocota nura Señor, arrüna nantü tücañe aemo.

⁴⁶Auqui nantü Mariarrü:

Iñanaunta Nupu Tuparrü.

⁴⁷Tarucu nipucünuncu uirri, arrüna uiche ichaesübuca eanaqui nomünantü.

⁴⁸Itopiqui Nupu Tuparrü chütacürusupü ñaquioncorrü iyoñü.

Arrüñü te nicumanacatarri y ichaquisürücatai ümo.

Auqui na caüma tusio ñome nanaiña crirrtianuca, ta isurusüca uirri.

⁴⁹Itopiqui Nupu Tuparrü chiyaupü ñapanauncurrü.

Isamute iñemo arrüna champü tacanache, itopiqui nürirri anaunu.

⁵⁰Pucürusu itacu nanaiña ba opiñanaunta ümo para siempre.

⁵¹Arrüna isamute champü tacanache.

Omiñarrio uirri arrüba vianuhuca aübu nanaiña ñupapensacarrü.

⁵²Iquiaübuta nobüriaca ba nüriabuca.

Bayurara ñome ba pobrerrü.

⁵³ Basapara ñome ba bocürüpüo.

Tapü rricuca icüpurio aübu niyocürüppürri.

⁵⁴ Bayurara ito ñome ba bopohoso au na nación Israel, arrüba paserebio ümo. Chütacürusupü ñaquiöncorrü y pucürusu yutacu.

⁵⁵ Sane nurarrü ñome ba nurrupu tücañe, ümo Abraham aübu nanaiña nesarrü familiarrü.

Rranrrü ayura ñome ümo para siemprerrü.

⁵⁶ Auqui Mariarrü süsio acamanu esa Saberarrü ümo trerrü panca. Auqui süro tato au niporrü.

Anati icu cürü Juan Bautista

⁵⁷ Tiñatai manu tiemporrü anche ane mecu Saberarrü. Anati icu cürü. Ñaümati. ⁵⁸ Tapü arrüabama ipiariente Saberarrü y arrüabama iposapatarrü oncoimia arrüna sane. Pucünüñama nurria ichepe, itopiqui arrti Tuparrü pucürusuti itacu. ⁵⁹ Tütabe ocho naneneca nacarrti maniqui ñaüma icu cürü. Süromatü aübuti nauqui circuncidaboti. Rranrrüma caüma nauqui aüro üriboti Zacarías, inrrataboti yaütoti. ⁶⁰ Pero nipiäütoti chirranrrüpu nauqui sane nürirrti, nantü sane ümoma:
—Süro üribo Juan.

⁶¹ Iñumutama:

—Champüti sane nürirrti eana naesa familiarrü.

⁶² Ñanquitioma pünanaquiti yaütoti aübu señarrü isane rranrrti aüro üriboti. ⁶³ Arrti Zacarías manquioti taman taurama. Torrio ümoti. Aiconomoti icu sane: “Nürirrti Juan”. Namanaiña cütobüsoma uirri. ⁶⁴ Au manu rratorrü puerurrü tato anitati Zacarías. Machampiencanati ümoti Tuparrü. ⁶⁵ Ui arrüna sane namanaiña bama iposapatarrti cütobüsoma. Contoatai tütusio arrüna sane pasabo au nanaiñanatai manu cürü Judea, auna cauta abe yirituca. ⁶⁶ Namanaiña bama oncoimia arrüna sane mapensarama uirri. Ñanquitioma pünanaquimiantoe, namatü:
—¿Isanempü rranrrü aisamunutyü naqui ñaüma?
Arrti Señor macunusüancanati nurria ümoti.

Nipucünuncurrti Zacarías

⁶⁷ Auqui cuati Espíritu Santo au nausasürrti Zacarías. Manitanati uiti caüma, nantü sane:

⁶⁸ Uiñanaunati Señor, naqui Tuparrü ümo bama auqui Israel.

Cuati oemo nauqui utaesübu uiti eanaqui nomünantü.

⁶⁹ Chauqui tübacüpuruti ümoti naqui ane nüriacarrti, nauqui utaesübu eanaqui nomünantü.

Cuati eanaqui nesarrti familiarrü yüriaburrü David, naqui baserebioti ümoti Tuparrü tücañe.

⁷⁰ Sanen te nanti Tuparrü tücañe uturuqui bama profetarrü. Arrüma samamecanama uiti, nauqui anitama au nürirrti.

- 71 Urapoimia que rranrrti aitaesümunuti oñü ñünana bama tüboricatai oemo.
 72 Pucürusuti itacu bama antiburrü.
 Aquionotiyü iyo manu tratorrü masamunuti aübuma.
 73 Tone arrüna nurarrti Tuparrü ümoti Abraham tücañe, nauquiche
 itusiancatati isucarüti curusürrü.
 74 Nanti, rranrrti aitaesümunuti oñü ñünana bama tüboricatai oemo y
 ñünana nuirruca ñünanama, nauqui baserebi ümoti.
 75 Rranrrti urria nosüboriqui y samamecana oñü ümoti nauqui urria
 numapanauncu enterurrü nosüboriqui.
 76 Arrücü isaü profetarrüci ñana uiti yarusürürrü Tuparrü.
 Acusürüca uraboi arrüna niyequirrti Señor, nauqui aicoñoco ma
 nisüboriquirrimia bama macrirrtianuca.
 77 Urapoi isucarüma ta chauqui tüpuerurrü aurrimiacana tato
 nomünantü uimia, y sane urria nacarrüma.
 78 Sane ito nirrانتümoti Tuparrü.
 Ucuasürüca ümoti.
 Pucürusuti utacu.
 Arrüna niyequirrti Señor tacanarrtü cuatü nanenese, y arrüna
 tomiqüianene sürotü ñünana.
 79 Usaca tacana au tomiqüianene, itopiqui oconca ñana.
 Pero uiti Señor caüma cuatü nanentacarrü oemo, itopiqui bacheboti
 osüboriquibo.
 80 Arrti maniqui ñaüma sunaunti. Bacheboti Tuparrü manrrü
 ñapanauncubuti. Sürotitito aviviti eana rroense pururrü canca y cüosorrü.
 Nacarrrti taha cheperrrtü sürotitü anunecati ümo bama macrirrtianuca
 auqui cürrü Israel.

Anati icu cürrü Jesús

2 ¹Au manio naneneca tücañe arrti yarusürürrü yüriaburrü César Augusto
 rranrrti atusi ümoti, mantucubo bama macrirrtianuca aboma iquiana
 nüriacarrrti. Sane nauquiche bacüpuruti nauqui ane censo. ²Arrümanu primer
 censo ane numo yüriaburrü Cirenio au manu cürrü Siria. ³Namanaiña süroma
 tato au nesarrümantoe pueblurrü, nauqui acoroma. ⁴Arrti José anancati au manu
 pueblurrü nürirri Nazaret, ane au manu cürrü nürirri Galilea. Sürotitü auqui manu
 au manu cürrü Judea, au manu pueblurrü nürirri Belén, auna cauta anati icu cürrü
 David tücañe. Itopiqui arrti José anati auqui nesarrrti familiarrü David. ⁵Süroti
 tato au Belén nauqui acoroti ichepe Mariarrü. Arrti rranrrti apo aübu. Mariarrü
 chauqui tanati ipiaümacarrü cütüpi. ⁶Nauquiche taboma au manu pueblurrü
 Belén, iñatai manu nanenese anche ane mecu Mariarrü. ⁷Acamanu anati icu cürrü
 naqui primer ipiaümacarrü. Cüburriuti uirri. Iñanati au taman babetama, arrüna
 auquiche auba numuquianca, itopiqui champü porrü tabüco uimia au pueblurrü
 cauta arücüma. Barücüroma au manu cüpahurrü, niyocora numuquianca.



(Lc. 2.7)

**Urapoimia bama angelerrü nacarrti
Cristo icu cürrü**

⁸Au manu tobirri aboma mañoñünca au manu rroense saimia Belén. Bacuirarama yutacu niyaburrüma nobirraca. ⁹Rrepenteatai ññataiti taman ángel esaquiti Tuparrü. Cuara nurria itupecuma ui nanantacarrti Tuparrü. Au manu rratorrü tarucapae nirrucurrüma manuma mañoñünca. ¹⁰Pero arrti ángel nanti ümoma:

—Tapü aupirruca, itopiqui isecatü suraboi ausucarü arrüna urriampae manitacarrü, arrüna uiche apucünuma macirrtianuca icu na cürrü: ¹¹One anati icu cürrü au nesarri pueblurrü David naqui uiche autaesübuca eanaqui nomünantü. Tonenti Cristo, naqui Señor.

¹²Suraboira ausucarü arrüna señarrü aume, nauqui atabüti aboi maniqui ñaüma. Anati cüburriuti, y anati barücüboti au taman babetama.

¹³Au manu rratorrü iñataimia maquiataca angelerrü sürümanama acamanu esati. Macantarama ümoti Tuparrü sane:

¹⁴—Gloria ümoti Tuparrü naqui anati au napese. Au na icu na cürrü, tari urria nacarrüma bama macrirrtianuca bama urria au narrtarri Tuparrü.

¹⁵Auqui arrümanuma angelerrü süroma tato au napese. Tapü arrümanuma mañöñunca namatü ümomantoe:

—Curi te au Belén, nauqui basarai arrüna pasabo, arrüna urapoiti Señor usucarü.

¹⁶Auqui süromatü au Belén, apuraurrü namenrüma. Iñataimia taha. Asaramati José y Mariarrü. Y arrti maniqui ñaüma anati barücüboti au babetama.

¹⁷Nauquiche tasaramati, urapoimia arrüna pasabo ümoma y arrüna nurarri ángel ümoma icütüpüti maniqui ñaüma. ¹⁸Namanaiña cütobüsoma ui nurarrüma

¹⁹Pero Mariarrü iñahübuta au nitisirri nanaiña ba manitacaca. ²⁰Arrümanuma bacuirara yutacu nobirracaca basücübücoma tato. Machampiencanama ümoti Tuparrü. Iñanaunumati, itopiqui arrtaimia nanaiña isiu nurarri ángel ümoma.

Iquianamati Jesús au niporrti Tuparrü

²¹Numo tütabe ocho naneneca nacarri icu cürrü maniqui ñaüma, circuncidaboti. Iñatama üriboti Jesús, isiu yacüpuurrti ángel ümo Mariarrü, nauquiche chütochiquioquipü.

²²Numo tücumplibó manio cuarenta naneneca nauquiche turrian tato nurria ümo Mariarrü, tacana yacüpucu nüriacarrü, auqui iquianamati maniqui ñaüma au manu pueblurrü Jerusalén, nauqui aitorrimianamati ümoti Señor.

²³Isamutema sane, itopiqui sane nantü manu nüriacarrü: “Artrü ñaümati naqui primer usaübosi, tiene que uitorrimianati ümoti Señor. Samamecanati caüma ümoti”. ²⁴Süromatü au niporrti Tuparrü, nauqui acumanama ümoti isiu na yacüpuurrti ane corobo sane: “Torrü nututaquimianca o torrü nutaecusimianca”.

²⁵Au manu tiemporrü anati taman ñöñürrü bavivicoti au Jersalén, nürirrti Simeón. Anati Espiritu Santo au nausasürrti. Bien buenurrti y manaunuti ümoti Tuparrü. Tücoboi yarrüperacarri ümoti naqui uiche ataesübu genterrü israelitarri. ²⁶Artri Espiritu Santo turapoiticaü tücañe isucarüti, ta chücoiñotipü mientras chasaratitipü Cristo, naqui cuabotü esaquiti Tuparrü.

²⁷Au manu nanenese artri manqui ñöñürrü sürotitü au niporrti Tuparrü uiti Espiritu Santo. Artri José y Mariarrü iñataimia ito acamanu aübuti Jesús, nauqui aisamunema isiu nüriacarrü. ²⁸Auqui artri Simeón süroti esama, aiquiantiti maniqui ñaüma. Iñanaunutiti Tuparrü, nanti sane:

²⁹Iyaü, arrüñü amoso puerurrü ison caüma, itopiqui chauqui tücocono arrümanu nura iñemo,

³⁰itopiqui chauqui tiyasacati naqui uiche suichaesübu eanaqui nomünantü,

³¹naqui cuati ümo namanaiña macrirrtianuca icu na cürrü.

³² Tonenti naqui ane nūriacarriti, nauqui anunecatito ūmo manu genterrū chūtūpū israelitarrū.

Y arrūbama israelitarrū cuasūrūma caūma auqui naca icu na cūrrū.

³³ Arrti José y Mariarrū cūtobūsoma ui na nurarriti Simeón ūmoti maniqui ñaūma. ³⁴ Auqui arrti Simeón macunusūancanati ūmoma, auqui nantito ūmo Mariarrū nipiācūtoti Jesús:

—Sūrūmanama bama israelitarrū chiyasuriurumatipū ñana naqui ñaūma y sūrūmanama ito bama yasuriurumati. ³⁵ Nanaiña arrūna ñapensacarrūma au nausasūrūma tiene que atusi ñana. Tapū aemo Maria, orronene nurria aemo au nausasū tacana arrone oquio ui cūsese.

³⁶ Acamanu ananca ito taman paīrrū profetarriti, nurirri Nanarrū, nitaquiumucuturriti Fanuel, auqui nesarriti familiarrū Aser. Chauqui tūpoma nurria. Poso tūcañe numo cupiquirriqui nurria, pero numo tūtabe siete añorriti yaviviquirri aūbuti iquiana, coiñoti pūnanaqui. ³⁷ Tūtabe ochenta y cuatro añoca nacarrū sane viurarriti. Ane au niporriti Tuparrū naneneca y tobiquia, yaserebiquirri ūmoti Señor aūbu neancarrū, y ane nauche chūbasopū ui ñaquioncorrū iyoti (ayunabo). ³⁸ Au manu rratorriti sūrotū esama. Machampiencana ūmoti Tuparrū. Manitana cūtūpūti ñaūma ūmo bama barrūperara cūmenuti Cristo, naqui uiche ataesūbama eanaqui nomūnantū bama auqui Jerusalén.

Basūcūbūcoma tato au Nazaret

³⁹ Arrti José ichepe Mariarrū numo tisamutema nanaiña isiu yacūpucu nūriacarriti, basūcūbūcoma tato au manu cūrrū Galilea, au manu nesarrūma pueblurrū Nazaret. ⁴⁰ Arrti maniqui ñaūma sunaunti acamanu. Arrti Bae Tuparrū bacheboti ñapanauncubuti y icunusūancanatiti.

Anati Jesús au niporriti Tuparrū

⁴¹ Arrti José y Mariarrū añoca sūromatū au Jerusalén ūmo pierrta parrcu. ⁴² Numo tūtabe doce añorriti ūmoti Jesús, sūroma tatito au Jerusalén ūmo pierrta aūbuti Jesús, tacana arrūna yacheatarrūma. ⁴³ Nauquiche tūpasao manu pierrta, arrti José y Mariarrū sūroma tato au niporrūma. Tapū arrti Jesús sūsioti au Jerusalén. Pero chūtusiopū ūmoma, arrtū onconoti, ⁴⁴ ñaquioncorrūma cuati eana manu cūtūpūrrū genterrū. Nauquiche tūtane taman nanenese namenrrūma, yapacheriurumati eana manuma ipiarientetorrūma isiu cutubiurriti. ⁴⁵ Champūrrtū tabūcoti uimia. Auquimanu basūcūbūcoma tato au Jerusalén nauqui apacheriurumati. ⁴⁶ Pūrūcū trerrū naneneca tabūcoti uimia. Anancati au niporriti Tuparrū. Tūmonsoti eana manuma manunecanama nūriacarriti. Onsapecoti nurarrūma, y ñanquitioti pūnanaquimia. ⁴⁷ Namanañiña bama oncoimia nurarriti cūtobūsoma ui ñapanauncurriti y ui na tusio ūmoti, arrtū ane arrūna ñanquitioma pūnanaquiti. ⁴⁸ Arrti José ichepe Mariarrū asaramatū ūmoti. Cūtobūsoma. Nantū nipiācūtoti ūmoti:

—¿Causane aisamune suiñemo arrüna sane? ¡Naüma y arrüñü au nanaiñantai subacatü supapacheriurü, y tarucu penarrü soboi acü!

⁴⁹Auqui arrti Jesús nanti ümoma:

—¿Causane abasiquia apapacheriuruñü? ¿Taqi chütusiopü aume, arrüñü tiene que yaca au na niporrti Iyau?

⁵⁰Pero arrüma chentienterrüpüma ümo arrüna sane nurarrti. ⁵¹Auquimanu süroti tato isiuma au Nazaret. Macoconaunrti ümoma. Tapü nipiactüti iñahübuta nanaiña arrüna sane au nitusirri. ⁵²Artri Jesús sunaunti y manrrü ñapanauncurrti y artri Tuparrü pucünuñati icuatati y genterrü isiatai.

Manunecanati Juan Bautista au rroense

3 ¹Au manu tiemporrü tücañe tütabe quince añorrü üriabucati yarusürürü yüriaburrü Tiberio. Artri Poncio Pilato yüriaburrü au manu cürü Judea. Tapüti Herodes yüriaburrü au Galilea. Artri yaruquitortü, nürirrti Felipe yüriaburrü au Iturea y au Traconite. Y artri Lisania yüriaburrü au Abilinia. ²Artri Anás y artri Caifás tonema bama mayarusürüca sacerdoterrü. Au manu tiemporrü artri Tuparrü manitanati ümoti Juan, aütortü Zacarías. Bacüpuruti ümoti. Artri Juan anancati au rroense auna cauta abe pururrü canca y cüosorrü. ³Así que sürotitü au nanaiña cüca abeu manu sapoco Jordán. Uraboiti isucarü genterrü nurarrti Tuparrü; nanti sane:

—Apiñorroncosaño, nauqui puerurrü abüri sobi. Sane caüma artri Bae Tuparrü irrimiacatati tato nomünantü aboi.

⁴Arrüna sane pasabo nauqui acoco arrümanu corobo tücañe uiti profetarrü Isaías. Sane corobo uiti:

Rabotü manitacarrü eana rroense, nantü sane:

“Apicoñoco nicutubiurrti Señor.

Apiyaübu besüro nurria.

⁵Nanaiña arrüba opotüsa, tari umatamacana, y nanaiña yirituca bupauru, nauqui querabo cüsumaña.

Arrüna cauta cüono, tari pesünacana.

Arrüna cauta chichepepü, tari chepecana nurria nanaiña.

⁶Sane nauqui namanaiña macirrtianuca icu na cürü asaramatü ümoti naqui uiche utaesübu eanaqui nomünantü”.

Sane corobo uiti Isaías tücañe.

⁷Nauquiche süromatü macirrtianuca esati Juan nauqui ürimia uiti, nanti ümoma:

—¡Arraño niñupariente noirrobo! ¿Quitipü urapoi ausucarü nauqui puerurrü aupesübu ñünana carrticurrü arrüna cuabotü? ⁸Artrü aurrianca aupesübu, apisamuse arrüna urria, na atusi ta apiñorroncocaño ñemanauncurratoe. Tapü abasiquia apapensa que arraño ui na abecatü eanaqui nesarrti familiarrü Abraham champü nümoche apiñorroncocaño. Itopiqui artri Tuparrü puerurrü aisamunenti ipiarienteboti Abraham

oboi arrüba canca. ⁹Arraño ichepecacaño tacana sueca. Chauqui totoro nurria hacharrü nauqui atüsiü ba sueca. Arrüba chomirriampü nobütarrü botüsiüro. Amontonabohio nauqui abü. ¹⁰Ñanquitioma pünanaquiti Juan:

—¿Causanemo caüma soboi?

¹¹Aiñumuti Juan:

—Arrti naqui ane torrü niquiamisarrti, tari itorrimiatati taman ümoti naqui champü uiti. Y arrti naqui ane utuburiboti, tari ñacumanati ümoti naqui champü isane ümoti.

¹²Cuamatito esati Juan bama mayacobraca impuestorrü, nauqui ürimia. Ñanquitioma pünanaquiti:

—¿Maestro, causanempü caüma soboi?

¹³Aiñumuti Juan:

—Tapü apacobracapae chama. Apacobüra isiu yacüpucu nüriacarrü.

¹⁴Aboma ito masortaboca acamanu. Arrüma ñanquitioma ito pünanaquiti, namatü:

—¿Carü arrüsomü, causane soboi?

Aiñumuti Juan:

—Tapü apacaübucaiqui pünanaqui genterrü arrüna naurriantümo. Tapü apitomocati naqui champü causane uiti. Tari conformabo año aübu napacanasä.

¹⁵Arrüna genterrü ane barrüperara cümenuti Cristo. Sane nauquiche namatü ümomantoe:

—¿Taqi arrti Juan tonenti Cristo?

¹⁶Tapü arrti Juan nanti ümo namanaiña:

—Arrüñü rraunimiaca ui turrtai. Pero anati naqui cuatiqui isiuñü. Arrti maunimianati aume uiti Espóritu Santo y ui pese, arrtü cuati Espóritu Santo au nabausasiü. Arrti ane manrrü nüriacarrti ropünanaquiñü. Arrüñü champü isane niyaca, ni puerurrüpi isoquisünapü nehe nisapaturrti. ¹⁷Arrti chauqui tacomoraboti, nauqui asucüti nesarrti trigo. Arrümanu trigo ññatati peese pünanaqui niyarriirri. Arrümanu niyarriirri amontonabo uiti y tiene que acheti pese ümo. Arrümanu pese champü nitacüru noncorrü. Tapü trigo ahüburu uiti.

¹⁸Sane ñacuansomocorrti Juan ümo genterrü. Urapoitito isucarüma arrüna urriampae manitacarrü. ¹⁹Icuansomoconotito yüriaburrü Herodes, itopiqui anati isiu nicüpostoti yaruquitortü, nürirrti Felipe, y itopiquito arrüba piquiataca nomünantü isamutenti. ²⁰Pero arrti Herodes champürrtü icocotati nurarrti Juan. Más bien masamunuti manrrü nomünantü: ññanatiti Juan au preso.

Nüriquirrti Jesús

²¹Nauquiche anancatiqui Juan maunimianati ümo genterrü, arrti Jesús üriotito uiti. Numo meaboti Jesús ümoti Tuparrü, aurübo napese. ²²Auqui arrti Espóritu Santo cuati auqui napese onüti Jesús tacana naca nututaquimia. Auquimanu rabotü taman manitacarrü auqui napese, nantü sane:

—Arrücü isaücü. Tarucu nacua ññemo. Ipucünuncatai acuatacä.

Arrübama primero pünanaquiti Jesucristo

²³Numo tütabe treinta añorrü ümoti Jesús, auqui comenzaboti anunecati. Arrübama macrirrtianuca ñaqui oncorrüma aütorrti José, (abu uiti Espíritu Santo). Artti José aütorrti Elí. ²⁴Artti Elí aütorrti Matat, artti Matat aütorrti Leví, artti Leví aütorrti Melqui, artti Melqui aütorrti Jana, artti Jana aütorrti José, ²⁵artti José aütorrti Matatías, artti Matatías aütorrti Amós, artti Amós aütorrti Nahum, artti Nahum aütorrti Esli, artti Esli aütorrti Nagai, artti Nagai aütorrti Maat, ²⁶artti Maat aütorrti Matatías, artti Matatías aütorrti Semei, artti Semei aütorrti José, artti José aütorrti Judá, ²⁷artti Judá aütorrti Joana, artti Joana aütorrti Resa, artti Resa aütorrti Zorobabel, artti Zorobabel aütorrti Salatiel, artti Salatiel aütorrti Neri, ²⁸artti Neri aütorrti Melqui, artti Melqui aütorrti Adi, artti Adi aütorrti Cosam, artti Cosam aütorrti Elmodam, artti Elmodam aütorrti Er, ²⁹artti Er aütorrti Josué, artti Josué aütorrti Eliezer, artti Eliezer aütorrti Jorim, artti Jorim aütorrti Matat, ³⁰artti Matat aütorrti Leví, artti Leví aütorrti Simeón, artti Simeón aütorrti Judá, artti Judá aütorrti José, artti José aütorrti Jonán, artti Jonán aütorrti Eliaquim, ³¹artti Eliaquim aütorrti Malea, artti Malea aütorrti Mainán, artti Mainán aütorrti Matata, artti Matata aütorrti Natán, ³²artti Natán aütorrti David, artti David aütorrti Isaí, artti Isaí aütorrti Obed, artti Obed aütorrti Booz, artti Booz aütorrti Salmón, artti Salmón aütorrti Naasón, ³³artti Naasón aütorrti Aminadab, artti Aminadab aütorrti Aram, artti Aram aütorrti Esrom, artti Esrom aütorrti Fares, artti Fares aütorrti Judá, ³⁴artti Judá aütorrti Jacobo, artti Jacobo aütorrti Isaac, artti Isaac aütorrti Abraham, artti Abraham aütorrti Taré, artti Taré aütorrti Nacor, ³⁵artti Nacor aütorrti Serug, artti Serug aütorrti Ragau, artti Ragau aütorrti Peleg, artti Peleg aütorrti Heber, artti Heber aütorrti Sala, ³⁶artti Sala aütorrti Cainán, artti Cainán aütorrti Arfaxad, artti Arfaxad aütorrti Sem, artti Sem aütorrti Noé, artti Noé aütorrti Lamec, ³⁷artti Lamec aütorrti Matusalén, artti Matusalén aütorrti Enoc, artti Enoc aütorrti Jared, artti Jared aütorrti Mahalaleel, artti Mahalaleel aütorrti Cainán, ³⁸artti Cainán aütorrti Enós, artti Enós aütorrti Set, artti Set aütorrti Adán, artti Adán urriancati uiti Tuparrü.

Macocotorrü ümoti Jesús

4 ¹Así que tanati Espíritu Santo au nausasürri Jesús. Süroti tato auqui manu sapoco Jordán. Uiti Espíritu Santo caüma sürotitü au manu rroense cauta abe pururrü canca y cüosorrü. ²Cuarenta naneneca nacarrti taha. Acamanu artti choborese iñatati macocotorrü ümoti. Artti Jesús chübasotipü enterurrü manio naneneca nacarrti acamanu. Sane nauquiche cürüpioti. ³Auqui artti choborese nanti ümoti:

—Arrtü arrücü ñemanauncurratoe Aütorrti Tuparrü, aisamusio pan arrüba canca.

⁴Aiñumuti Jesús:

—Nantü icu Nicororrü sane: No solamenterrü ui pan osüboriquia. Arrtü uicocota nurarrti Tuparrü, uirri ito osüboriquia.

⁵Auqui arrti choborese iquianatiti Jesús onü taman yiriturrü petaisürü. Au manu rratorrü itusiancatati isucarüti nanaiña cüca y nacioneca abe icu na cürrü aübu nanaiña niñocoñoporrü. ⁶Nanti ümoti:

—Itorrimiaata aemo nanaiña arrüna ane icu na cürrü, arrtü achesoiquia yesañü y anaunca iñemo. ⁷Itopiqui nanaiña arrüba arrtai tonehio niyesa, y puerurrü itorrimianio ümoti naqui irranca itorrimia.

⁸Auqui nanti Jesús ümoti:

—Icu Nicororrü nantü sane: “Anaun y asarebi ümotiatai Tuparrü.

⁹Auqui arrti choborese iquianatiti Jesús au manu pueblurrü Jerusalén onü manu yapetairratoe niporrü Tuparrü. Nanti ümoti:

—Arrtü ñemanauncurratoe Aütorrtiapae Bae Tuparrü, aiñemecasü auqui na ape acü. ¹⁰Itopiqui sane nantü icu Nicororrü:

Arrti Bae Tuparrü bacüpuruti ümo bama nesarrti angelerrü, nauqui acuirama atacucü, nauqui masamuña aiñanai acü uimia,

¹¹tapü obürío ümo napope oboi canca.

¹²Auqui iñumutati Jesús, nanti:

—Pero nantito icu Nicororrü sane: “Tapü aiñata macocotorrü ümoti Tuparrü, naqui Señor”.

¹³Auqui sürotitü baeta choborese esaquiti Jesús, itopiqui champü manrrü niquiubuti, naqui aiñanti macocotorrü ümoti.

Comenzabo yatrabacacarrti Jesús au Galilea

¹⁴Auqui arrti Jesús süroti tato au manu cürrü Galilea aübu tarucu nüriacarrti uiti Espíritu Santo. Ipiatema nürirrti au nanaiña Galilea.

¹⁵Sürotitü au nanaiñantai anunecati. Manunecanati au poca sinagoga auna cauta nantarrü meaboma. Namanaiña ane ñanauncurrüma ümoti.

Nacarrti Jesús au Nazaret

¹⁶Auqui iñataiti tato au manu pueblurrü Nazaret, auna cauta sunaunti tücañe. Sürotitü au porrü sinagoga au nanenese nesa macansacarrü, tacana arrüna yacheatarrti. Acamanu atürait nauqui leheboti icuqui Nicororrü. ¹⁷Itorrimiatama ümoti arrüna corobo uiti profetarrü Isaías. Iyaübutati. Tabüco uiti arrüna nantü sane:

¹⁸Arrti Espíritu Santo anati au niyausasü uiti Señor.

Itacümanauncunutiñü nauqui suraboi arrüna urriampae manitacarrü ümo bama poberrü.

Ícüpurutitü ito ümo bama taquisürü, sane nauqui urriancama tato sobi. Suraboito ümo bama preso, nauqui puerurrü ataesübuma.

Arrübama supuso sobi caüma asarama tato.

Urria caüma sobi nacarrüma bama taquisürü.

¹⁹ Surapoito que arrti Señor macunusiñancanati oemo arrüba naneneca. Tone arrüna leheboti Jesús isucarüma.

²⁰ Auqui iñamatati tato manu liburrü, itorrimiatati tato ümoti maniqui ayuranterrü au manu sinagoga. Atümoti. Tapü arrübama aboma acamanu arrtayomatü ümoti. ²¹ Auqui caüma manitanati ümoma, nanti sane:

—Arrüna nanenese chauqui tücocono ausucarü arrüna Nicororrü aübo leheboñü.

²² Namanaiña macirrtianuca acamanu urria ñanitacarrüma ümoti Jesús. Cütobüsoma ui na coñorrtai ñanitacarrti. Auqui caüma mapensarama y namatü ümomantoe:

—Canapaemo aütorrti José naqui.

²³ Nanti Jesús ümoma:

—Arraño amucanaño caüma iñemo arrüna sane manitacarrü: “Arrti merecurrü, tari yacurarati ümotiatoe”. Amucanaño ito iñemo sane: “Arrücü te auquina suyarrüpecuqui; asamu ito arrüba milagorrü auna propiorrü nacü, tacana arrüna somoncoi que asamuca au Capernaum”. ²⁴ Suraboira ausucarü ñemanauncurratoe, arrübama macirrtianuca au taman pueblurrü chüpuerrüüpü asuriurumati nurria naqui profetarrü auquina propiorrü nicürrti. ²⁵ Tusio nurria aume, au manu nitiemporrti profetarrü Elías tücañe abe sürümana biuraca au na cürrü Israel, nauquiche chürrobeocapü ñome manio trerrü añoca y merio. Sane nauquiche tarucapae carerrtiya au nanaiña cürrü Israel. ²⁶ Pero arrti Tuparrü champürrtü icüpurutiti Elías nauqui ayurati ñome manio biuraca abe au na cürrü Israel, ta icüpurutiti na ayurati ümo manu taman viurarrü au Sarepta au manu quiatarrü cürrü, taha saimia manu pueblurrü nürirri Sidón. ²⁷ Aboma ito au na cürrü Israel sürümanama bama maunrocono, poreatai ñañeturrüma ui manu norrocorrü nürirri lepra, numo süboricotiqui profetarrü Eliseo. Pero champürrtü bacurarati Eliseo ümoma, pero si bacurarati ümoti maniqui ñoñünrrü nürirrti Naamán auqui manu quiatarrü cürrü nürirri Siria.

²⁸ Ui arrüna sane nurarrti Jesús tüboricoma ümoti bama aboma au manu porrü sinagoga. ²⁹ Atüraimía, ipenenomati Jesús türüpo. Arrümanu nesarrüma pueblurrü ane onü taman yiriturrü aübu taman nisacürrü. Acamanu iquianamati, nauqui aipenenomati auqui manu nisacürrü petaisürü. ³⁰ Pero arrti Jesús pebücoti tato, pasaotiatái eanaquimia. Champü causane uimia ümoti. Sürotitü auqui manu.

Tamanti ñoñünrrü anati choborese auti

³¹ Sürotitü au manu pueblurrü nürirri Capernaum au manu cürrü Galilea. Acamanu manunecanati ümo genterrü au nanenese nesa macansacarrü au porrü sinagoga. ³² Cütobüsoma ui ñanunecacarrti, itopiqui manitanati aübu nüriacarrti uiti Tuparrü.

³³ Au manu sinagoga anancati taman ñoñünrrü naqui anati choborese auti. Tosibicoti nurria, nanti:

³⁴ —¿Causane asiquia suisuata, arrücü Jesús auqui Nazaret? ¿Ayecatü nauqui aítabairo somü? Isuputacü; tusio iñemo ta arrücü Aütorrti Tuparrü.

³⁵Auqui arrti Jesús icuansomoconotiti maniqui choborese, nanti ümoti:
—iEtaiquei, acosi auquiti naqui ñoñünrrü!

Auqui arrti maniqui ñoñünrrü taübücoti acü acamanu isucarüma uiti choborese. Auqui sürotitü auquiti. Champü causane uiti ümoti maniqui ñoñünrrü. ³⁶Namanaiña cütobüsoma, namatü ümomantoe:

—¿Causanempü arrüna sane manitacarrü? Arrti naqui ñoñünrrü Jesús ane nüriacarri y nicusüurrti. Bacüpuruti ümo bama machoboreca, y arrüma icocotama nurarrti.

³⁷Unrratorrtai ipiatema nürirrti Jesús au nanaiñantai manu cürri.

Bacurarati Jesús ümo nipiaccürrtoti Simón Pedro

³⁸Auqui arrti Jesús sürotitü auqui manu sinagoga au niporrti Simón. Aiñanainti taha. Nipiaccürrtoti Simón ananca maunrocono, fuerte nurria nipiaccütaiquirri. Manquioma pünanaquiti Jesús, nauqui ayurati ümo.

³⁹Aürotitü esa. Manitanati ümo manu norrocorrü, nauqui aürotü pünanaqui. Au manu rratorrü urrian tato ümo. Atürayo, y mapemana ümoma.

Bacurarati Jesús ümo sürümanama maunrocono

⁴⁰Tüsü cütu surrü. Arrübama macirrtianuca macanama esati Jesús bama maunrocono, aruqui nanaiña norrocorrü ümoma. Arrti iñatati neherrti itama, y sane urriancama tato. ⁴¹Eana manuma maunrocono aboma bama anati choborese auma. Süromatü machoboreca auquimia ui yacüpurrti Jesús. Tosibicoma y namatü:

—iArrücü Aütorrti Tuparrü! Pero arrti Jesús macuansomoconoti ümoma, sane nauquiche chüpuerrüüpüma anitama uiti, itopiqui tusio ümoma que arrti te tonenti Cristo.

Urapoiti Jesús nurarrti Tuparrü au Galilea

⁴²Quiatarrü nanenese nauquiche túsai anene, arrti Jesús sürotitü auqui pueblurrü. Sürotitü au na cauta champü genterrü. Pero arrübama pohoso auqui pueblurrü yapacheriurumati. Iñataimia isiuti. Rranrrüma nauqui asioti esama, tapü sürotitü auquimanu. ⁴³Tapü arrti Jesús nanti ümoma:

—Tiene que suraboi arrüna nüriacarri Tuparrü au piquiataca puebluca, ta ümo icüpurutiñü.

⁴⁴Sane namenrri Jesús au manu cürri Galilea, ñanunecacarri au ba poca sinagoga.

Champü tarrtaimia sane bacaübucurrü nopiocorrü

5 ¹Taman nanenese anancati Jesús abeu manu narubaitu turri, nürirri Genesaret. Iñatai sürümana genterrü esati, hasta que simianati uimia ui nirrancarrüma oncoimia nurarrti Tuparrü. ²Auqui arrti Jesús asaratitü abeu



(Lc. 4.40)

manu narubaitu turri amonquio torri barca. Arrümanuma esache batrabacara nauqui acaübuma nopiocorri. Tone niyachücoimia. Chauqui tüsüromatü ubauqui barca, nauqui aiyarrübia nimomerrüma. ³Auqui arri Jesús süroti au manu taman barco, nesarri Simón. Ñanquitoti pünanaquiti nauqui aikuichoniancati pario manu barco pünanaqui nabeurri. Auqui tümonsoti Jesús au barco, y auquimanu isuqui turri manunecanati ümo bama sürümana genterrü, aboma abeu. ⁴Nauquiche tüchauqui ñanunecacarri, nanti ümoti Simón:

—Curi taha cümüinta na turri, auna cauta otüüsa, nauqui apacaübu nopiocorri, arrücü aübu bama acumpaño.

⁵Aiñumuti Simón:

—Maestro, enterurrü tobirri sopiñata suimome eana turrü, pero champü isane iyebo soboi. Pero como acüpuca, yecatü iña nimome.

⁶Isamutema sane. Auqui bacaüburuma süürümana nopiococa; tüsaipü aqioipü nimomerrüma ñoquiana. ⁷Auqui masamunuma señarrü ümo manuma maquiataca icumpañeruturrüma, arrübama aboma au quiatarrü barco, nauqui ayematü ayurama ümoma. Auqui süromatü ayurama. Ubataso uimia manio torrü barcoca ui nopiococa, tüsaipü abubaca ñoquiana. ⁸Numo arrtaiti Simón Pedro arrüna sane, bachesoiyoti esati Jesús, nanti ümoti:

—Acosi auquina yesaquiñü, Señor, itopiqui arrüñü ñoñünrrüñü tarucu nomünantü sobi.

⁹Itopiqui arrti Simón y arrübama icumpañeruturrü cütobüsoma nurria y birrubuma ui arrüna yacaübuurrüma nopiocorrü. ¹⁰Arrümanuma aütorrti Zebedeo, arrti Jacobo y arri Juan cütobüsoma ito. Tonema bama icumpañeruturrü Simón. Pero arrti Jesús nanti ümoti Simón:

—Tapü airruca, auquina caüma iñununecanü acaübu genterrü eanaqui nomünantü.

¹¹Auquimanu süroma tato abeu turrü yupu manio barco. Aitononioma eana cüosorrü. Auqui iñocotama nanaiña y süromatü isiuti Jesús.

Urriancati tato uiti Jesús taman maunrocono ane lepra apüti

¹²Anancati Jesús au taman pueblurrü. Auqui iñataiti taman ñoñünrrü esati, naqui maunrocono ui lepra. (Poreo nañeturrü.) Numo asaratitü ümoti Jesús aürotitü esati, achesoiti. Manquioti pünanaquiti aübu nanaiña nausasürrü, nanti ümoti:

—Señor, arrtü arrianca, puerurrü acuraca iñemo.

¹³Auqui arrti Jesús iñenotiti, nanti ümoti:

—Abu irranca, chauqui turriancü tato sobi.

Nauquiche tünanti sane, arrümanu norrocorrü sürotü pünanaquiti. Urriancati tato. ¹⁴Nantito Jesús ümoti:

—Tapü urapoi arrüna sane isucarüti quiatarrü. Acosi auquina besüro obi esati sacerdoterrü, nauqui atusi ümoti ta chauqui turriancü tato, itopiqui sane yacüpuurrü Moisés tücañe. Auqui caüma acumana ito ümoti Tuparrü itobo na chauqui turrian tato aemo.

¹⁵Ipiatema nürirrti Jesús au nanaiñantai. Sane nauquiche iyoberabaramacü süürümanama macrirrtianuca esati, nauqui onsaperioma nurarrti, y nauqui urriancama tato uiti. ¹⁶Tapü arrti Jesús sürotitü auna cauta champü genterrü nauqui eanti.

**Bacurarati Jesús ümoti taman
chüpuerurrüpü amenti**

¹⁷Taman nanenese arrti Jesús anancati manunecanati au taman porrü. Aboma bama fariseorrü tümonsoma acamanu ichepe bama manunecana nüriacarrü. Aübo aiñanaimia auqui nanaiñantai Galilea y auqui Judea y auquito Jerusalén. Arrti Jesús anati bacurarati ümo bama maunrocono ui nicusüurrti, arrüna torrio ümoti uiti Tuparrü.

¹⁸Auqui iñataimia ito manuma mañoñünca aübuti taman chüpuerurrüpü atüraití, anati icu nicürurrti. Rranrrümampü aüromatüpo aübuti, nauqui aiñanamati esati Jesús. ¹⁹Pero chütabücopü uimía auquiche aüromatüpo, itopíqui cütüpürrü macrirrtianuca. Sane nauquiche bapacheroma niquiubuma. Süromatü chacu porrü. Iponsünatama. Auqui manu nusuturrü iñanamati acü maníqui maunrocono icu nicürurrti eana manu genterrü esati Jesús. ²⁰Arrti Jesús tütusio ümoti que arrüma icocoromati. Nanti ümoti maníqui maunrocono:

—Yobo, arrüba nomünantü obi chauqui tümorrímiacana tato sobi.

²¹Tapü arrübama fariseorrü y arrübama manunecana nüriacarrü mapensarama au nitisirrimia ui na nurarrti sane. Namatü ümomantoe:

—¿Ñacutipü naqui ñoñünrrü? Ane nipünatenti aübuti Tuparrü ui arrüna sane nurarrti. Champüti puerurrü airrimiacati tato nomünantü. Arrtiatai Bae Tuparrü naqui puerurrü.

²²Pero arrti Jesús tütusiatai ümoti arrüna ñepensacarrüma, nanti ümoma:

—¿Causane apapensa arrüna sane? ²³Arrüñü Nemanaucurratöe Ñoñünrrü ane nisüriaca auna icu na cürrü nauqui aurrimíaca tato sobi nomünantü. Pero rrepente amucanaño iñemo que rranitacatai. ²⁴Sane nauquiche caüma itusiancana ausucarü arrüna nisüriaca: rracurara ümoti naqui ñoñünrrü.

Auqui nanti ümoti maníqui ñoñünrrü chüpuerurrüpü amenti:

—iAtüisai, aiquía nacüru, acui tato au napo!

²⁵Auquimanu atüraití maníqui ñoñünrrü icuqui nicürurrti isucarüma.

Iquiatati manu nicürurrti. Süroti tato au niporrti, ñanauncurrti ümoti Tuparrü.

²⁶Namanaiña cütobüsoma iñanaunumati Tuparrü y namatü aübu nirrucurrüma:

—Champü tumarrtai tacana arrüna sane one.

Tasuruti Leví uiti Jesús

²⁷Sürotitü Jesús auquimanu. Auqui asaratitü ümoti taman yacobrarrü impuestorrü, nürirrti Leví. Anati tümonsoti auna cauta nantarrü bapacarama. Nanti Jesús ümoti:

—Ariacu isiuñü.

²⁸Auquimanu arrti Leví atüraití. Iñocotati nanaiña. Sürotitü isiuti Jesús.

²⁹Auqui arrti Leví masamunuti pierreta au niporrti aübuti Jesús.

Aboma ito bama icumpañeruturrti tücañe, mayacabraca ichepeti, y

bama maquiataca. ³⁰Tapü arrübama fariseorrü y arrübama manunecana nūriacarrü ünantü ümoma. Namatü ümo bama ñanunecasarrti Jesús:

—¿Causane abasiquia auba ichepe bama mayacobraca impuestorrü y ichepe bama ane nomünantü uimia?

³¹Artri Jesús oncoiti nurarrüma, nanti ümoma:

—Champü nümocheti mercurrü ümo bama urria ümoma, ta ümo bama maunrocono. ³²Ta arrüñü isecatü ümo bama ane nomünantü uimia, nauqui aiñorronconomacü. Champürrtü isecatü ümo bama urriantai nisüboriquirrimia.

Causane arrtü ayunabo oñü (chubacapü)

³³Ñanquitioma ito pünanaquiti Jesús:

—Arrübama ñanunecasarrti Juan nantarrü ayunaboma, chübasopüma ui ñanauncurrüma ümoti Tuparrü, aübu tarucu neancarrüma; y arrübama ito ñanunecasarrrüma bama fariseorrü isamutema isiatai. Pero arrübama nanunecasa nantarrtai basoma y chaboma.

³⁴Aiñumuti Jesús nurarrüma ui machepecatarrü:

—Arrüñü ichepecacañü tacanati taman түбүбүho. Arrübama tasuru ümo түбүбүrrü chüpuerurrüpü ayunaboma, arrtü anatiqui naqui itүбүбүche acamanu ichepema. ³⁵Pero cuatiqui manu nanenese anche carүbuti maniqui түбүбүche pünanaquimia. Auqui caüma ayunaboma.

³⁶Urapoitito arrüna quiatarrü machepecatarrü isucarüma:

—Champüti naqui matүsünana taman camisarrü nuevurrü, nauqui arrүparriancati uirri nirrүrүpүtүrrti. Arrtü isamutenti sane, ensoratai niquiamisarrti nuevurrü. Y chүcoñöpүtü ümo manu rrүrүpүtүrrü nauqui arrүparrianca uirri.

³⁷Chuñahүbutapü vinorrü iyebo au nitaqui numuquianca namoncoca, na oco, itopiqui arrtü uiñata, bopobo taquiquia uirri, y vinorrü osүro acü. ³⁸Tiene que uiñahүbu vinorrü iyebo au taquiquia iyebo. Sane chensoropү vinorrü, ni taquiquiapito. (Au manu tiemporrü ahүburu uimia niyү uva au nitaqui numuquianca, nauqui oco, iyo vinorrü.) ³⁹Arrübama ipiacama achama vinorrü arrüna түcoboи nahүbucu, bien urria ümoma. Chirranrrүpүma achama arrüna vinorrü iyebo.

Matanama nүta trigo bama ñanunecasarrti Jesús

6 ¹Taman nanenese nesa macansacarrü artri Jesús amencoti auqui manio ñanaunca auna cauta ane trigo. Arrübama ñanunecasarrti matanama chimiantai nүta trigo, baurrtaquioima y basoma. ²Auqui arrübama fariseorrü namatü ümoma:

—¿Causane apisamune arrüna sane? Churriampü batrabaca au na nanenese nesa macansacarrü.

³Artri Jesús iñumutati nurarrüma:

—¿Taqui chülehebopü año icu Nicororrü arrüna isamutenti yüriaburrü David tücañe, numo cürüpüoti ichepe bama icumpañeruturrti? ⁴Ta sürotipo au niporrti Tuparrü aübuma. Besüro uiti ümo manio pan mosamamecana. Iyaríotño, y bachebotito ümo bama icumpañeruturrti. Abu champüti naqui puerurrü arioma, cunauntaiñamantai bama sacerdoterrü. (Abu champü nipünatenti David uirri.)

⁵Arrüñü Ñemanauncurratöe Ñoñünrrü ane nisüriaca ümo na nanenese nesa macansacarrü.

Tamanti ñoñünrrü süübo neherrti

⁶Quiatarrü nanenese nesa macansacarrü arrti Jesús sürotitü au manu taman porrü sinagoga nauqui anunecati. Acamanu anancati taman ñoñünrrü süübo nepanauncu neherrti. ⁷Tapü arrübama fariseorrü y arrübama manunecana nüriacarrü barrüpiarama ümoti Jesús, nauqui asaraimia, arrtü bacurarati au na nanenese nesa macansacarrü. Bapacheroma niquiubuma nauqui urabomati. ⁸Pero arrti Jesús tütusiatai ümoti arrüna ñapensacarrüma. Nanti ümoti maniqui ñoñünrrü süübo neherrti:

—Atüsaí, ariacu tauna cümüinta.

Atüraití maniqui ñoñünrrü. Aürotitü taha cümüinta. ⁹Auqui arrti Jesús ñanquitioti pünanaquí manuma maquiataca:

—¿Ñacusane arrüna urria uisamune au na nanenese nesa macansacarrü, arrüna urria o arrüna churriampü? ¿Taqui urria bacuirá itacu nisüboriquirrti osüborisapa, o aensapü urria uitabairoti?

¹⁰Asaratitü Jesús ümo namanaiña bama aboma acamanu. Auqui nanti ümoti maniqui ñoñünrrü:

—Aipesünaca nehe.

Arrti maniqui ñoñünrrü isamutenti sane. Auqui urriante tato manu neherrti. ¹¹Tapü arrübama maquiataca tüboricomá nurria. Ñanquitioma pünanaquimiantöe arrüna niquiubuma nauqui aisamunema arrüna churriampü aübuti Jesús.

Tacümanauncunuma bama doce apostolerrü

¹²Au manio naneneca arrti Jesús sürotitü onü manu yiriturrrü nauqui eanti. Enterurrrü tobirri neancarrti ümoti Bae Tuparrü. ¹³Nauquiche tütaneneca, batasuruti ümo bama ñanunecasarrti. Matacümanauncunuti ümo bama doce eanaquimia. Süro ito uiti üriboma “apostolerrü”. Arrüna nüirriama nantü auqui besüro “Bama yacüpusurrti Jesús”. ¹⁴Tonehio nüirrimia: Arrti Simón naqui süro ito üriboti Pedro, arrti Andrés yaruquitorrti Simón, arrti Jacobo, arrti Juan, arrti Felipe, arrti Bartolomé, ¹⁵arrti Mateo, arrti Tomás, arrti Jacobo naqui aütorrti Alfeo, arrti Simón naqui auqui manu partdorrrü cananista, ¹⁶arrti Judas aütorrti Jacobo y arrti Judas Iscariote, naqui ipiaventecanatiti Jesús ümo bama israelitarrrü.

Manunecanati Jesús

¹⁷Cuati tato Jesús ontiqui manu yiriturrü aïbu bama ñanunecasarrti. Sürotitü taha auna cauta champü yirituca İñataimía esati sürümanama bama maquiataca ñanunecasarrti y sürümanama macirrtianuica auqui nanaiñantai, auqui cürri Judea, auqui Jerusalén, y auqui manio puebluca nobürirri Tiro y Sidón abe abeu narubaitu turri. ¹⁸Rranrrüma onsaperioma nurarrti, y arrübama maunrocono rranrrüma nauqui urrianama tato uiti. Namanaiña bama anati choborese auma urriancama tato. ¹⁹Arrübama maunrocono rranrrüma aiñenomati Jesús, itopiqui namanaiña urriancama tato ui nüriacarrti.

Arrübama urria nacarrüma y bama taquisüratai

²⁰Auqui arrti Jesús asaratitü ümo bama ñanunecasarrti, nanti:
—Urriampae nacarrüma bama poberrü, itopiqui iyebo uimía ñana auna cauta üriabucati Tuparrü.

²¹Urriampae ito nacarrüma bama cürüpioma caüma, itopiqui ñana abecoma. 'Urriampae ito nacarrüma bama suchebo y areoro, itopiqui ñana biyaboma tato ui nipucünuncurrüma.

²²Urriampae ito nabaca arrtü unuma año bama macirrtianuca auqui niyaca y arrtü ipenenoma año arrüpecuquimía, o arrtü uratoquioma aume, o churriampü ümoma arrtü oncoimía nabüri. Urriampae nabaca, arrtü isamutema arrüna sane aume auqui niyaca, arrtüñü Ñemanauncurratöe Ñoñünrrü.

²³Aupucünu nurria, itopiqui iñatai manu nanenese anche rracumanaca aume au napese itobo na nautaqisürücü. Sane ito isamutema bama antiburrü aïbu bama profetarrü tücañe.

²⁴Tapü arrañö bama rricurrü, urriampae naba caüma, pero ñana autaqisürüca.

²⁵Autaqisürücatai bama champü faltabo aume y ababecatai, itopiqui ñana aucürüpüca.

'Autaqisürücatai ito bama pucünuña caüma, itopiqui ñana ausucheca y abareoca.

²⁶Autaqisürücatai arrtü manaunuma aume bama macirrtianuca, itopiqui sane ito ui bama antiburrü ümo bama mañapanca profetarrü tücañe.

Nicuarrüma oemo bama tüboricatai ucuata

²⁷Arrañö amoncoi nisura, sucanañü aume sane: Tari cuasürüti aume aubesa enemigorri. Tari urria napachücoi ümo bama tüboricatai aucuata. ²⁸Tari apicunusüancasa bama ipiaurramanaño. Apean ito itacu bama unuma año.

²⁹Arrti naqui iñompebairoti año, apichüsotito naruciüqui nausu. Arrtü anati naqui rranrrti aiquiaibuti naucüburri, tari apichüsotito naucamisa. ³⁰Apacumana ito ümoti naqui manquioti amopiünanaqui. Arrti naqui iquiaibutati amopiünanaqui, tapü apanquitiö tato. ³¹Apisamuse ümo bama maquiataca arrüna urria aumeantoe.

³²Arttö cuasiürütiatai aume naqui urria uiti aume, pero bama maquiataca champü, champü naucua uiti Tuparrü itobo, itopiqui arrübama churriampü nisüboriquirrimia isamutema ito sane. ³³Arttö apasamuca nomirria ümo bama masamunuma urria ito aume, champü naucua uiti Tuparrü itobo, itopiqui arrübama churriampü nisüboriquirrimia isamutema ito sane. ³⁴Arttö apaprerrtaca ümo bamantai puerurrü apacama tato aume, champü naucua uiti Tuparrü itobo, itopiqui sane isamutema ito bama ane nomünantü uimia. Baprerrtarama ümo bama nesarrüma amigorrü, itopiqui bapacarama tato itobo. ³⁵Pero arraño tiene que acuasürüma aume bama aubesa enemigorrü. Apasamu arrüna urria ümoma. Y arrtü apaprerrtaca ümoma, tapü abasiquia aparrüpera arrtü bapacarama tato itobo. Sane caüma yarusürürrü naucua uiti Tuparrü, y tusio ito, ta arraño tacana aütorrti yarusürürrü Tuparrü. Sane nauquiche, apasamu urria ümo bama malorrü, itopiqui arrti Tuparrü buenurrüto aübu bama chipiacapüma achampiencama y aübu bama malorrü. ³⁶Tari aupucüru itacu bama maquiataca, tacanatito Uyaü naqui anati au napese, pucürusuti autacu.

Tapü urapoi tanu nipünatenti quiatarrü

³⁷Tapü aipiaurramacati quiatarrü, y arrti Tuparrü chipiaurramanatipü añoito. Tapü apuncati quiatarrü; auqui caüma chücartticabopü año uiti Tuparrü. Apirrimiaca nomünantü uiti quiatarrü, sane caüma arrti Tuparrü irrimiacatatito arrüna nomünantü aboi. ³⁸Apacumana ümoti quiatarrü, auqui caüma arrti Tuparrü macumananati tato aume. Tantorrü ñacumanacarrti aume, arrüna chüpuerurrüpu apasutio nanaiña. Arrti macumananati aume isiu nartabaiqui arrüna napacumanaca ümoti quiatarrü.

³⁹Auqui arrti Jesús urapoitito isucarüma arrüna machepecatarrü apü bama manunecana:

—Arrti supuso chüpuerurrüpu acusürüti aübuti quiatarrü naqui supuso. Rrepente chépema paquioma au cütubirri bama torrü. ⁴⁰Champüti naqui ununecana puerurrü aiñununecanatiti nesarrti maestro. Ta tiene que estudiaboti nauqui aye uiti tacanati nesarrti maestro.

⁴¹¿Causanempü ane nümoche obi arrüna nomünantü pario uiti aruqui, tapü arrüna tarucu nomünantü obi champü nümoche obi? ⁴²¿Causane arrian anuneca ümoti quiatarrü naqui champüapae nomünantü uiti, tapü arrücü tarucu nomünantü obi? ¡Ñapanrrücü! Primero tiene que aicoñoco nasüboriqui aübuti Tuparrü, arrtü arrianca aiñununecanati aruqui.

Machepecatarrü: Nusaca tacana sueca

⁴³Arrüba sueca omirria pachebo nobütarrü omirria ito. Arrüba sueca chomirriampü pachebo nobütarrü chomirriampito. ⁴⁴Chümacacapü higo cütüpüqui nihi cümüchürürrü, ni macampü uva cütüpüqui parirri. ⁴⁵Sane ito arrti ñoñürrü buenurrü manitanati arrüba omirria, itopiqui arrüna urria ane au nausasürüti. Tapüti naqui ñoñürrü churriampü

nisüboriquirrti manitanati arrüba omünantatai, itopiqui arrüba nomünantü abe au nausasürri. Arrüna ane au nuyausasü, tone arrüna manitate.

Torrü nubaca nitümo porrü

⁴⁶¿Causane amucanaño iñemo Señor, Señor, pero chapisamutempü nirrácüpucu aume? ⁴⁷Arrti naqui cuati yesañü y oncoiti nisura, y isamutenti isiu, ⁴⁸ichepecacati tacanati taman ñoñünrrü masamunuti ipoboti. Primero bapauruti cürrü bien otüüsa. Iñatati nitümo porrü onü canrrü. Numo tüchauqui manu niporrti, rrobeoca, ataso sapoco uirri. Uüno. Iñatai turrü itupecu manu porrü fuerte nurria, pero chüporcopü uirri, itopiqui ane nitümorrü onü canrrü.

⁴⁹Tapü arrti naqui oncoiti nisura y chisamutentipü isiu, ichepecacati tacanati taman ñoñünrrü masamunutito ipoboti pero eana cüosorrü, champü nitümorrü. Numo iñatai nitiempo tanaunrrü ubataso nusüruca y umuüno. Iñatai fuerte itupecu manu porrü. Taübüco y iñarrio nurria. Ensoratai.

Bacurarati Jesús ümoti imostoti taman capitán rromanorrü

7 ¹Nauquiche tüchauqui ñanitacarrti Jesús ümo genterrü, sürotitü au Capernaum. ²Acamanu anancati taman capitán rromanorrü. Anati taman imostorrti, naqui tarucapae nicuarri ümoti. Maunroconoti maniqui mosorrü, tüsaiyapae aconti. ³Nauquiche oncoiti nürirrti Jesús maniqui capitán, bacüpuruti ümo bama üriatu israelitarrü nauqui aeromatü esati Jesús, anquimia pünanaquiti nauqui ariorrti acurati ümoti maniqui mosorrü. ⁴Arriüma caüma süromatü esati Jesús. Aiñanaimia esati. Manquioma pünanaquiti, namatü.

—Asamu nurria ümoti maniqui capitán, nauqui aicurarati maniqui imostorrti. ⁵Itopiqui arrüna noesa genterrü cuasürü ümoti maniqui capitán. Uitito urriane arrüna porrü sinagoga au na sobesa pueblurrü.

⁶Auqui arrti Jesús sürotitü isiuma. Pero nauquiche tütaboma saimia niporrti capitán, arrti capitán bacüpuruti ümo bama nesarri amigorrü, nauqui uraboimia isucarüti Jesús arrüna sane:

—Nanti capitán sane: Señor, arrüñü champü isane niyaca nauqui aerotü au nipo. ⁷Sane nauquiche champürürtü yaca tanu aesacü. Pero tusio iñemo que ui tamantai nacüpucu urriancati tato naqui imoso. ⁸Itopiqui bacüpuruma ito iñemo bama isüriatu, y tacane aboma ito bama ümoche rracüpu. Arrtü sucanañü ümoti taman: “Acosi”, sürotitü. Y arrtü itasucati quiatarrü, cuati, y arrtü sucanañü ümoti imoso: “Aisamuse arrüna sane”, isamutenti.

⁹Arrti Jesús cütobüsoti ui arrüna sane nurarri maniqui capitán. Asaratitü ümo genterrü arrüna ananca isiuti, nanti ümoma:

—Ñemanauncurratoe, champü tiñoncoi eana bama israelitarrü tacana arrüna sane macoconauncurrü iñemo tacana arrüna oncotitü iñemo naqui ñoñünrrü rromanorrü.

¹⁰Basüciübücoma tato manuma nesarrti amigorrü capitán. Iñataimia tato au niporrü. Asaramati maniqui mosorrü chauqui turriancati tato.

Süboricoti tato naqui aü taman biurarrü

¹¹Tomenotü naneneca. Auqui arrti Jesús sürotitü au manu pueblurrü nürirri Naín. Süromatü isiuti bama ñanunecasarri y arrüna cütüpürrü genterrü. ¹²Nauquiche tiñataiti saimia manu pueblurrü, asaratitü cümenu manuma mañonünca cuamatü auqui pueblurrü aübuti taman coño, nauqui aiñanamati cütu. Arrti maniqui coño cunauntaiñatiatai aürrü manu paürrü biurarrü. Süürümana genterrü auqui pueblurrü süromatü isiuti maniqui coño. ¹³Nauquiche asaratitü Señor ümo nipiäcütoti, taquisürü ümoti. Nanti ümo: —Tapü areoca.

¹⁴Auqui aürotitü esa manu cürurrü, aiñenti. Tapü manuma iquiatama tochencoma aübu. Auqui nanti Jesús ümoti maniqui coño: —Sucanañü aemo yaürrü: ¡Atüsa!

¹⁵Auqui arrti maniqui coño tümonsoti y manitanati. Arrti Jesús itorrimianatiti tato ümo nipiäcütoti. ¹⁶Ui arrüna sane arrtaimia, tarucu nirrucurrüma bama macrirrtianuca. Iñanaunumati Tuparrü, namatü: —Anati taman profetarrü auna uyarrüpecu, tarucu nüriacarri. Arrti Tuparrü bayurarati ümo nesarrti genterrü, bama israelitarü.

¹⁷Au nanaiña cürü Judea y auna itupecu ipiatema arrüna isamutenti Jesús.

Arrübama yacüpusurrti Juan Bautista

¹⁸Arrti Juan Bautista ipiatenti nanaiña arrüna sane, itopiqui urapoimia isucarüti bama ñanunecasarri. Auqui batasuruti ümo bama torrü. ¹⁹Bacüpuruti ümoma, nauqui aüromatü esati Jesús, nauqui anquirioma pünanaquiti sane: “¿Arrüciü Cristo, naqui yebobotü, o tiene que suparrüperaiqui cümenutiqui?

²⁰Arrübama torrü macoreoca uiti Juan süromatü esati Jesús. Aiñanaimia esati, namatü ümoti:

—Arrti Juan Bautista icüpuruti somü nauqui supanquirio apünanaquiciü, arrtü arrüciü Cristo, naqui yebobotü, ¿tiene que suparrüperaiqui cümenuti?

²¹Au manu nauquiche iñataimia, arrti Jesús anancati bacurarati ümo bama süürümanama maunrocono y arrübama anati choborese auma. Aboma ito bama supuso, uiti asarama tato. ²²Auqui iñumutati Jesús nurarrüma, nanti:

—Amecosi tato aburaboi isucarüti Juan nanaiña arrüna amarrai y arrüna amoncoi. Aburasoi ito isucarüti que arrübama supuso asarama tato, arrübama chamencopü amencoma tato sobi, arrübama maunrocono ui lepra urriancama tato, arrübama chonaumpüma onauma tato, arrübama coño süboricoma tato y surapoi ito isucarü bama poberrü arrüna omirriantai manitacarrü.

²³Urriampae nacarrti naqui chübatehebotipü ñacoconauncurrti iñemo.

²⁴Nauquiche tüsüroma tato bama yacüpusurrti Juan, arrti Jesús manitanati cütüpüti Juan. Nanti ümo genterrü:

—¿Isanempü ümoche abacatü aucutanu au rroense? ¿Taqui abacatü amasarai taman nihi tutairri ane mapetonono ui maquiütürri? ²⁵O abacatü amasarati taman ñoñünrrü naqui champü tacanache naibiquirri? Arraño tusio aume que arrübama champü tacanache naibiquirrimia aboma au nipo bama mayüriabuca. ²⁶¿Isanemo nümoche abacatü? ¿Taqui abacatü amasarati taman profetarri? Ñemanauntu nurria, arrti te profetarri. Manriqui nüriacarri pünanaquiti profetarri. ²⁷Arri Juan tonenti maniqui coreorri uiti Tuparrü. Ane te corobo icütüpüti Juan arrüna sane nurarri Tuparrü ümoti Cristo: “Racüpuca ümoti taman coreorri, nauqui acusürüti aicoñocoti cutubiurri acümenucü”.

²⁸—Ñemanauncurratoe sucanañü aume —nanti Jesús—, icu na cürri champü tanati naqui manrrü ane nüriacarri pünanaquiti Juan Bautista. Pero au na cauta üriabucati Tuparrü arrti naqui chitonentipatai ane manrrü nüriacarri pünanaquiti Juan.

²⁹‘Nanaña genterrü ichepe bama mayacobraca impuestorri ñorronconomacü y ürioma uiti Juan tücañe. Urria ümoma ñapensacarri Tuparrü. ³⁰Tapü arrübama fariseorri y bama maestro ümo nüriacarri champürri ürioma uiti Juan. Chirranrrüpüma asuriuma arrüna urria ñapensacarri Tuparrü aübuma.

³¹Nantito Señor ümoma:

—¿Aübuchepü ichepeca bama macrirrtianuca arrüna tiemporrü caüma? ³²Arrüma tacana arronema masiomanca aboma tûmonsoma au plaza, cupiusuma. Tosibicoma ümo bama icumpañeruturriüma, namati: “Supapunuca burri aume, pero chautococapü. Supasoniquia aume arrüna orronenatai, pero chabareocapü. ³³Itopiqui numo cuati Juan Bautista, arraño amucanaño que anati choborese auti, locorri, itopiqui amarrai chipiacatipü ahati arrüna ocoro, y charucupatai niyacarrü. ³⁴Auqui isecatü arrüñü naqui Ñemanauncurratoe Ñoñünrrü. Arrüñü caüma irraca, ichaca, y arraño amucanaño ñemo que chaborrñü y tarucu nirraca. Amucanaño ito que arrüñü amigorñü ümo bama tarucu nomünantü uimia y ümo bama mayacobraca impuestorri. ³⁵Pero tusiatai arrüna ñapanauncurri Tuparrü ui arrüna urria isamutenti auna icu na cürri.

Basoti Jesús au niporri taman fariseorri

³⁶Tamanti eanaqui manuma fariseorri itasurutiti Jesús nauqui aati ichepeti. Arri Jesús sürotitü au niporri. Aiñanainti taha. Atümoti esa mensarri. ³⁷Ananca taman paürri pohoso au manu pueblurri, churriampatai nisüboriquirri. Oncoi nüirrti Jesús, ta sürotitü aati au niporri maniqui fariseorri. Auqui ññatai acamanu esati aübu taman boteyama ataso ui nasaite arrüna urriampae norimia. ³⁸Areoro. Bachesoiyo esati Jesús. Panso nipoperri ui nisucürri. Isübuta tato ui niqui nitanurri. Besabo ito ümo nipoperri. Isemata manu nasaite nipoperri. ³⁹Nauquiche tarritai arrüna sane maniqui fariseorri naqui itasurutiti Jesús, mapensarati: “Arri ñemanauntupü profetarri naqui Jesús, tusiopü ümoti isane naca na paürri, ta churriampü nisüboriquirri. Y todaviarri ñenoti”. ⁴⁰Auqui nanti Jesús ümoti maniqui fariseorri:

—Simón, ane arrüna irranca suraboi asucarücü.

Aiñumuti maniqui fariseorrü, nanti:

—Urasoi te isucarüñü, maestro.

⁴¹ Auqui nanti Jesús ümoti:

—Aboma torrüma mañoñunca ebeoma ümoti taman yaprerrtarrü. Arrti maniqui taman ebeoti quiniento denarios, arrti maniqui quiatarrü ebeoti cincuenta denarios. ⁴² Arrümanuma torrü chüpuerrüüpüma apacanema manu nebequirrimia. Pero arrti maniqui baprerrtarati ümoma itorrimiatatiatai ümoma manu nebequirrimia. ¿Uracü sane, ñacuti eanaqui manuma torrü manrrü machampiencanati ümoti?

⁴³ Arrti Simón aiñumuti:

—Canapae arrti maniqui ebeoti manrrü.

Nanti Jesús:

—Ñemanauncurratoe arrüna ucanü.

⁴⁴ Auqui asaratitü ümo manu paürrü, nanti ümoti Simón:

—Ani na paürrü. Nauquiche iñatai auna napo, champürrtü acheca iñemo turrü, nauqui iyarrübirio nipo. Tapü arrüna paürrü iyarrübirio nipo ui nisucürrü, y isübuta tato ui niqui nitanurrü. ⁴⁵ Champürrtü acheca besorrü iñemo, pero arrüna paürrü nauquiche iñatai auna napo, ane besabo ümo nipo. ⁴⁶ Champürrtü acheca ito iñemo nasaite arrüna urriantai norimia ümo nichanu, pero arrüna paürrü isemata nasaite nipo. ⁴⁷ Sane nauquiche suraboira asucarücü arrüna sane: Morrimiacana tato arrüba tarucapae nomünantü uirri, sane nauquiche tarucapae nisuasürücü ümo. Pero arrti naqui morrimiacana tato chimiantai nomünantü uiti, chimiantaito arrüna nisuasürücü ümoti.

⁴⁸ Auqui nanti Jesús ümo manu paürrü:

—Arrüba nomünantü obi, chauqui tümorrimiacana tato sobi.

⁴⁹ Tapü arrübama amoncoma tümonsoma acamanu ichepeti namatü ümomantoe:

—¿Ñacutipü naqui ñoñürrü? Hasta morrimiacana tato uiti nomünantü.

⁵⁰ Auqui nantito Jesús ümo manu paürrü:

—Chauqui tataesübuca eanaqui nomünantü, itopiqui aicococañü. Acoi tato, taiquina urria tanu aemo.

Arrüba paüca payurara ümoti Jesús

8 ¹ Nauquiche tüpasao arrüna sane, arrti Jesús amencoti auqui sürümana puebluca y poca. Urapoiti arrüna nüriacarri Tuparrü. Arrübama doce ñanunecasarrti süromatü isiuti. ² Amonquio ito ichepeti manio paüca, tomirrianquio tato uiti. Abe arrüba anancati choborese ubau. Abe ito arrüba amonquio upaunrocono. Acamanu omeana ananca Mariarrü, arrüna nürirri ito Matarenarrü, arrüna amoncoma tücañe siete machoboreca ahu. ³ Ananca ito Juanarrü, nicüpostoti Chuza naqui administrador ümoti yüriaburrü

Herodes. Ananca ito Susana acamanu y amonquio ito piquiataca paica. Payurara y pachebo arrüna ane oboi ümoti Jesús y ümobama ñanunecasarrti.

Machepecatarrü: Arrti naqui mancüturu

⁴Sürümanama bama auqui puebluca süromatü asaramati Jesús. Nauquiche tütaboma sürümanama macirrtianuca, manunecanati ümoma ui arrüna machepecatarrü, nanti:

⁵—Tamanti ñoñünrrü sürotitü ancütuti. Basupiutati niyorrrü. Auqui abe ba bupaquio isiu cutubiurrrü. Icümotema macirrtianuca, y cuantio nutaumanca yubario. ⁶Abe ito arrüba bupaquio omeana canca. Ububaüro manio niyoca. Pero unrratorrrü bosübo, itopiqui champürttö panso nurria cürü. ⁷Abe ito arrüba bupaquio omeana cümeca. Ububaüro y musunaun manio plantamanca ichepe manio cümeca. Pero manrrü apuraurrrü niñusunaun manio narrüchopüro cümeca. Sane nauquiche chiyebopü oboi manio plantamanca. ⁸Abe ito arrüba bupaquio auna urriampae cürü. Ububaüro y musunaun. Pachebo nobütarrü chama. Hasta pachebo auquitaman niyoma cien niyorrrü.

Manitanati Jesús fuerte nurria, nanti:

—Arraño ane naumumasu. ¡Amonsapesio te!

**Urapoiti Jesús isane nümoche
manu machepecatarrü**

⁹Auqui arrübama ñanunecasarrti ñanquitioma pünanaquiti:

—¿Isane nümoche arrüna machepecatarrü?

¹⁰Nanti Jesús ümoma:

—Arraño torrio aume uiti Tuparrü nauqui aye aboi arrüba machepecatata, causane nüriacarrti. Pero ümo bama maquiataca rranitaca ui machepecatacatai. Sane caüma chiyebopü uimia. Asaramatü, pero charrtaipüma. Oncoimia, pero chüsüropü au nitanurrüma.

¹¹‘Suraboira ausucarü isane nümoche arrüna machepecatarrü: Arrümanu niyorrrü tacana nurarrti Tuparrü. ¹²Arrümanio bupaquio isiu cutubiurrrü tacana arrübama oncoi, pero cuati choborese iquiaübutati nurarrti Tuparrü auqui nausasürüma, tapü icocotama, y tapü taesüburuma eanaqui nomünantü. ¹³Tapü arrümanio niyoca bupaquio eana canca tacana arrübama ocoimia y yasutiuma nurarrti Tuparrü aübu nipucünuncurrüma. Pero champürttö icocotama nurria. Icocotama baeta. Auqui caüma, arttö cuatü taquisürücürrü ümoma, iñocotama ñacoconauncurrüma. ¹⁴Tapü arrümanio niyoca bupaquio eana cümeca, tacana arrübama oncoimia nurarrti Tuparrü, pero champü nümoche uimia, itopiqui tarucu penarrü uimia iyo ausüratai icuqui nantai cürü, y mapensarama iyo nenarrirrimia y iyo pierrtacatai. Ui arrüna sane chicoñocotapüma nisüboriquirrimia. ¹⁵Pero arrümanio niyoca bupaquio au na urriampae cürü, tonema bama yasutiuma nurarrti Tuparrü

aübu nanaiña nausasürrüma. Toneantai ñapensacarrüma. Isamutema isiu nurarri Tuparrü. Chübatatebopüma arrtü cuantio macocotoca ümoma.

Machepecatarrü: Basarurrü

¹⁶Nantito Jesús:

—Arrtü uiñonocota taman basarurrü, chüpuerurrüpü uitamurriquia, ni uiñatapü iquiana cürurrü. Ta uiñotorrimiata ape, nauqui anentarrüpo ümo bama cuamatüpo. ¹⁷Sane ito arrüna anecanatai, ta tiene que atusi ñana. Nanaiña arrüna chütusiopü caüma, tusiatai ñana.

¹⁸Amonsoi nurria arrüna nisura, itopiqui arrti naqui oncoi, tusio ümoti y torrioiqui manrrü uübo ipiacaboti. Pero arrti naqui chütusiopü ümoti, caüburu pünanaquiti arrüna ipiacati au ñapensacarri.

Arrübama yaruquitorrti Jesús ichepe nipiácütoti

¹⁹Acamanu ito iñatai nipiácütoti Jesús ichepe bama yaruquitorrti. Pero chüpuerurrüpüma aiñanaimia taha esati nurria, itopiqui sürümanama macirrtianuca. ²⁰Tamanti urapoiti isucarüti Jesús, nanti:

—Napacüma y bama aruquitaqui aboma taha türüpo, rranrrüma asaramacü.

²¹Pero arrti Jesús nanti ümoma:

—Arrübama oncoimia nurarri Tuparrü y icocotama y isamutema isiu, tone nipiácü y tonema bama masaruquitaqui.

Uiti Jesús tochenco maquiütürrü y nipococo turrü

²²Taman nanenese arrti Jesús süroti au barco aübu bama ñanunecasarri, nanti ümoma:

—Curi taha topü na turrü.

Auqui süromatü, ²³niyücürrüma isuqui turrü. Arrti Jesús manumuti au barco. Nauquiche aboma cümünta manu turrü, cuatü fuerte maquiütürrü, y pocoro nurria turrü uirri. Süro turrü au barco y rranrrü ubaca. ²⁴Auqui airrtopünanamati Jesús. Namatü ümoti:

—iMaestro, Maestro, tüsaiypae uyubaca!

Auquimanu arrti Jesús atüraití. Icuansomocotati maquiütürrü y turrü. Au manu rratorrü nanaiña tochenco uiti. Chümaquiütücaiquipü, ni apocoiquipü turrü. ²⁵Auqui nanti ümo bama ñanunecasarri:

—¿Causane chapicocapüñü nurria?

Pero arrüma cütobüsoma. Ñanquitioma pünanaquimiantoe:

—¿Isanempü nacarri naqui ñoñünrrü? Manitanati ümo maquiütürrü y ümo turrü, y opicocota nurarri.

Urriancati tato taman ñoñünrrü auqui Gadara

²⁶Aüboqui aiñanaimia topü manu narubaitu turrü au manu cürrü nürirri Gadara, niyequirrimia auqui Galilea. ²⁷Tobüsoti acü Jesús auqui barco. Auqui cuati taman ñoñünrrü esati auqui pueblurrü, naqui chaübopü nacarrüma machoboreca auti. Anati cüsuasati y chübvavivicotipü au porrü, si no eana bama coiño. ²⁸Nauquiche tasaratitü cümenuti Jesús, sürotitü achesoiti esati aübu nitosibirrti. Nanti maniqui choborese turuquiti:

—¿Causane ayetü auna yesañü, arrücü Jesús, Aütorrti yarusürürrü Tuparrü? Tapü aitaquisünüancacañü.

²⁹Nanti sane maniqui choborese, itopiqui arrti Jesús ticüpurutiti auquiti maniqui ñoñünrrü. Taipü arrübama macrirrtanuca nantarrü itomoenomati maniqui ñoñünrrü. Tomoeni neherrti y nipoperrti ui carenarrü. Pero arrti itopünatati y sürotitü uiti choborese au roense auna cauta cücheca. ³⁰Auqui arrti Jesús ñanquitioti pünanaquiti:

—¿Isane nüri?

Aiñumuti:

—Arrünü nisüri “Sürümanama”.

Nanti sane itopiqui sürümanama bama machoboreca aboma auti.

³¹Arrübama machoboreca manquioma pünanaquiti Jesús tapü bacüpuruti ümoma au manu nusutu cürrü, arrüna champü nitacürürrü. ³²Acamanu saimia amonquio nupaucheca, abe bubaso onü manu yiriturrü. Manquioma machoboreca nauqui puerurrüma aüromatü ubau manio nupaucheca. Torrio uiti Jesús ümoma. ³³Auqui süromatü auquiti maniqui ñoñünrrü. Süromatü ubau manio nupaucheca. Uirri caüma locorriantai. Opiaciñaño abeuqui manu nisacürü, bupaquio au turru y ububacara. Mocoño.

³⁴Tapü arrübama bacuirara yutacu cütobüsoma ui arrüna sane arrtaimia. Süromatü yarucurrüma au pueblurrü y au nanaiñantai uraboimia arrüna sane pasabo. ³⁵Nauquiche toncoimia bama pohoso, süromatü asaborimia. Aiñanaimia taha esati Jesús. Arrti maniqui ñoñünrrü naqui amoncoma machoboreca auti, anati tümonsoti esati Jesús. Ane naibirrti tato. Champü causane nacarrti. Arrübama pohoso birrubuma. ³⁶Arrübama arrtaimia arrüna pasabo urapoimia isucarüma, causane nauquiche urriancati tato maniqui ñoñünrrü. ³⁷Ui arrüna sane enterurrüma bama macrirrtianuca auqui manu cürrü Gadara namatü ümoti Jesús:

—Asamu nurria suiñemo, acosi auquina subarrüpecuqui.

Itopiqui tarucu nirrurürrüma. Auqui arrti Jesús süroti tato au barco, nauqui aüroti tato au Galilea. ³⁸Tapü arrti maniqui ñoñünrrü urriancati tato rranrrti aürotitü isiuti Jesús. Pero arrti Jesús chirranrrtipü. Nanti ümoti:

³⁹—Acosi tato au napo, uraso tanu arrüna urria yachücoiti Tuparrü aübucü.

Auqui süroti tato maniqui ñoñünrrü. Urapoiti au pueblurrü arrüna urria isamutenti Jesús ümoti.

**Nitaquiumucuturrti Jaíro y taman
paürrü maunrocono**

⁴⁰Nauquiche tiñataiti Jesús taha topü manu narubaitu turrtü, yasuriurumati aübu nipucüinuncurrüma, itopiqui namanaiña amoncoma barrüperarama cümenuti. ⁴¹Auqui iññataitito taman ñoñünrrü nürirrti Jaíro, naqui ane nüriacarrti au porrtü sinagoga. Artti bachesoiyoti esati Jesús. Anquiti pünanaquiti nauqui aüro itü au niporrti, ⁴²itopiqui nitaquiumucuturrti tüsaiyapae aco. Manu nitaquiumucuturrti ane taqui doce añorrtü ümo. Sürotitü Jesús isiuti y süromatito isiuma sürümanama macrirrtianuca, hasta que simianati Jesús uimía.

⁴³Acamanu eanama ananca taman paürrü maunrocono. Tütabe doce añorrtü nacarrü aübu manu narapaca notorrtü. Champü isane ümo, itopiqui nanaiña carrtao uirri nauqui urrianempü tato, pero champüti naqui mercurrü puerurrü acurati ümo. ⁴⁴Arrümanu paürrü sürotü esati Jesús chacuquiti. Iñenta nabeu naibirrti, y au manu rratorrtü tochenco narapaca notorrtü. ⁴⁵Auqui artti Jesús ñanquitioti:

—¿Ñacuti iñenoñü?

Champüti manitana. Artti Pedro y arrübama icumpañeruturrti namatü ümoti:

—Maestro, arrtai te arrübama macrirrtianuca isimianamacü y ipenenomacü. ¿Causanempü anquirio ñacuti aiñenü?

⁴⁶Pero artti Jesús nanti:

—Tamanti iñenoñü, itopiqui tusio iñemo tamanti urriancati tato ui nisusüu.

⁴⁷Tütusio ümo manu paürrü, ta chüpuerurrüpü aiñanecanü manrrü. Así que sürotü esati Jesús aübu nipiachoconocorrü ui nirrucurrü, achesoi esati. Urabü isucarü namanaiña macrirrtianuca, itopiquiche aiñenoti Jesús, y causane ito nauqui urrian tato. ⁴⁸Auqui nanti Jesús ümo:

—Turriancü tato, itopiqui aicococañü. Acosi tato, taiquiana urria aemo tanu.

⁴⁹Anancatiqui manitanatiqui, auqui iñataiti taman auqui niporrti Jaíro. Nanti ümoti Jaíro:

—Nataquiumucu chauqui tücoiño, tapü asiquiaiqui icuatati naqui maestro. Champü nümochequi.

⁵⁰Artti Jesús oncoiti nurarrtti. Nanti ümoti Jaíro:

—Tapü airruca, aicocosoñüantai. Nataquiumucu urriante tato caüma.

⁵¹Nauquiche tiñataiti au niporrti Jaíro, champürtrü chebo uiti nauqui aüromatüpo ichepeti cunauntaiñamantai Pedro, artti Jacobo, artti Juan y artti maniqui iyupurrü y nipiapa manu cupiquimía. ⁵²Namanaiña amoncoma areoroma y sucheboma isiu manu cupiquirri. Auqui nanti Jesús ümoma:

—Tapü abareoca, arrüna cupiquirri champürtrü coiño, ta ane manumu.

⁵³Pero arrübama amoncoma acamanu iyabomati Jesús, itopiqui tusio ümoma ta coiño. ⁵⁴Auqui artti Jesús sürotitü esa. Iñentati nehese, manitanati ümo fuerte nurria, nanti:

—¡Cupiquirri, atüsaí!

⁵⁵Auquimanu süborico tato y au manu rratorrü atürai tato. Arrti Jesús bacüpuruti nauqui asapanema. ⁵⁶Arrti yupurrü ichepe nipiarrü cütobüsoma. Auqui nanti Jesús ümoma:

—Tapü aburapoi tanu arrüna pasabo one.

Bacüpuruti Jesús ümo bama ñanunecasarrti

9 ¹Auqui arrti Jesús oberabarama uiti bama doce ñanunecasarrti.

Bacheboti ümoma üriacaboma, nauqui puerurrüma acüpuma tanene ümo bama machoboreca, y nauqui urriancama tato uimia bama maunrocono. ²Nanti ümoma:

—Icüpucañö nauqui aburaboi arrüna causane arrtü üriabucati Tuparrü, y nauqui apacura ümo bama maunrocono.

³Nantito ümoma:

—Tapü apacaca isaneantai, ni barrton, ni pusanese, ni autapiquibo, ni aumonibopü. Amecosi aübu arrüna ane aucütüpü. Tapü apacaca quiatarrü camisarrü. ⁴Arrtü anati naqui yasuriuruti año au niporrti, abasiqüia acamanu cheperrtü amecatito auquimanu. ⁵Arrtü apiñatai au taman pueblurrü auna cauta chirranrrüpüma asuriuruma año, amecosito auquimanu. Apipetobisaño ñünana cütorrü, na atusi ümoma que ane nipünatema.

⁶Auqui süromatü manuma doce. Amencoma auqui nanaiña puebluca. Urapoimia arrüna urriampae manitacarrü y urriancama tato uimia bama maunrocono.

Mapensarati yüriaburrü Herodes

⁷Arrti yüriaburrü Herodes ipiatenti nanaiña arrüna isamutenti Jesús. Chütusiopü ümoti causane uiti ui arrüna oncoiti, itopiqui aboma bama namatü que arrti Juan Bautista süboricoti tato, que tonenti Jesús.

⁸Maquiataca namatü, arrti Jesús tonenti profetarrü Elías, naqui cuati tato icu cürrü. Aboma ito maquiataca namatü, arrti Jesús tonenti taman profetarrü antiburrü, naqui süboricoti tato. ⁹Tapü arrti Herodes nanti:

—Arrrüñü rracüpuca tücañe nauqui atüsü nitanurrti Juan Bautista; tusio te iñemo ta coiñoti. ¿Ñacutipü maniqui ipiatempae nürirrti, maniqui Jesús?

Sane nauquiche arrti Herodes rranrrti asaratiti Jesús.

Basaparati Jesús ümo bama cinco mil

¹⁰Auqui cuama tato bama apostolerrü esati Jesús. Iñataimia esati.

Urapoimia isucarüti nanaiña arrüna isamutema. Auqui arrti Jesús sürotitü aübuma auna cauta champü genterrü, taha saimia manu pueblurrü nürirri Betsaida. ¹¹Nauquiche tütusio ümo bama macrirrtianuca, süromatü isiuti. Arrti yasuriuruti ümoma aübu nurria. Manitanati ümoma causane arrtü üriabucati Tuparrü. Arrübama maunrocono eanama urriancama tato uiti.

¹²Nauquiche tütümümüca, arrübama ñanunecasarrti süromatü esati, namatü ümoti:

—Asamu nariorrü ümo na genterrü, nauqui aïro tato acansa y nauqui apache tuburibo taha ubau manio poca saimía. Itopiqui auna cauta nusaca champü isane.

¹³Pero arrti Jesús nanti ümoma:

—Apache arraño tuburiboma.

Auqui namatü:

—Champü isane soboi, cunauntaiñantai cinco panes y torrü nopiococa. ¿Arrianca nauqui somenotü supacompore pemacarrü ümo na cütüpürrü genterrü?

¹⁴Arrüna nubiquirrimia taqui cinco mil mañoñünca. Auqui nanti Jesús ümo bama ñanunecasarrti:

—Aburasoi isucarüma tari tûmonsoma taiquiana cincuenta.

¹⁵Sane isamutema. Namanaiña tûmonsoma. ¹⁶Auquimanu arrti Jesús iquianiotiño mecuti manio cinco panes y arrümanio torrü nopiocomanca. Asaratitü ape. Machampienanati ümoti Tuparrü yobitobo. Auqui itorrimiatati ümo bama ñanunecasarrti, nauqui aitorrimia ümo genterrü. ¹⁷Namanaiña basoma y abecoma nurria. Auqui ubataso doce noconoca ui na nisobüraturrüma.

Arrüna urapoiti Pedro

¹⁸Taman nanenese arrti Jesús anancati meaboti. Aboma ichepeti bama ñanunecasarrti. Auqui ñanquitioti pûnanaquimia:

—¿Urama sane macirrtianuca iñemo?

¹⁹Arrüma namatü:

—Aboma bama namatü arrücü Juan Bautista. Aboma bama maquiataca namatü arrücü Elías. Namatito aemo bama maquiataca arrücü tamanti uturuqui bama antiburrü profetarrü, naqui süborico tato.

²⁰Auqui ñanquitioti pûnanaquimia:

—¿Carü arraño, aburaño iñemo?

Auqui arrti Pedro nanti ümoti:

—Arrücü Cristo naqui tacümanauncunu uiti Tuparrü.

Urapoiti Jesús niconcorrti

²¹Auqui arrti Jesús urapoiti nurria isucarüma, tapü urapoimia arrüna sane. ²²Nantito ümoma:

—Arrüñü Ñemanauncurratoe Ñoñünrrü tiene que ichaquisürü nurria y chüpuerurrüpü isuasürü ümo bama mamayoreca israelitarrü y bama üriatu sacerdoterrü y bama manunecana nûriacarrü. Tiene que ichabori, pero pürücü trerrü naneneca isüboriquia tato.

²³Auqui nantito ümo namanaiña:

—Arrtü anati naqui rranrrü ayetitü isiuñü, tari taquisürübatü isiuquñü. Tari tacürusu ñaquioncorrti iyotiatoe naneneca, tacanarrtü chüvaleopü nisüboriquirrü

ümoti. ²⁴Artri naqui chirranrrüpi aconti auqui niyaca, ensoro ñana nisüboriquirrti. Pero artri naqui coñño auqui niyaca iyebo uiti ñana nisüboriquirrti au napepe. ²⁵Champi niyaserebiquirri ümoti ñoñünrrü acananenti nanaiña arrüba abe icu na cürrü, artü au nitacürrü peneco nausüpurrti au infierno. Itopiqui tarucu nicua nuyausüpi. Champü aye uirri tacana nicuarrü. ²⁶Artri naqui cüsobo saübuñü y aübu nisura, arrüñü ito chirrancapi yaca aübuti au manu nanenese anche iseca tato aübu tarucu nanentacarrü y aübu tarucu nisüriaca uiti Iyau, y aübu bama angelerrü samamecana ümoti, ta arrüñü Ñemanauncurratoe Ñoñünrrü. ²⁷Sucanañü ito aume ñemanauncurratoe: Aboma bama auna anchepe chüpuerurripü acoma cheperrtü arrtaimia nüriacartri Tuparrü auna icu na cürrü.

Isomosoconü nacartri Jesús

²⁸Tübupasao ocho naneneca nipiarrtri Jesús sane. Auqui sürotitü onü taman yiriturrü nauqui eanti. Süromatü isiuti artri Pedro, artri Jacobo y artri Juan. ²⁹Nauquiche tanancati Jesús meaboti, campiabo naca nisurrti y arrüna naibirrti isamunü purusubiapae, cuara. ³⁰Auquimanu paecüburuma torrü mañoñünca aparimia aübuti Jesús. Arrümanuma torrü artri Moisés y artri Elías. ³¹Tarucapae nanentacarrü itupecuma. Manitanama ümo niconcorrti Jesús, y ümo arrüna cuabotü itaquisürücüboti au Jerusalén. ³²Artri Pedro y arrübama icumpañeruturrti tarucapae nirrancarrüma anuma. Pero süsioma arrtayomatü. Sane nauquiche arrtaimia arrümanu nanentacartri Jesús, aübu manuma torrü mañoñünca auqui napepe amoncoma ichepeti. ³³Masamuña aquichoma esauiti Jesús manuma torrü. Auqui artri Pedro nanti:

—Maestro, urriampae nusaca auna. Supasamuna trerrü cüpahumanca, taman aemo, taman ümoti Elías quiatarrü ümoti Moisés.

Pero artri Pedro manitanatiatai, chütusiopü ümoti isane arrüa nanti.

³⁴Nauquiche anatiqúi manitanati Pedro, cuatü taman cüsaüborrü, itamurriqúianama. Arrübama ñanunecasartri Jesús birrubuma, itopiqui taboma eana manu cüsaüborrü. ³⁵Eanaqui manu cüsaüborrü rabotü taman manitacarrü, nantü sane:

—Artri naqui tonenti isaü. Tarucu nicuarrti iñemo. ¡Amonsotü ümoti!

³⁶Nauquiche tochencho manu manitacarrü, auqui asaramatü tato ümoti Jesús, tamantiatai. Arrüma churapoipüma isucarüti quiatarrü arrüna arrtaimia.

Bacurarati Jesús ümoti taman ñaüma

³⁷Au manu quiatarrü nanenese cuama tato onüqui manu yiriturrü. Cuamatü sürümanama macirrtianuca cümenuti Jesús. ³⁸Eanama anancati taman ñoñünrrü. Artri manitanati fuerte nurria. Nanti sane ümoti Jesús:

—Maestro, asamu nurria iñemo, apucüru itacuti cunauntaiñatiatai isaü. ³⁹Anati choborese auti. Artü cuatü ataquerrü ümoti tosibicoti uiti, y atüo ahiquiti. Yaruraüburutiti acü y chirranrrtipü aiñemecanatito.

⁴⁰ Chauqui tirranquiquia pünanaqui bama anunecasa, nauqui aicüpurumati choborese auquiti. Pero chüpuerrümpüma.

⁴¹ Auqui arrti Jesús nanti:

—Hasta caümainqui chapicococapüñü, y tarucu nomünantü aboi. Abu tücoboí niyaca abarrüpecu. ¿Hasta auchepü ñana tiene que ñasamunaunca abaübu? ¡Apiquiataunarri maniqui ñaüma!

⁴² Nauquiche sürotitü esati Jesús maniqui ñaüma, arrti choborese yaruraüburutiti tatito acü ümo quiatarrü ataquerü. Pero arrti Jesús icuansomoconotiti maniqui choborese. Y sane caüma urriancati tato maniqui ñaüma uiti Jesús. Aitorrimiatiti tato ümoti yaütoti.

⁴³ Namanaiña cütobüsoma ui arrüna sane nüriacarri Tuparrü.

Urapoiticaü tatito Jesús niconcorri

Nauquiche amoncomainqui cütobüsoma ui arrüna sane, nanti Jesús ümo bama ñanunecasarri:

⁴⁴—Amonsoi nurria arrüna sane, tapü tacürusu napaquionco: Arrüñü Ñemanauncurratoe Ñoñürrü ichorriquia ñana mecu bama mañöñunca.

⁴⁵ Pero arrübama ñanunecasarri chiyebopü uimia isane ümoche arrüna nanti. Champürrtü tütörrio ümoma nauqui entienderrüma. Birrubuma anquirioma pünanaquiti.

¿Ñacuti ane manrrü nüriacarri?

⁴⁶ Auqui arrübama ñanunecasarri uratoquioma ñacuti eanaquimia ane manrrü nüriacarri. ⁴⁷ Pero arrti Jesús tusiatai ümoti arrüna ñapensacarrüma. Iquianatiti taman ñaüma esati. ⁴⁸ Nanti ümoma:

—Arri naqui yasuriurutiti naqui ñaüma au nisüri, ta tacanarrtü yasuriurutitü ito. Arri naqui yasuriurutitü, yasuriurutitito naqui uiche aicüpurüñü. Itopiqui arri naqui chütönpatai, tonenti naqui manrrü ane nüriacarri abarrüpecu.

Arri naqui chütüboricopü oemo, urria ñaquioncorri oemo

⁴⁹ Auqui arrti Juan nanti ümoti Jesús:

—Maestro, anati taman ñoñürrü, sumasacati bacüpuruti tanene ümo bama machoboreca au nüri. Auqui prohibibo soboi ümoti, tapü asioti aisamunenti sane, itopiqui champürrtü amencoti suichepe.

⁵⁰ Auqui arrti Jesús nanti ümoti:

—Asioti saneantai, itopiqui arri naqui chütüboricopü oemo, bayurarati oemo.

Cuasoti Jacobo y arri Juan

⁵¹ Nauquiche tüsaimia manu tiempörrü nauqui aüroti tato Jesús au napese, sürotitü au Jerusalén aübu nanaiña nirrancarri. ⁵² Bacüpuruti ümo bama coreorü, nauqui ariorrüma acüsürüma au manu taman puebluma

au manu cürrü Samaria, nauqui apachema cauta arücüma manu tobirri. Süromatü. ⁵³Pero arrüabama samaritanorrü chirranrrüpüma asuriuruma, itopiqui ünantü ümoma arrüna niyücürrüma au Jerusalén. ⁵⁴Artri Jacobo ichepeti Juan nauquiche oncoimía arrüna sane, namatü ümoti Jesús:

—¿Señor, arrianca nauqui supanqui pese auqui napese, nauqui üüma bama samaritanorrü, tacana arrüna tücañe uiti profetarrü Elías?

⁵⁵Pero artri Jesús macuansomoconoti ümoma, nanti:

—Canapae tacürusu napaquionco, ta apacoconaunca ümoti Espiritu Santo, champürrtü ümoti choborese. ⁵⁶Arrüñü Ñemanauncurratoe Ñoñünrrü champürrtü isecatü nauqui itabairoma macirrtianuca, ta isecatü nauqui ataesübuma sobi eanaqui nomünantü.

⁵⁷Auqui süromatü au quiatarrü puebluma arücüma.

Arrüabama rranrrüma aüromatü isiuti Jesús

Nauquiche aboma isiu cutubiurru, tamanti ñoñünrrü nanti ümoti Jesús:

—Señor, irranca yerotü asiucü au nanaiña auna cauta naecü.

⁵⁸Artri Jesús iñumutati:

—Arrüba numantureca abe niyoporrü cütü, y arrüba nutaumanca abe niñusumenurru auna cauta apacansa. Pero arrüñü Ñemanauncurratoe Ñoñünrrü champü nipo cauta ñacansa.

⁵⁹Nantito Jesús ümoti quiatarrü:

—¡Ariacu isiuñü!

Artri iñumutati:

—Señor, yeca tanu asiucü, arrtü tücoiñoti taita.

⁶⁰Auqui nanti Jesús ümoti:

—Arrüabama chicocoropümañü tonema bama au narrtartri Tuparrü tacana coiñoma. Tari tonema bama uiche aüroma cütü bama coiño. Pero arrücü acosi uraboi nüriacartri Tuparrü.

⁶¹Auqui nantito quiatarrü ümoti Jesús:

—Señor, irranca yerotü asiucü, pero yecatü baeta ñasamu nariorrü ümo bama ipiariente au nipo.

⁶²Auqui artri Jesús urapoiti isucarüma arrüna machepecatarrü:

—Artri naqui rranrti atrabacati au ñanaunrrü pero chiñatatiñü nurria, chüpuerurrüpy aye uiti naurri ñanaunrrü. Isiatái artri naqui rranrti aserebiti auna cauta ane nüriacartri Tuparrü, tapiñ batacheboti ui maquiataca.

Bacüpuruti Jesús ümo bama setenta

10 ¹Nauquiche tübupasao nanaiña arrüna sane, artri Señor matacümamancunutito ümo bama setenta, nauqui aüromatü taiquiana torrüma auqui nanaiña poca y puebluca, arrüba nauquiche tiene que apasatiqui. ²Urapoiti isucarüma arrüna machepecatarrü:

—Ñemanauncurratoe sucanañü aume, chama arrüna iyebo au ñanaunrrü. Tapü bama matana mümanamantai. Sane nauquiche apanqui pünanaquiti naqui iyoche, nauqui acüputi bama trabajadorerrü, nauqui atama. (Arrübama choncoipü nürirrti Jesús tonema tacana ñanaunrrü. Arrübama urapoimia nürirrti Jesús tonema tacana bama matana.) ³Icüpucaño tacana arrone nobirramanca omeana nuitümüca. ⁴Tapü apacaca pusanese ausübo naumoni, ni sapaturrüpi. Tapü yabaiturrü napapariqui aübu bama apicuñucama isiu cutubiurrü. ⁵Artrü apiñatai au taman porrü, apanqui nurria ümo bama pohoso. Amucanaño sane: “Taiquiana urria nabaca uiti Tuparrü”. ⁶Artrü yasutiuma napanquiqui, urria nacarrüma. Tapürrtü chiyasutiupüma, chücurüsüopüma aboi. ⁷Artrü alojabo año au taman porrü, abasiquia acamanu. Auba y aucha arrüna torrio aume uimia. Itopiqui artrti naqui trabajador tiene que apacama ümoti. Tapü amamenca au pocatai. ⁸Artrü apiñatai au taman pueblurrü auna cauta yasuriuruma año, auba y aucha arrüna torrio aume uimia. ⁹Apacura ümo bama maunrocono artrü aboma acamanu. Amucanaño ümo bama pohoso: “Artrti Tuparrü üriabucati abarrüpecu caüma”. ¹⁰Pero artrtü apiñatai au taman pueblurrü auna cauta chirranrrüpüma asuriuruma año, amecosi isiu cayarrü amucanaño sane: ¹¹“Arrüna cütorrrü auqui naubesa pueblurrü sopicütobita cütüpüqui suipope, nauqui atusi ta ane napipüna. Pero chauqui tütusio aume, artrti Tuparrü üriabucati caüma”. ¹²Au manu nanenese nesa bacurrtacarü ñana torrio carrticurrü ümo manuma pohoso acamanu, manrrü fuerte nurria pünanaqui manu carrticurrü torrio ümo bama pohoso au manu pueblurrü Sodoma tücañe, bama tarucu nomünantü uimia.

Auqui süromatü manuma setenta.

Arrüba puebluca auna cauta chicocoromatipü Jesús

¹³Autaquisürücatat bama pohoso auqui Corazín y Betsaida. Arrübama pohoso au manio puebluca Tiro y Sidón tarucu nomünantü uimia tücañe. Pero artrtü nampü omirriante arrüba milagrorrrü taha tücañe, coboiüpü aiñorronconomacü, aibibomampü luto y manrrü tübütürü itama, na atusi ta orronrrü ümoma. ¹⁴Pero artrtü iñatai manu nanenese anche bacurrtarati Tuparrü, arraño apasutiu manrrü carrticurrü pünanaqui na genterrü auqui Tiro y Sidón. ¹⁵¿Carü arraño bama pohoso au Capernaum. Napaquioncopü tarucu manauncurrü aume, abu tiene que aupene au nusutu cürrü auna cauta aboma bama macoiñoca.

¹⁶Suraboira aume, bama nirranunecasa: Artrü oncoimia nabura, ta tacanartrtü oncoimia nisura. Y artrtü chiyasuriurumapü año, chiyasuriurupümañü ito. Artrti naqui chiyasuriurupüñü, chiyasuriurutipito naqui uiche aicüpurüñü.

Cuama tato bama setenta

¹⁷Auqui basicübücoma tato manuma setenta. Inñataimia tato esati Jesús. Tarucu nipucünuncurrüma. Namatü:

—Señor, hasta machoboreca macoconaurrüma suiñemo, arrtü supacüpuca ümoma au nürü.

¹⁸Nanti Jesús ümoma:

—Ñemanauntu arrüñü yasacatü isiuti choborese paquioti auqui napese tacanarrtü masünaca. ¹⁹Torrio sobi aume abüriacabo nauqui puerurrü apicümone onü noirroboca y onü nupataca, y nauqui apacana ümoti choborese. Champü causane uiti aume. ²⁰Pero tapü tarucapae naupucünuncu ui na ñacoconaurrti choborese aume. Aupucünu manrrü ui arrüna ane corobo nabüri au napese.

Nipucünuncurrti Jesús

²¹Au manu rratorrü tarucu nipucünuncurrti Jesús uiti Espíritu Santo. Nanti sane:

—Inñanauncü Iyaü, itopiqui ane nürüaca au napese y icu na cürrü. Arrüna nürüaca ananca anecana obi, pero caüma aitusiancata isucarü bama chitonempümantai. Tapü ümo bama tarucu nitusiquirri ümoma y bama ipiacamampae au ñaquioncorrüma aiñanecata. Sane te Iyaü, aiñata isiu narrianca.

²²'Arrti Iyaü itorrimiatati nanaiña inñemo arrüba omirriante uiti. Arrüñü Aütorrti. Champüti manrrü isuputarañü, cunauntaiñati Iyaü. Champütito naqui isuputaratiti Iyaü, cunauntaiñañüantai, arrüñü Aütorrti. Y arrüñü itusiancacati ümo bama irranca, nauqui aisuputaramatito.

²³Auquimanu asaratitü ümo bama ñanunecasarrti. Nanti ümoma:

—Urriampae nabaca, itopiqui amarrtai arrüna isamute. ²⁴Itopiqui sucanañü aume, sürümanama bama profetarrü y bama mayüriabuca tücañe rranrrüma asaraimiapü arrüna amarrtai caüma, pero charrtaiüpüma. Rranrrüma ito oncoimiapü arrüna amoncoi sobi, pero choncoipüma.

Machepecatarrü: Arrti samaritanorrü buenorrti

²⁵Tamanti manunecana nürüacarrü sürotitü esati Jesús nauqui aiñanti macocotorrü ümoti. Ñanquitioti pünanaquiti:

—Maestro, ¿causane sobi nauqui aye sobi taha au napese auna cauta champü nitacüru nisüboriqui?

²⁶Arrti Jesús inñumutati:

—¿Ura sane arrüna corobo nürüacarrü? ¿Isane arrüna lehebocü?

²⁷Nanti maniqui ñoñünrü:

—Nantü sane: Tari cuasürütü aemo Señor, naqui Tuparrü, aübu nanaiña nausasü, aübu nanaiña nausüpü, aübu nanaiña nacusüu y aübu nanaiña naquionco, y tari cuasürütü aemo asüborisapa tacana arrüna nacua aemoantoe.

²⁸Auqui nanti Jesús ümoti:

—Tusio nurria aemo. Arrtü aisamute arrüna sane, iyebo obi auna cauta champü nitacüru nasüboriqui.

²⁹Tapü arrti maniqui maestro rranrrti acanati ui ñanitacarrrti. Nanti ümoti Jesús:

—¿Ñacutipü naqui isüborisapa, naqui tiene que acuasürüti iñemo?

³⁰Auqui urapoiti Jesús arrüna sane isucarüti:

—Tamanti ñoñünrrü sürotitü auqui Jerusalén au Jericó. Isiu cutubiurrü enoti ui bama macusüpüca. Iquiaübutama pünanaquiti nanaiña arrüna ane uiti, hasta naibirri sürotü uimia. Ipubairomati. Auqui besüburuma. Onconoti uimia simia niconcorrrti. ³¹Rrepenteatai cuati taman sacerdoterrü isiuqui manu cutubiurrü. Asaratitü ümoti maniqui ñoñünrrü acü. Champü nümoche uiti. Pasaotiatai. ³²Tücoboi pario niyücürri, pasaotito auquimanu taman ñoñünrrü levitarrü. (Arrübama levitarrü ayuranterrüma au niporrrti Tuparrü.) Asaratitü ümoti maniqui ñoñünrrü acü. Pasaotito. ³³Auqui cuati taman ñoñünrrü samaritanorrrü isiuqui manu cutubiurrü. (Arrübama samaritanorrrü chücuasürüpüma ümo bama israelitarrü.) Nauquiche asaratitü ümoti maniqui ñoñünrrü acü, pucürusuti itacuti. ³⁴Sürotitü esati. Acurati ümo manio nobüriturrrü ümoti ui nasaite y vinorrrü. Aicümurriancati manio obürio. Auqui aiquiamperotiti chacu niyaburrrti bururrrü. Aürotitü aübuti auna cauta ane alojamientorrrü. Acamanu bacuirarati itacuti. ³⁵Au manu quiatarrrü nanenese tirranrrti aürotitü maniqui samaritanorrrü. Bapacarati torrrü monedarrü ümoti maniqui esache alojamientorrrü, y nanti ümoti: “Acuira itacuti naqui ñoñünrrü. Arrtü bacarrtarati manrrü apünanaquicü, rrapacaca aemo, arrtü yapasaca tato auquina”.

³⁶Auqui ñanquitioti Jesús pünanaquiti maniqui maestro:

—¿Ñacuti eanaqui manuma trerrü isamutenti urria ümoti manqui obürio ümoti, tacana ümoti ñemanauncurratoe isüborisapatarrrti?

³⁷Nanti:

—Arrti maniqui pucürusu itacuti.

Auqui nanti Jesús ümoti:

—Acosi aisamune isiu.

³⁸Sürotitito Jesús. Iñataiti au manio poca. Acamanu ane taman päürü nürirri Martarrü. Yasuriuruti au niporrrü. ³⁹Ane ito naruquirri, nürirri Mariarrü. Arrüna Mariarrü tümonso esati Jesús, nauqui onsaperio ñanunecacarrrti. ⁴⁰Tapü Martarrü ananca aübu tarucapae yachücoi au porrrü. Auqui sürotü esati Jesús, nantü ümoti:

—Señor, ¿champü nümoche obi na tamañü rratrabacaca? Aicüpu na nisariqui, nauqui ayura iñemo.

⁴¹Pero arrti Jesús iñumutati nurarrü, nanti ümo:

—Marta, Marta, arrücü tarucapae penarrü obi iyo arrüna ausüratia nachücoi. ⁴²Pero sucanañü aemo, ane arrüna manrrü urria bachücoboibo: oñonsaperio nurarrti Tuparrü. Arrüna Mariarrü naruqui iyebo uirri arrüna manrrü urria, champüti puerurrü aiquiaübu pünanaqui.



(Lc. 10.42)

Meancarrü

11 ¹Taman nanenese anancati Jesús meaboti. Chauqui neancarrti, tamanti eanaqui bama ñanunecasarrti nanti ümoti:

—Señor, aiñununecasa somü nauqui sopipia sopean. Arrtito Juan Bautista manunecanati tücañe ümo bama ñanunecasarrti nauqui aipiama eama. ²Arrti Jesús nanti ümoma:

—Arrtü apearca, amucanaño sane:

Suiyaü, aca au napese.

Tari anaunrrü nüri.

Üriabusü suiñemo.

Tari urrianena isiu narrianca auna acü, tacana au napese.

³Ache sumutuburibo naneneca.

⁴Airrimiaca tato nomünantü soboi, tacana arrüsomü sopirrimiacata ümo bama churriampü uimía suiñemo.

Tapü acheca suiñemo macocotorrü. Acuira suichacu ñünana nomüantü.

⁵Auqui nantito Jesús ümoma:

—Supi arrtũ anatiipũ taman abuturuqui anati nesarrti amigorri. Cũmuinta tobirri sũrotitũ au niporrti, nanti ũmoti: “Saruqui, aprerrta iñemo trerrũ cuñapecu, ⁶itopiqui iñataiti taman yobo taha au nipo auqui nesarrti viajerrũ. Champũ isane sobi nauqui yasaparati”. ⁷Y arrti maniqui anatipo iñumutati sane: “Tapũ asiquia isuatañũ. Charrtaipũ tururrũ amana y arrũbama isaĩ namanaiña aboma rrupeuñũ. Chũpuerrũpũ rratũrai yaprerrta aemo.

⁸Auqui nanti Jesũs ũmo bama ñanunecasarrti:

—Chirranrrtipũ atũraiti nauqui acheti ũmoti arrũna manquioti pũnanaquiti. Pero au nitacũrurrũ atũraiti. Isamutenti sane, champũrrtũ ui na amigorrti ũmoti, ta nauqui tapũ asiotti icuatati. ⁹Sane nauquiche sucanañũ aume: Apanqui pũnanaquiti Bae Tuparrũ, y arrti bacheboti aume. Apapache, auqui tabũco aboi. Apiyotobai tururrũ, auqui aurũbo aume. ¹⁰Itopiqui arrti naqui manquio, torrio ũmoti. Arrti naqui bapachero, tabũco uiti. Arrti naqui iyotobaita tururrũ aurũbo ũmoti.

¹¹Arraño mañoñũna ÷aensapũ apacheca canrrũ ũmoti aubaũ, arrtũ manquioti pan? Arrtũ manquioti amopũnanaqui nopiocorrũ ÷aensapũ apacheca ũmoti noirroberrũ? ¹²Arrtũ manquioti naũbosi curasũrrũ ÷aensapũ apacheca ũmoti nupatarũ? ¹³Arraño malorrũ te año, abu ta apiipaca apache arrũna urria ũmo bama aubaũtaiqui. Pero manrrtiatai Aubaũ naqui anati au napese ipiacati acheti aume arrũna urria. Icũpurutiti Espĩritu Santo au nausasũ bama manquiomu.

Arrũna nauquiche nũriacarrti Jesũs

¹⁴Arrti Jesũs anancati bacũpuruti ũmoti choborese auquiti taman ñoñũnrrũ, naqui chũpuerrũpũ anitati uiti. Nauquiche tũsũrotitũ auquiti, auqui caũma puerurrti tato anitati. Cũtobũso genterrũ ui arrũna sane isamutenti Jesũs. ¹⁵Pero aboma ito bama namatũ:

—Arrti naqui Jesũs bacũpuruti ũmo bama machoboreca au nũrirrti Beelzebũ (Satanás), naqui ũriatu bama machoboreca.

¹⁶Maquiataca bacheboma macocotorrũ ũmoti Jesũs. Manquiomu pũnanaquiti taman señañũ auqui napese. ¹⁷Pero arrti Jesũs tũtusiatai ũmoti arrũna ñapensacarrũma. Iñatati machepecatarrũ ũmoma, nanti:

—Supi arrtũ ane taman nación, y arrũbama mayũriabuca bahiyoma ũmomantoe. Contoatai iñarrio manu nación. Sane ito arrtũ tũboricomantai ũmomantoe bama pohoso au taman porrũ, iñarrio ito manu familiarrũ. ¹⁸Sane ito arrti Satanás arrtũ bahiyoti ũmotiatoe, chũpuerrũpũ urura nũriacarrti. Sucanañũ arrũna sane, itopiqui arraño amucanaño iñemo, que rracũpuca ũmo bama machoboreca au nũrirrti Satanás. ¹⁹Arrtũ ñemanauntupũ rratrabacaca aũbuti Satanás, ÷carũ arrũbama apanuecasa, quitipũ naqui ũriacache arrũna uiche puerurrũma acũpuma tanene ũmo machoboreca? Uramapũ sane ũmo arrũna sane napanitaca iñemo? ²⁰Pero ñemanauntu, arrũñũ rracũpuca ũmo machoboreca ui nũriacarrti Tuparrũ. Ui arrũna sane chauqui tũtusio aume que tũriabucati Tuparrũ abarrũpecu.

²¹‘Suraboira ausucarü arrüna quiatarrü machepecatarrü: Supi arrtü anati taman ñoñünrrü bien cusüuruti y ane nanaiña nicomerri uiche ocümati itacu nenarrirrti, arrüna ane ahüburu uiti. ²²Pero arrtü cuati naqui manrrü cusüuruti pünanaquiti, y macananati ümoti, auqui caüma iquiaübutati pünanaquiti nanaiña arrüna nicomerri, arrüna ümoche oncotitü. ²³Itopiqui arrti naqui chocümanapü ichacuñü, tüboricotiatai iñemo. Arrti naqui chübatasurupü ümo macrirrtianuca isiuñü, iñarrimiacatati arrüna omirria.

Basücübücoti choborese tato au niporrti

²⁴‘Arrtü sürotitü choborese auquiti taman ñoñünrrü, sürotitü tanu, amencotiatai. Bapacheroti auna cauta acansati. Arrtü champü tabüco uiti, aquionotiyü auna cauta anancati tücañe. Auqui nanti ümotiatoe: “Yeca tato au nipo, auna cauta anancañü tücañe”. ²⁵Arrtü iñataiti tato, icuñunutiti maniqui ñoñünrrü tacana arrone porrü sunucunu auquipo, bien coñocono. ²⁶Auquimanu sürotitü acanti ümo bama siete maquiataca machoboreca uüboti manrrü. Manrrü ünantatai nacarrüma pünanaquiti. Süromatü avivimia auti maniqui ñoñünrrü. Arrti maniqui ñoñünrrü caüma manrrü ünantatai nisüboriquirrti pünanaqui tücañe.

Arrüna uiche urria nusaca

²⁷Arrti Jesús manitanatiqui arrüna sane. Auqui taman paürrü eana manu genterrü tosicobo, nantü:

—iUrriampae naca manu paürrü arrüna uiche aca icu cürrü, arrüna uiche aisunauncunü!

²⁸Pero arrti Jesús nanti ümo:

—Pero manrrü urriampae naca bama oncoi nurarri Tuparrü y isamutema isiu.

Manquioma milagrorrü

²⁹Iyoberabaramanquicü macrirrtianuca itupecuti Jesús. Auqui manitanati ümoma, nanti sane:

—Caüma arrüna tiemporrü arrüna genterrü bien malorrü. Manquio taman señarrü auqui napese. Pero chütorriopü ümo, cunauntaiñantai manu señarrü apüti profetarrü Jonás tücañe. ³⁰Ta arrti Jonás señarri tücañe ümo bama pohoso au manu pueblurrü Nínive. Arrüñü Nëmanauncurratoe Ñoñünrrü isiatai señarrüñü ümo bama macrirrtianuca arrüna tiemporrü caüma. ³¹Arrümanu ito paürrü nüriaburrü auqui tauna ümo mancarrü atüraiyo ñana au manu nanenese nesa bacurrtacarrü. Uirri urapoi nipüinate genterrü nesa arrüna tiemporrü caüma, itopiqui tone cuatü tücañe auqui iche nauqui onsaperio ñanunecacarrti Salomón, naqui yüriaburrü. Pero arraño caüma chaurrianapü apicocoroñü, abu arrüñü manrrü nisüriaca pünanaquiti Salomón. ³²Au manu nanenese nesa bacurrtacarrü ñana arrümanuma mañoñünca auqui manu pueblurrü Nínive atüriayoma. Uimia urapoimia nipüinate genterrü nesa na tiemporrü caüma.

Itopiqui arrüma tücañe iñorronconomacü, numo anancati Jonás manunecanati ümoma, tapü asioma aübu arrüna churriampü nisüboriquirrimia. Arraño caüma chaurriancapü apicocoroñü, abu arrüñü manrrü nisüriaca pünanaquiti Jonás.

Machepecatarrü: Nubasaru

³³Champürrtü uiñonocota basarurrü nauqui uiñaneca, o nauqui uitamurriquia, ta nauqui uiña ape, nauqui acuapo ümo bama cuamatüpo. ³⁴Arrüna nosüto tacana basarurrü ümo nocütüpi. Arrtü omirriantai nosüto, ta nanaiña nocütüpi ane au nanentarrü. Pero arrtü chomirriampü nosüto, usaca tacana au tomiquianene. ³⁵Arrüna nirranunecaca tacana basarurrü. Apacuire nurria itacu, tapü ensoro amopünanaqui, itopiqui arrtü ensoro, ta abaca au tomiquianene. ³⁶Arttö iyebo aboi nirranunecaca, abaca tacana au nanentacarrü. Auqui caüma amarrtai nanaiña arrüba omirria, tacanarrtü cuara aume ui basarurrü.

Manitanati Jesús ümo bama fariseorrü y ümo bama manunecana nüriacarrü

³⁷Chauqui ñanitacarrti Jesús, tamanti fariseorrü itasurutiti au niporrti, nauqui aati. Sürotitü Jesús. Aiñanainti au niporrti. Besüro uiti esa mensarrü. Atümoti. ³⁸Artri maniqui fariseorrü cütobüsoti ui arrüna sane arrtaiti, itopiqui champürrtü icocotati Jesús arrüna bacüpucurrü uimia, nauqui entunumiti antes que aati. ³⁹Pero artri Señor nanti ümoti:

—Arraño bama fariseorrü apiyarrübita nurria basoca y pratuca, tapü arrüba napapensaca au nautusi omünantatai, naurrianca apacusüpi. ⁴⁰¡Sonsorraño! ¿Taqui chütusiopü aume que artri naqui isamutenti nocütüpi isamutentito nuyausasü? ⁴¹Arraño apacumanaca ümo bama poberrü. Mejor apiquiaübu arrüba nomünantü auqui nabausasü. Sane nauqui querabo urriantai nausüboriqui.

⁴²'Autaqisürücatai arraño bama fariseorrü. Apacheca ümoti Tuparrü taman uturuqui diez nasu menta y ruda y nasu nanaiña piquiataca plantamanca, arrüba umate. Pero champü nümoche aboi arrüna ñemanauncurratoe bacurracarrü aübu genterrü. Chücuasürütipü Tuparrü aume. Tonempü tiene que apisamute primero. Auqui caüma puerurrü ito apisamune isiu manio piquiataca bacüpucuca.

⁴³'Autaqisürücatai arraño bama fariseorrü, itopiqui aurrianca autümo icu ba tümoca ümo nisurratoe au ba poca sinagoga. Aurrianca ito nauqui namanaiña rrespetaboma aume, y anquimia nurria aume isiu cayaca.

⁴⁴'Autaqisürücatai, itopiqui arraño tacana nicü bama coiño, y arrübama macrirrtianuca pasaoma onüqui y chütusiopü ümoma que tone.

⁴⁵Auqui artri maniqui taman maestro ümo nüriacarrü nanti ümoti Jesús: —Maestro, ui arrüna sane nura canapae anitaca suiñemo ito churriampü.

⁴⁶Auqui artri Jesús nanti ümoti:

—Autaqisürücataito arraño bama manunecana nüriacarrü. Itopiqui apacüpuca nauqui aisamunema bama macrirrtianuca isiu napacüpuca fuerte nurria, abu arraño chapicocoquiompü pario.

⁴⁷Autakisürücatai arraña, itopiqui na apicoñocota nicürüma bama profetarri tücañe, itopiqui coiñoma tücañe ui bama antiburri aubaütaiqui. ⁴⁸Ui arrüna sane tacanarrü tütusio que arraña urriantai aume arrüna isamutema bama antiburri. Arrüma batabaiyoma ümo bama profetarri, y arraña apicoñocotama nicürüma.

⁴⁹'Sane nauquiche arrti Tuparrü au ñapensacarri nanti sane: "Rracüpara ümo bama profetarri y ümo bama apostolerrü aume, pero uturuquimia, arraña apitabaiquiama, y abaca ito isiu bama sobürau ui nautübori ümoma". ⁵⁰Sane nauquiche caüma arrti Tuparrü ñanquitioti amopünanaqui noto bama taborioma tücañe auqui numo maübo urriane na cürü, ⁵¹auqui niconcorri Abel hasta niconcorri Zacarías, naqui taboriote esa altar au niporri Tuparrü. Suraboira nurria: Artti Bae Tuparrü ñanquitioti noto bama taborioma tücañe pünanaqui na genterrü arrüna tiemporrü caüma.

⁵²'Autakisürücatai arraña bama manunecana nüriacarrü. Arraña chaurriancapü amoncoi nisura. Arttö aurriancapü, puerurrü aye aboi esati Tuparrü. Pero chichebopito aboi nauqui aye ui bama maquiataca, tacanarrü apiquiaübuta niyabe nituru napese.

⁵³Nauquiche nanti Jesús arrüna sane, arrübama manunecana nüriacarrü y arrübama fariseorrü tüboricoma nurria ümoti. ⁵⁴Auqui caüma tarucapae yapariquirrimia aübuti, nirrancarrüma nauqui anitati uimia arrüna churriampü, nauqui puerurrü urabomati.

Tapü uirruca usuraboi nürirrti Cristo

12 ¹Auna cauta anancati Jesús ññataimia sürümanama macirrtianuca, hasta que isimianamacü uirrimiantoe. Auqui artti Jesús manitanati primero ümo bama ñanunecasarri, nanti ümoma sane: —Amasasai nurria ññunana ñanunecacarrüma bama fariseorrü y ññunana ñapanturrüma. ²Itopiqui champü arrüna anecana ñana; nanaiña tiene que atusi. ³Arrüna anecanatai amucanaño, nanaiña caüma tusiatai tanu.

⁴'Sucanañü ito aume bama amigorri —nanti Jesús—, tapü aupirruca ññunana bama itabaitama arrüna cürü nocütüpü, pero champü manrrü causane uimia oemo, chüpuerurrüpü aitaibaimia nuyausüpü. ⁵Pero suraboira ausucarü ññunanache tiene que aupirru: Ta ññunanati Tuparrü, naqui puerurrü aiquiaübuti nosüboriqui, y ane ito nüriacarri nauqui aipenenoti oñü au infierno. Ññunanati te tiene que uirru.

⁶'Mapaventecaca cinco nutaumanca itobo torratai monedarrü, pero ta chütacürusupü ñaquiocorri Bae Tuparrü yubapa. ⁷Sane ito arraña, hasta niqui nautanu mupacümuncunu uiti Bae Tuparrü taiquiana taman. Sane nauquiche tapü aupirruca. Arraña manrrü aucuasürüca ümoti pünanaqui sürümana nutaumanca.

⁸'Arrüñü Ññemanauncurratoe Ññünrrüñü. Arrübama urapoi isucarü genterrü que icocoromañü, arrüñü ito surapoi isucarü bama angelerrü esati Tuparrü que tonema nirrannunecasa. ⁹Tapü artti naqui mapaña

isucarü genterrü que chisuputaratipüñü, arrüñü ito surapoi ñana isucarü bama angelerrü esati Tuparrü que chütonentipü nirranunecasa.

¹⁰Artri naqui manitana churriampü iñemo, puerurrü arrimiaca tato nomünantü uiti, arrtü iñorronconotiyü. Tapü artri naqui manitanati churriampü ümoti Espíritu Santo chüpuerurrüpü ane marrimiacatarrü ümoti.

¹¹Artri iquianama año au ba poca sinagoga, o esa bama mayüriabuca, nauqui acurrutama abaübu, tapü apapensaca iyo arrüna causane nauqui apanita autacuatoe. ¹²Itopiqui artri Espíritu Santo bacheboti aume apanitacabo isucarüma au manu horarrü.

Tapü oñoncatü ümo noñenarri

¹³Tamanti eanaqui manu genterrü nanti ümoti Jesús:

—Maestro, ucanü ümoti saruqui, tari itorrimianati iñemo arrüna tocabo iñemo eanaqui nenarrirrti suiyäü, naqui coiño.

¹⁴Auqui aiñumuti Jesús, nanti:

—Arraño aurrianca apiñanañü tacanati yüriaburrü, nauqui chepesüro sobi namenarri, abu chümopü isetü icu na cürrü.

¹⁵Nantito ümoma:

—Amasasai nurria ñünana arrüna naurrianca iyo nenarriquia. Arrüna urria nosüboriqui champürrtü ane oboi ba ausüratai noñenarri.

¹⁶Auqui urapoiti isucarüma arrüna sane:

—Anati taman ñoñünrrü rricurrti. Ane chama niyorrti y iyebo nurria ümoti arrüna süro cütü uiti. ¹⁷Auqui mapensarati: “¿Causane sobi caüma? Champü cauta iñahübu arrüna niyesa cosecharrü”. ¹⁸Auqui mapensarati nurria: “Chauqui tütusio iñemo causane sobi —nanti—. Iñarrimiacana nanaiña arrrüba nisüru y poca cauta ahübu. Isamunena manrrü sürümanarrü. Acamanu caüma iñahübuta nanaiña niyesa cosecharrü. ¹⁹Auqui caüma sucanañü iñemoantoe: “Ane nanaiña iñemo. Ane ahüburu ñome sürümana añoca. Ñacansara, irrara, ichara y ñasamune ito piertra”. ²⁰Auqui artri Tuparrü nanti ümoti: “Tarucu nasonsoco, ñoñünrrü, itopiqui caüma na tobirri aconca, y arrüna ane ahüburu obi, ¿quitipü ümoche caüma?” ²¹Sane pasabo ümoti naqui amontonabo uiti enarriboti, pero au narrtartri Tuparrü pobrerriatai.

Tapü ane penarrü osoi

²²Auqui nanti Jesús ümo bama ñanunecasarrti:

—Sucanañü aume, tapü ane nümocheapae aboi arrüna amutuburibo y abaibibo. ²³Arrüna nosüboriqui manrrü valeo pünanaqui arrüna uñutuburibo. Arrüna nocütüpü manrrü valeo pünanaqui nusahibi. ²⁴Amasasai arrüba norrürtica nirri turri. Champürrtü pancüturu, ni cosechabohiompü, ni anempü cauta apahübu. Pero artri Tuparrü bacheboti ñome umutuburibo. Arraño manrrü te aucuasürüca pünanaqui nutaumanca. ²⁵¿Taqui puerurrü ausunaun pario ui arrüna tarucapae penarrü aboi iyo nausüboriqui? No, chüpuerurrüpü, ni medio metro ausunaunca

uirri. ²⁶Así que tütusio aume que chüpuerurrüpi apisamune arrüna chimiantai. Sane nauquiche tapü ane penarrü aboi iyo piquiataca manrrü chama.

²⁷Amasasai causane niñusunaun püsioaca. Champürrtü patrabacara, ni apaiñapü. Sucanañü aume: Arrti yüriaburrü Salomón tücañe chama nenarrirrti, pero ni anempü naibirrti tacana nubaibiqui manio püsioaca coñorrtai. ²⁸Arrti Tuparrü bacheboti iyusubu ba narrüchopüro coñorrtai, arrüba abe eana rroense caüma, y tubaca botüsüro, sürobo au horno nauqui amoho. Pero manrrü te bacheboti abaibibo, arraño bama chamoncapütü nurria ümoti. ²⁹Sane nauquiche tapü tarucapae napapensaca iyo arrüna amutuburibo y arrüna nauqui aucha. ³⁰Itopiqui arrüna genterü icu na cürrü toneantai ñapensacarrü. Pero arraño chauqui tanati taman naqui Aubai au napese. Tütusiatai ümoti arrüna naurriantümo. ³¹Apiña nurria, nauqui apicoco nüriacarrti Tuparrü. Auqui caüma torrio aume nanaiña arrüna naurriantümo.

Arrüna noñenarri au napese

³²Tapü aupirruca bama mümanamantai nirranunecasa. Arrti Tuparrü rranrrtiatai nauqui ane nabüriaca ñana ichepeti. ³³Apipiaventeca arrüna ane aboi. Apacumana ümo bama champü isane ümoma. Auqui caüma ane quiatarrü naca namenarri au napese auna cauta chiñataitipi cusüpürrü, ni aiñanaipü nirrirri, nauqui aiñamesoco. ³⁴Itopiqui arrüna cauta ane namenarri, tone arrüna ümoche napapensaca.

Chauqui nocobori cümenuti Señor

³⁵Urapoitito Jesús arrüna machepecatarrü:

—Aucobori ümo trabacorrü aübu naubasarü omo. ³⁶Apisamuse tacana bama mamosoca barrüperarama cümenuti Señor, arrtü cuati tato, nauqui aiyaübuma tururrü cümenuti, arrtü tiñataiti tato auqui pierrta tübübürrü, y iyotobaitati tururrü. ³⁷Urriampae naca bama mosorrü tabüro tüchauqui nicoborirrimia, arrtü tiñataiti tato naqui Señor. Ñemanauncurratoe, uiti Señor caüma tümonsoma esa mensarrü, y arrti campiabo naibirrti nauqui aserebiti ümoma. ³⁸Rrepente iñataiti cümüinta tobirri, o cuatü nanenese. Urriampae nacarrüma bama mosorrü, itopiqui tüchauqui nicoborirrimia.

³⁹Amonsoi arrüna quiatarrü machepecatarrü: Arrtü tusiopü ümoti naqui ipoche isane horarrü iñataiti cusüpürrü, chüpuerurrüpi anuti, nauqui tapü cusüpioti auqui niporrti. ⁴⁰Sane ito arraño tiene que aparrüpera isumenuñü, itopiqui arrüñü Ñemanauncurratoe Ñoñünrrü cualquier horarrü iseca tato ñana, y arraño chütusiopü aume. Autabücatai.

⁴¹Auqui arrti Pedro ñanquitioti pünanaquiti Jesús:

—¿Señor, aiñata suiñemoatai arrüna machepecatarrü, o ümo namanaiña?

⁴²Aiñumuti Señor ui quiatarrü machepecatarrü:

—Arrti taman patrón sürotitü auqui niporrti. Onconoti taman mosorrü uiti, naqui oncotitü nurria ümoti, nauqui acheti tuburibo bama maquiataca mamosoca

naneneca. ⁴³Urriampae nacarrti naqui mosorrü, arrtü nanaiña icocotati arrüna yacüpuccurrti patrón ümoti. ⁴⁴Sucanañü aume: Arrti maniqui patrón iñanatiti nauqui asaratiti itacu nanaiña nenarrirrti. ⁴⁵Pero supi arrtü mapensarati maniqui mosorrü que chücontopü aiñanainti tato patrón, auqui caüma bacheboti chacu bama maquiataca mamosoca y ümo ba cumanacaca. Y arrti caüma basoti bien, chaboti y osisübaboti. ⁴⁶Auqui arrti patrón iñatiti tato au manu nanenese, y arrti maniqui mosorrü tabücotiatu uiti. Auqui caüma bacheboti patrón tarucapae carrticurrtü ümoti, iñanatiti ichepe bama chümacoconaurrüpü.

⁴⁷Arrti naqui mosorrü tusio nurria ümoti yacüpuccurrti Señor, pero ta champürrtü icocotati ni aisamunentipü, tonenti naqui carrticaboti nurria uiti Señor. ⁴⁸Tapü arrti naqui mosorrü chütusiopü ümoti arrüna yacüpuccurrti Señor, y isamutenti arrüna churriampü, tonenti carrticaboti pariatu. Ta arrti naqui torrio ümoti chama ipiacaboti uiti Tuparrü, chama ito manquiotti pünanaquiti.

Itopiquiti Jesús ane bahiquirri icu cürrü

⁴⁹Nantito Jesús:

—Isecatü auqui napese nauqui iñaurrimia pese. Tirrancatai yasarai nonco manu pese. (Arrüna pese tone arrtü coiñoti Jesús, y arrtü aboma bama icocoromati au nanaiñantai.) ⁵⁰Pero antes que urriane sobi nanaiña, tiene que ayetü iñemo tarucapae taquisürücürü, cheperrtü cocono sobi nanaiña. ⁵¹Arraño napaquionco isetü nauqui urria nacarrüma bama macirrtianuca aübumantoe, abu chüsanempü. Ta isecatü nauqui sobi ane bahiquirri icu na cürrü. ⁵²Itopiqui auqui caüma uratoquioma eana familiarrü auqui niyaca. Arrtü aboma cinco au taman porrü, trerrüma aboma tüboricoma ümo bama torrüma y bama torrüma ümo bama trerrü. ⁵³Arrti yaurrü tüboricoti ümoti yäütoti. Arrti ñoñünrrü toboricoti ümoti aütorrti. Taman paürü tüborico ümo nichechese, y cupiquirri tüborico ümo nipiaparrü. Ane paürü tüborico ümo nicupiquiturrü, y ane cupiquirri tüborico ümo nipiaparrtorrü.

Señarrü nesa na tiemporrü

⁵⁴Nantito Jesús ümo genterrü:

—Au na cürrü arrtü amasaquio cuantio cüsaüböca tape auqui nimümürü, amucanaño: “Rrobeoca caüma”, y sane cocono. ⁵⁵Y arrtü bausücüro auqui mancarrü amucanaño: “Peco caüma”, y sane cocono. ⁵⁶Arraño mañapanca. Amarrtai napese sane, tusio aume uirri arrtü rranrrü arrobo o arrtü peco. ¿Causane chamarrtaipito isane ümoche arrüna pasabo arrüna tiemporrü caüma ausucarü?

Tiene que uirrimiaca tato aübuti quiatarrü

⁵⁷¿Causane chütusiopü aume aboiyapatoe isane arrüna urria, nauqui apisamune? ⁵⁸Suraboira quiatarrü machepecatarrü ausucarü: Supi arrtü anati naqui masamunuti chürüri aemo. Rranrrti aiqianatiyü esati Yüriaburrü

na urabotiyü. Aiña nurria, aiñarrimiaca tato aübuti isiu cutubiurrü antes que aiñanai esati Yüriaburrü. Itopiqui arrtü aiñatai uiti esati, arrti caüma itorrimianatiyü mecuti policiarü, y uiti caüma aecatü au preso. ⁵⁹Sucanañü aemo, chüpuerurrüpü ataesübu auqui preso, cheperrrü apacaca nanaiña nebequi.

Tiene que uiñorroncono oñü

13 ¹Au manio nananeca iñataimia esati Jesús mañoñünca. Uraboimia isucarüti causane uiti yüriaburrü Pilato ümo manuma mañoñünca auqui manu cürrü Galilea. Ta taborioma uiti, numo macumananama numuquianca ümoti Tuparrü au niporrti Tuparrü. Arapara notorrüma ichepe nomoto manio numuquianca. ²Arrti Jesús nanti ümoma:

—Arraño napaquionco que pasao sane ümo bama auqui Galilea, itopiqui arrüma ane manrrü nomünantü uimia pünanaqui bama maquiataca pohoso taha. ³Pero sucanañü aume, arraño arrtü chapñorroncocañöpü, pasao aume isiatai tacana ümoma. ⁴Amoncoi ito nüri manuma dieciocho mañoñünca, coiñoma nauquiche taübüco onüma manu torerrü au Siloé saimia Jerusalén. Napaquionco caüma pasao ümoma sane, itopiqui ane manrrü nomünantü uimia pünanaqui bama maquiataca pohoso au Jerusalén. ⁵Pero sucanañü aume, arraño arrtü chapñorroncocañöpü, pasao aume isiatai.

Carrtigabo oñü uiti Tuparrü arrtü chücoñoconopü nosüboriqui

⁶Urapoitito Jesús isucarüma arrüna machepecatarrü:

—Tamanti ñoñürrü mancüturuti taman suese higuera au niyorrti. Numo túsunaun, sürotitü asaraiti, arrtü ütau. Pero champü nütarrrü. ⁷Auqui nanti ümoti maniqui bacuirara itacu niyorrti: “Tabe trerrü añoca nisequi yapache nüta na suese, pero ta champü. Aitüsüna, itopiqui champü nümoche ane auna”. ⁸Auqui nanti maniqui bacuirara itacu ñanaunrrü: “Señor, asio sane na suese arrünainqui añorrrü. Icüncana cürrü y yachera naha bacarrü itupecu. ⁹Auqui caüma rrepente ütao. Perorrtü champü, auqui caüma túsüro”.

Bacurarati Jesús au nanenese nesa macansacarrü

¹⁰Taman nanenese nesa macansacarrü anancati Jesús manunecanati au taman porrrü sinagoga. ¹¹Acamanu ananca manu paürrü tütabe dieciocho añorrrü ñaunrrococorrü uiti choborese. Poboro, chüpuerurrüpü aipesünacanü. ¹²Nauquiche asaratitü Jesús ümo manu paürrü, itasutati y nanti ümo:

—Rracurara aemo, paürrü.

¹³Auqui iñatati neherrti onü. Auquimanu urriante tato manu paürrü, y puerurrü abesü tato. Auqui iñanaunuti Tuparrü, machampiencana ümoti.

¹⁴Pero arrti maniqui yüriaburrü au manu sinagoga tüboricoti, itopiqui bacurarati Jesús au manu nanenese nesa macansacarrü. Nanti ümo genterrü:

—Abe seirri naneneca nauqui batrabaca. Au manio naneneca puerurrü abetiü nauqui curabo año. Pero au na nanenese nesa macansacarrü churriampü.

¹⁵Auqui nanti Señor ümoti:

—iÑapanrrüci! ¿Aensapü chapisoquisünatapä naupabu buyese y naupabu bururrü au na nanenese nesa macansacarrü, nauqui amenotiü apichamanio turrü? ¹⁶Tapü arrüna päürrü auqui nesarrti familiarrü Abraham tütabe dieciocho añorrü nacarrü tacana tomoeno uiti choborese ui norrocorrü. Urriantai te isoquisüna au na nanenese nesa macansacarrü.

¹⁷Ui arrüna nurarrti Jesús sane, namanaiña cüsoboma, bama tüborico ümoti. Pero arrüna genterrü pucünüña ui arrüna arrtaimía y ui arrüna isamutenti Jesús.

Machepecataca: Niyo mortasa y levadura

¹⁸Manunecanati Jesús ümoma, nanti:

—¿Tacanachepü naca arrünarrtü üriabucati Tuparrü oemo? ¿Aübuchepü ichepeca? ¹⁹Ta tacana arrone niyo mortasa. Tamanti ñoñünrrü iñatati cütu au niyorrti. Auqui ubaüro, sunaun cheperrtü sürümanarrü suese. Cuantio nutaumanca pasumenunu apü nipiarrü.

²⁰Nantito Jesús:

—¿Aübuchepü ichepeca arrünarrtü üriabucati Tuparrü oemo? ²¹Ta tacana arrone levadura, arrüna süro eana tubarrirri ui taman päürrü, cheperrtü nanaiña manu masa tusabo uirri.

Tururrü tunumusiñatai

²²Artri Jesús niyücürriiqui au Jerusalén. Pasaoti auqui manio puebluca y poca, ñanunecarrti ümo bama pohoso, niyücürri au Jerusalén.

²³Tamanti ñanquitioti pünanaquiti:

—¿Señor, taqui mümanamantai bama taesüburuma eanaqui nomünantü? Iñumutati Jesús ui machepecatarrü apü tururrü:

²⁴—Tari apapasa auqui manu tururrü tunumusiña. Sürümanama bama rranrrüma aüromatü auqui, pero chüpuerurrüpi.

²⁵Artri naqui ipoche atüraitü nauqui aiñamati ñana. Tapü arraño caüma abaca türiüpo. Apiyotobaita tururrü, amucanaño: “Señor, aiyaiübu naturu suiñemo”. Auqui iñumutati: “Chütusiopü iñemo auquiche año”. ²⁶Auquimanu caüma amucanaño: “Amonco somü subaca aübücü y suichaca ito. Anunecaca suiñemo isiu cayaca au sobesa pueblurrü”. ²⁷Auqui iñumutati tatito: “Chauqui túsucanañü aume, chütusiopü iñemo auquiche año. Amecosi auquina yesaquiñü namanaiña bama apisamute nomünantü”. ²⁸Abareoca caüma. Botoquio namo ui arrüna amasacatü ümoti Abraham, ümoti Isaac, ümoti Jacob y ümo namanaiña bama profetarrü, aboma auna cauta üriabucati Tuparrü, tapü arraño taupeneca türiüpo. ²⁹Itopiqui cuamatü macrirrtianuca auqui maquiütürrü, y auqui mancarrü, auqui tansürü y auqui nimümürrü, nauqui atümoma aama auna cauta ane nüriacartri Tuparrü. ³⁰Sane arrübama

chütonempatai au napaquionco, caïma cusürüboma ñana aye uimia esati Tuparrü. Tapü arrübama sürobotü au napese au napaquionco chiyebozü uimia.

Sucheboti Jesús itacu Jerusalén

³¹Arrümanu nanenese iñataimia manuma fariseorrü esati Jesús, namatü ümoti:

—Acosi auquina, itopiqui arrti Herodes rranrrti aítabajotiyü.

³²Artri Jesús iñumutati nurarrüma:

—Amecosi aburaboi isucarüti maniqui picarurrü arrüna sane nisura: Caïma y tubaca rracüpuca tanene ümo bama machoboreca y rracuraca ümo bama maunrocono. Pürücü tubaca tacürusu nrracuraca. ³³Pero yücätüqui, caïma y tubaca y pürücü tubaca, niyücü au Jerusalén. Itopiqui arrtü itabajomañü tiene que ison au Jerusalén, tacana ito bama maquiataca profetarrü tücañe.

³⁴¡Causanempito ui bama pohoso auqui Jerusalén! Ta uimia taborioma bama profetarrü tücañe y yaruruma oboi canca bama yacüpusurrti Tuparrü. Chaübozü nrranca oberabama sobi, tacana arrone curubasürrü oberabara uirri naübosirri iquiana nipiarrü, pero arrüma chirranrüpüma. ³⁵Arrüna niporrti Tuparrü au nesarrüma pueblurrü oncono caïma uiti Tuparrü. Auqui caïma chüpuerurrüpü asaramañünqui tato, cheperrtü tiñata manu nanenese anche ñana namatü iñemo: “Tari anaunuti naqui cuati au nürirrti Tuparrü”.

Bacurarati Jesús au nanenese nesa macansacarrü

14 ¹Au manu tücañe nanenese nesa macansacarrü artri Jesús sürotiti aati au niporrti maniqui yüriaburrü fariseorrü. Arrübama maquiataca fariseorrü amoncoma barrüpiarama ümoti Jesús. ²Anancatito taman ñoñünrrü acamanu, naqui taquisürüti ui quichusarrü. ³Auqui artri Jesús ñanquitioti pünanaqui bama manunecana nüriacarrü y pünanaqui bama fariseorrü, nanti:

—¿Taqui urria bacura au na nanenese nesa macansacarrü, o champü?

⁴Arrüma etayoimia. Chiñumutapüma. Auquimanu artri Jesús bacurarati ümoti maniqui maunrocono. Urriancati tato. Masamunuti Jesús nariorrü ümoti. ⁵Auqui nanti ümo bama fariseorrü:

—¿Causane aboi, arrtü paquio au cütubirri naupabu bururrü o naupabu buyese au na nenenese nesa macansacarrü? ¿Aensapü omoncono cütü? No, apiquiaübuquo tanene.

⁶Tapü arrüma chütusiopü ümoma isane urapoboiboma.

Arrüna urria aisamunema bama tasuru ümo tübübürrü

⁷Artraitito Jesús arrüna niyachücoimia bama tasuru. Bapacheroma arrüba tümoca manrrü omirria esa mensarrü. Auqui artri Jesús bacheboti consejorrü ümoma:

⁸—Artrü itasurumacü ümo pierreta, tapü apacheca arrüba tümoca manrrü omirria, itopiqui rrepente iñataiti naqui manrrü cuasürüti apünanaquicü.

⁹Auqui caüma arrti maniqui batasuru aürotitü aesacü, nauqui nanti aemo sane: “Atüisai, aitorrimia ümoti na tümorrü”. Arrüciü caüma aübu nacüso aecatü atümo arrüna chüvaleopü tümorrü. ¹⁰Arrtü itasurumacü, acosi atümo au na nitacüru tümorrü. Auqui caüma cuati maniqui itasurü, nanti aemo: “Amigo, apasai atümo auna manrrü urria tümorrü”. Sane caüma manrrü ane nacua isucarü bama maquiataca aboma achepecü tümonsoma esa mensarrü. ¹¹Itopiqui arrti naqui rranrrü yarusürürü pünanaquiti quiatarrü, taquisürütiatai uiti Tuparrü. Tapü arrti naqui ichimiancanatiyü, tonenti ñana tarucu nüriacarrrti uiti Tuparrü.

¹²Nantito Jesús ümoti maniqui itasurutiti:

—Arrtü arrianca asapa pemacarrü, tapü atasuca ümo bama naesa amigorrü ni ümo bama aruquitaquí, ni ümopü bama apariante, ni ümopü bama aposapa bama rricurrü, itopiqui arrüma bapacarama tato ñana aemo itobo. ¹³Arrtü asamuca pierrta, atasu ümo bama pobrerü, ümo bama renco, ümo bama chüpuerurrüpü amema y ümo bama supusu. ¹⁴Urriampae naca, arrtü aisamute sane. Tonema bama chüpuerurrüpü apaca tato aemo itobo, pero si ane nacua au napese itobo ñana, arrtü asüboriquia tato ichepe bama urria nisüboriquirrimia au narrtarrrti Tuparrü.

Machepecatarrü: Tübübürrü

¹⁵Ui arrüna sane oncoimía, tamanti eanaquí manuma tümonso acamanu nanti ümoti Jesús:

—Urriampae nacarrüma bama tasuru, nauqui aama auna cauta ane nüriacarrrti Tuparrü.

¹⁶Auqui urapoiti Jesús arrüna machepecatarrü:

—Tamanti ñöünrrü batasuruti ümo süürümanama macirrtianuca nauqui aama nipemacarrti. ¹⁷Nauquiche tiñatai manu horarrü, icüpurutiti imostorrrti nauqui atasuti. Nanti maniqui mosorrü ümoma: “Ausiapata auba, itopiqui tüchauqui pemacarrü”. ¹⁸Namanaiña chirranrrüpümainqui aüromatü. Tamanti nanti: “Aübatái rracompraca taman ñanaunrrü. Irranca yerotü yasarai. Tapü ünantü ümoti apatron”. ¹⁹Arrti maniqui quiatarrü nantito: “Rracompraca cinco buyeca. Irranca rracone yupu. Rranquiquia apünanaquicü, tapü ünantü aemo”. ²⁰Nantito quiatarrü: “Aübatái ipoca, sane nauquiche chüpuerurrüpü yero tanu”. ²¹Nauquiche iñataiti tato maniqui mosorrü au porrü, urapoiti nanaiña arrüna sane isucarüti patrón. Auqui arrti maniqui patrón tüboricoti. Nanti tatito ümoti imostorrrti: “Acosi isiu cayaca au pueblurü, aiquiasama tauna bama pobrerü, bama chamencopü, bama supuso”. ²²Nauquiche tisamuteti arrüna sane maniqui mosorrü, nanti ümoti patrón: “Señor, chauqui tisamute nanaiña arrüna nacüpucu iñemo. Pero canapae aninqui camporrü”. ²³Auqui nanti tatito patrón ümoti aniqui imostorrrti: “Acosi tatito isiu cutubiuca atasu ümoti cualquierarrü. Tari ñasamunuma nurria, tari yebamatü, nauqui ata nipo. ²⁴Tapü arrübama primero tasuru sobi ümo nipemaca chüpuerurrüpü aama”.

Causane nauqui oecatü isiuti Cristo

²⁵Sürümanama macrirrtianuca süromatü isiuti Jesús. Artti pebücoti tato, nanti ümoma:

²⁶—Artti naqui rranrtti ayeti isiuñü, tiene que isuasürü manrrü ümoti pünanaquiti yaütoti, nipiäcütoti, nicüpostoti, aütorrti, yaruquitorrti y niquiasitorrti. Si no, chüpuerurrüpi nirranunecasati. Hasta nisüboriquirrtiatoe chüpuerurrüpi acuasürü ümoti. ²⁷Artti naqui chirranrttipü atakisürüti isiuquñü, chüpuerurrüpi nirranunecasati.

²⁸Sane nauquiche urapoitito Jesús isucarüma arrüna machepecatarrü:

—Supi arrtü anatiüpü taman abuturuqui rranrtti asamuti porrü. Primero mapensarati manucubu nicuarrü, na atusi ümoti arrtü iñatai nimonirrti.

²⁹Arrtü chiñapensatitipü nurria, isamutenti primero nitümorrü. Chauqui turriante uiti. Auqui tacürusu nimonirrti, chütacürusupü urriane uiti niporrti. Auqui caüma unumati bama macrirrtianuca, ³⁰namatü ümoti: “Artti naqui ñoñünrrü rranrttipü asamuti ipoboti, pero chüpuerurrüpi atacüru uiti”. ³¹Sane ito ui taman yüriaburrü. ¿Aensapü chümapensaratipü primero, arrtü rranrrü ane bahiquirri aübuti quiatarrü yüriaburrü? Mapensarati te, arrtü rranrtti ahiti aübu bama diez mil nesarrti masortaboca ümoti maniqui quiatarrü, naqui cuati aübu bama veinte mil. ³²Arrtü onquisioti que chüpuerurrüpi, tiene que acüputi manitacarrü ümoti maniqui quiatarrü yüriaburrü, nauqui airrimiacati tato aübuti, tapü ane bahiquirri aübuti. ³³Sane te arrübama chirranrrüpi aiñocoma nanaiña arrüna ane ümoma, chüpuerurrüpi nirranunecasama.

Nusaca tacana siürrü icu na cürrü

³⁴‘Arrüna siürrü bien baserebio oemo. Pero arrtü chüsüroiquipü, chüpuerurrüpi asarebi tato oemo. ³⁵Chübaserebioquipü ni ümopü ñanaunrrü. Mejor botabatai. Amonsoi te nisura, ümo ane namumasu.

Machepecatarrü: Nobirrama ensoro

15 ¹Namanaiña bama mayacobra impuestorrü y bama ane nomünantü uimia süromatü esati Jesús, nauqui onsaperioma nurarrti. ²Tapü arrübama fariseorrü y bama manunecana nüriacarrü ünantü ümoma, namatü:

—Artti naqui ñoñünrrü anati ichepe bama malorrü, y basoti aübuma.

³Auqui arrti Jesús urapoiti arrüna machepecatarrü isucarüma:

⁴—Supiarrtü anati naqui abuturuqui abe cien niyaburrü nobirrama, y ensoro taman omeanaqui. Auqui iñoconiontiño manio noventa y nueve eana rroense, nauqui aürotitü apacheriuti manu taman ensoro, chepe nitabücürrü uiti. ⁵Arrtü tabüco uiti, pucünuñati, iñatati ompacüti y süroti tato aübu. ⁶Arrtü tiñataiti tato au niporrti esa bama nesarrti amigorrü y esa bama iposapatarrti, nanti ümoma: “Apucünu ichepeñü, itopiqui tabüco sobi arrüna niyabu nobirrama ananca ensoro”. ⁷Sucanañü aume —nanti Jesús—. Ane manrrü pucünuncurrü

au napese arrtü iñorronconotiyü taman ñoñünrrü tarucu nomünantü uiti, pünanaqui itacu bama noventa y nueve macirrtianuca urriantai nisüboriquirrimia au ñaquioncorrüma, y champü nümoche aiñorronconomacti.

Machepecatarrü: Ensoro monirri

⁸Suraboira quiatarrü machepecatarrü: Ane ito taman paürrü, ane nimonirri diez monedarrü. Ensoro taman pünanaqui. ¿Causane uirri caüma? Tiene que aiñonoco basarurrü y asunucu auquipo aübu niyapachequirri iyo, cheperrrü tabüco uirri. ⁹Arrtü tütabüco uirri, itasuriu arrüba nesarrü amigorrü y arrüba niposapatarrü, nantü ñome: “Aupücünu ichepeñü, itopiqui tabüco sobi nimoni, arrüna ananca ensoro rropünanaquiñü. ¹⁰Sucanañü ito aume —nanti Jesús—, sane ito nipucünuncurrüma bama angelerrü aboma esati Tuparrü, arrtü iñorronconotiyü tamanti naqui ane nomünantü uiti.

Machepecatarrü: Arrti maniqui yaürrü ensoroti

¹¹Urapoitito Jesús arrüna machepecatarrü isucarüma:

—Anati taman ñoñünrrü. Aboma torrüma aütorrti. ¹²Arrti maniqui sunahüburrrü nanti sane ümoti yaütoti: “Iyaü, aichüsoñü manu naenarri, arrüna tocabo iñemo, arrtü aconca”. Auqui arrti yaütoti chepesüro uiti arrüna nenarrirrti ümo manuma torrü aütorrti. ¹³Au manio nananeca arrti maniqui sunahüburrrü acomoraboti nanaiña nenarrirrti y auqui sürotitü iche au quiatarrü cürrü. Taha tacürusu nimonirrti ui arrüna churriampü nisüboriquirrti. ¹⁴Nauquiche tütacürusu nanaiña, auqui ane carerrtiya au manu cürrü. Tapü arrti caüma cuatü nicürüpürtti. ¹⁵Auquimanu sürotitü apacheti trabacorrü esati taman ñoñünrrü au manu cürrü. Arrti maniqui ñoñünrrü icüpurutiti nauqui acuirati yutacu niyaburrti nupaucheca. ¹⁶Tarucapae nicürüpürtti maniqui yaürrü. Rranrrti aati niyubarata manio nupaucheca, pero chütorriopü ümoti. ¹⁷Auquimanu mapensarati. Nanti ümotiatoe: “Au niporrti taita aboma sürümanama nesarrti trabajadorerrü, y ane chama utuburiboma, sobüratai. Tapü arrüñü yaca auna tüsai ison nisürüpü. ¹⁸Yeca tato esati taita, sucanañü ümoti: Iyaü, ane nipüenate aübucü y aübutito Tuparrü. Isamute nomünantü. ¹⁹Tapü aiñacañü tacana ahüñünqui, si no tacanati taman naesa trabajador.

²⁰Auqui manu atürait, süroti tato esati yaütoti. Nauquiche tanati taha saimia niporrti, arrti yaütoti asaratitü cümenuti. Pucürusuti itacuti. Aürotitü yarucurrti cümenuti aitañumenutiti. Bacheboti besorrü ümoti.

²¹Auqui nanti maniqui yaürrü ümoti yaütoti: “Iyaü, ane nipüenate aübucü y aübutito Tuparrü, isamute arrüna nomünantü. Tapü aiñacañü tacana ahüñünqui”. ²²Tapü arrti yaütoti nanti ümo bama imostoti: “Apaca tauna arrüna mejor rroparrü aibiboti, apiña apüti. ¡Apuraurrü año! Apiña ito sorotiquiarrü apü neherrti y sapaturrü ipopeti. ²³Apatabai ito manu taman



(Lc. 15.21)

bacarrü bairo, nauqui uba aübuti. Masamuna pierrta aübuti. ²⁴Itopiqi arrti naqui isaü anancati tacanarrtü coiñoti, pero caüma tacanarrtü süboricoti tato. Anancati ensoroti, pero caüma anati tato”. Auqui masamunuma pierrta.

²⁵Tapü arrti maniqui quiatarrü aütorrti anancati au ñanaunrrü. Auqui cuati tato. Nauquiche tanati tato saimia porrü oncoiti manu pierrta, nitococorrüma.

²⁶Auqui batasuruti ümoti taman mosorrü, ñanquitioti pünanaquiti isane arrüna pasabo. ²⁷Auqui urapoiti maniqui mosorrü isucariüti, nanti: “Arrti aruqui iñataiti tato, y arrti aüma bacipuruti nauqui atabori manu taman bacarrü bien bairo,

itopiqui ñataiti bien sanurrti”. ²⁸Auqui arrti maniqui yaruquitorrti tüboricoti y chirranrriptü aürotitüpo. Pero arrti yaütoti sürotitü türüpo. Anitati nurria ümoti, nauqui aürotitüpo. ²⁹Arrti maniqui aütorrti nanti ümoti: “Tusio nurria aemo taita, mantucubu añoca nrratrabacaca achepecü, y nantarrtai isamute isü nacüpucu. Pero champürrti acheca ñemo ni tamampü chivuma, nauqui ñasamu pierrta aübu bama niyesa amigorrtü. ³⁰Pero arrti maniqui ahü aübo añanainti tato, naqui tacürusu uiti namoni aübu paüca, y arrüciü atabaiquia manu taman bacarrü bien baüro ümoti”. ³¹Auqui nanti yaütoti ümoti: “Isaü, arrüciü aca siemprerrü ichepeñü, nanaiña arrüna ane sobi tone ito naesa. ³²Caüma supasamuca pierrta y suipucünunca, itopiqui arrti aruqui anancati tacanarrtü coiñoti, pero caüma tacanarrtü süboricoti tato. Anancati ensoroti, pero caüma anati tato.

Causane osoi aübu nomoni

16 ¹Arrti Jesús urapoitito ümo bama ñanunecasarrti arrüna machepecatarrü: —Anati taman ñoñünrrü rricurrü. Anatito taman capatarrü ümoti.

Auqui süromatü urabomati isucarüti patrón bama maquiataca imostorrti. Urapoimia que churriampü yachücoiti capatarrü aübu nenarrirrti patrón.

²Auqui arrti maniqui patrón itasurutiti maniqui capatarrü, nauqui anitati aübuti. Nanti ümoti: “¿Isane arrüna nachücoi? Ñoncoi que acüsüca niñenarri. Mejor bacurrtara, itopiqui auquina caüma chauqui chüpuerurrüquipü capatarrüciü ñemo”. ³Auqui arrti maniqui capatarrü mapensarati sane: “¿Causane caüma sobi? Itopiqui chirranrriquipü nauqui rratrabacaiqui ümoti. Chifüñetempü rratrabaca au ñanaunrrü. Isüsoca ito rranqui limosnarrü pünanaqui genterrü.

⁴Pero chauqui tütusio ñemo causane sobi —nanti ümotiatoe—, nauqui aboma bama yasuriurumañü au niporrüma, arrtü chirratrabacacaiquipü esati patrón”.

⁵Auqui batasuruti ümo bama ebeoma ümoti patrón, taiquianati taman. Nanti ümoti maniqui primero: “¿Mantucubu nebequi ümoti patrón?” ⁶Arrti maniqui yebeorrü ñumutati: “Rebeca cien turrilemanca nasaite”. Nanti capatarrü: “Nani quichonimiacarrü nesa nebequi. Aiconomo icu arrüna nebequi cinuentatai turrilemanca”. ⁷Ñataiti quiatarü esati. Ñanquitiotito pünanaquiti: “¿Carüciü, mantucutu nebequi?” Nanti: “Arrüñü rrebeca cien pusaneca trigo”. Nanti capatarrü ümoti: “Carü nani quichonimiacarrü ane corobo icu arrüna tücañe nebequi. Pero caüma aiconomo ochentatai pusaneca trigo”. ⁸Arrti maniqui patrón ipiatenti arrüna sane yachücoiti maniqui capatarrü. Nanti: “Arrti naqui niyesa capatarrü bien ipiacati itacutiatoe”. Nantito Jesús:

—Ñemanauncurratoe, arrübama chicocoromatipü Tuparrü tamünauncatai uimia niquiubuma pünanaqui bama icocoromati. ⁹Chama nomünantü ane icu na cürrü ui monirri. Sane nauquiche sucanañü aume: Apisamuse arrüna urria ui na monirri. Arrtü tacürusu naumoni icu na cürrü, torrio aume aupobo au napese itobo.

¹⁰Arrti naqui ane ñanauncurrti aübu na chimiantai monirri, ane ito ñanauncurrti aübu na chama monirri. Tapü arrti naqui champü ñanauncurrti

aïbu na chimiantai, chüpuerurrüpitó oñoncatü ümoti aïbu chama monirri.
 11 Arrtü arrañó champü napanauñcu aïbu ba nenarriquia icuqui na cürriü, chüpuerurrüpi oncotitü Tuparrü aume aïbu na ñemanauncurratöe nenarrirri auqui napese. 12 Arrtü champü napanauñcu aïbu nenarrirri quiatarrü, chüpuerurrüpi atorri propiorrü amenarribo, arrüna rranrri Tuparrü acumanati aume. 13 Champüti naqui puerurrü aserebi ümo torrü mapatroneca. Itopiqui arrti taman cuasürüti ümoti, tapü arrti quiatarrü chücuasürütipü ümoti. Baserebioti nurria ümoti taman, tapü ümoti quiatarrü champü. Chüpuerurrüpi apaserebi ümoti Tuparrü mientras manrrü aurrianca ümo monirri.

Arrüna nirrancarrti Tuparrü

14 Arrübama fariseorrü tarucapae nirrancarrüma iyo monirri. Oncoimia arrüna sane. Unumati Jesús. 15 Auqui arrti Jesús nanti ümoma:

—Arrañó apisamute arrüna tacanarrtü urria ümo macrirrtianuca. Pero arrti Tuparrü isuputacaiti arrüna napapensaca au nautusi. Arrüna napachücoi urria ümo macrirrtianuca, pero ümoti Tuparrü ünantatai.

16 Arrüna nüriacarrü uiti Moisés y ñanunecacarrüma bama profetarrü tücañe buvaleo chepe numo ññataiti Juan Bautista. Arrti caüma urapoiti arrüna urriampae manitacarrü que arrti Tuparrü üriabucati oemo. Chauqui taboma sürümana macrirrtianuca rranrrüma aicocoma nüriacarrti Tuparrü.

17 Arrüna cürri y napese omiñarrio ñana, pero arrüna corobo nüriacarrü, nanaiña tiene que acoco.

18 Arrtü anati taman ñoñünrrü ññocotati nicüpostoti y posoti aïbu quiatarrü paürriü, chauqui tane nipünatenti. Arrtü posoti aïbu na oncono uiti iquiana, churriampü. Ane ito nipünatenti uirri.

Arrti maniqui rricurrü y arrti Lázaro

19 Nantito Jesús:

—Anati taman ñoñünrrü rricurrü. Abe naibirri omirria, champü tacanache. Naneneca ñasamucurrü pierrta. Champü tacanache nurriancarrü uiti.

20 Anatito quiatarrü ñoñünrrü poberrti, nürirrti Lázaro. Maunroconoti oboi yaca. Cuati atümoti abeu nitururrti maniqui rricurrü, 21 nirrancarrti aati manio bupaquio icuqui nimensarrti maniqui rricurrü. Hasta tamococa apicusebata manio yaca cütüpüti. 22 Taman nanenese coiñoti maniqui poberrti. Cuamatü bama angelerrü iyoti, nauqui aiqianamati esati Abraham au napese. Auqui coiñotito maniqui rricurrü. ññanamati cütü. 23 Arrti maniqui rricurrü caüma tarucapae nitaquisürücürri au infierno. Nauquiche asaratitü ape auquimanu, besüro narrtarri auqui iche ümoti Abraham y ümoti Lázaro esati. 24 Auqui tosibicoti maniqui rricurrü, nanti sane: “Iyaü Abraham, apucüru ichacuñü. Aicipurrti Lázaro tauna, nauqui ayeti aïbu tuma ññemo, nauqui rrimianaiña pario ümo niñutu, itopiqui tarucapae nichaquisürücü eana pese auna”. 25 Auqui arrti Abraham iñumutati, nanti: “Isaü, aquionsü tücañe

numo asüboriquiaiqui urriampae aemo. Tapü arrti Lázaro tücañe taquisürüiti. Caüma urriampae nacarrti. Tapü arrücü asutiu nataquisürücü. ²⁶Ane ito taman cütubirri otüüsa auna cümüinta. Chüpuerrüüpü supapasa topü, ni auqui tahapü puerurri apapasa tauna”. ²⁷Auqui nanti tatito maniqui rricurrti: “Rranquiquia nurria apünanaquicü, Iyaü Abraham, aicüpurrti Lázaro au niporrti taita. ²⁸Acamanu aboma cincomainqui masaruquitaiqui. Aicüpurrti nauqui uraboiti isucarüma, tapü cumatüquito tauna, itopiqui tarucapae taquisürücüirrti auna”. ²⁹Auqui nanti Abraham: “Ane uimia Nicororrtü uiti Moisés y ui bama profetarrü. Tari icocotama”. ³⁰Iñumutati tatito maniqui rricurrti: “Sane te, Iyaü Abraham. Pero arrtü anati naqui süborico tato eanaqui macoiñoca y urapoiti isucarüma, auqui caüma icocotama y ñorronconomacü”. ³¹Nanti tatito Abraham: “Arrüma chirranrüpüma aicocoma arrüna yacüpurrti Moisés, ni ñanunecarrüma bama profetarrüpi. ¿Quiubupito aicocoma nurarrti naqui süborico tato eanaqui macoiñoca?

Macocotoca

17 ¹Nanti Jesús ümo bama ñanunecasarrti: —Ane nantarrü macocotorrtü oemo, nauquipü uisamune nomünantü. Pero taquisürüitiatai naqui uiche aiñanti macocotorrtü. ²Manrüpü urria arrtü tomoeno canrrü sürümanarrü itüti, nauqui aruraüburumati au narubaitu turrtü, tapü asioti achetiqui macocotorrtü ümo bama icocoromañü. ³Amasasai nurria autacupatöe. Arrtü arrti aruqui masamunuti nomünantü aemo, aicuanomocosorrti. Arrtü ñorronconotiyü ui nura, airrimiaci manu nomünantü aübuti. ⁴Arrtü siete veserrü masamunuti nomünantü aemo au taman sapese, y siete veserrü cuati airrimiacati tato aübuti, arrücü tiene que airrimiaci tato aübuti.

Tiene que oñoncatü nurria ümoti Tuparrü

⁵Arrübama apostolerrü namatü ümoti Señor: —Ayura suiñemo, nauqui manrrü sopipia somoncatü ümoti Tuparrü. ⁶Auqui nanti Señor ümoma: —Arrtü amoncatüpü pario ümoti Tuparrü, puerurrüpü amucanaño ümo na suese sicomoro sane: “Aiquiaübusü auquina, suese. Acosi cümüinta narubaitu turrtü”. Icototapü manu suese arrüna napacüpucu.

Arrüna yachücoiti naqui mosorrtü

⁷Supi arrtü anati taman patrón. Anati imostorrti. Aübapae aiñanainti tato maniqui imostorrti auqui ñanaunrrü, o auqui yacuiracarrti yutacu nobirraca. ¿Aensapü nanti patrón caüma ümoti sane: “Apasai, atümo nauqui aha primero rropünanaquiñü?” ⁸No, chüpuerrüüpü sane nurarrti. Ta nanti ümoti sane: “Apema iñemo nauqui irra. Arrtü tüchauqui nirraca, atococa caüma aha y acha”. ⁹Champü nümoche achampiencati patrón ümoti itacu arrüna isamutenti isiu yacüpurrti, itopiqui mosorrti te. ¹⁰Sane ito arraña

amucanaño ümoti Tuparrü sane: “Arrüsomü mosorrü somü. Champüapae supaserebiqui, itopiqui solamenterrü sopicocota arrüna nacüpucu”.

Urriancama tato bama diez uiti Jesús

¹¹Arrti Jesús amencotiqui, niyücürri au Jerusalén. Pasaoti auqui manio cüca Samaria y Galilea. ¹²Nauquiche tiñataiti au manio poca cuamatü cümenuti bama diez mañonünca maunrocono ui leprarrü. Rranrrü apore nañeturrüma. Tochencoma iche pünanaquiti. ¹³Tosibocoma ümoti, namatü:

—¡Jesús, maestro, apucüru suichacu!

¹⁴Asaratitü Jesús ümoma, nanti ümoma:

—Amecosi apitusiancanaño isucarü bama sacerdoterrü, nauqui uraboimia, que turrian tato aume.

Nauquiche süromatü, urriancama tato auqui namenrrüma. ¹⁵Auqui tamanti eanaquimia basücübücoti tato esati Jesús, ñanauncurrü ümoti Tuparrü aübu ñanitacarrü fuerte. ¹⁶Bachesoiyoti esati Jesús, machampienanati ümoti. Artti naqui ñonünrrü samaritanurrti. ¹⁷Auqui nanti Jesús:

—Canapae diezma bama urriancama tato sobi. ¿Cautamo nacarrüma bama maquiataca nueve? ¹⁸Artti naqui ñonünrrü extranjerurrti. Tonentiatai naqui basücübücoti tato, nauqui achampienanati ümoti Tuparrü.

¹⁹Auqui nanti ümoti maniqui ñonünrrü:

—Atüsaí, acosito. Chauqui turriancü tato, itopiqui aicococañü.

Causane ñana arrtü üriabucati Tuparrü

²⁰Arrübama fariseorrü ñanquitioma pünanaquiti Jesús anche ñana üriabucati Tuparrü.

Aiñumuti Jesús, nanti ümoma:

—Arrüna nüriacarrü Tuparrü chüpuerurrüpu basarai. ²¹Chüpuerurrüpu usucana oñü: “Auna nacarrü”, ni “Tahapü nacarrü”. Itopiqui chauqui tütane abarrüpecu.

²²Auqui nanti Jesús ümo bama ñanunecasarrti:

—Iñatai ñana manu tiemporrü aurriancapae amasarañü, arrüñü Ñemanauncurratoe Ñonünrrü, pero chüpuerurrüpu. ²³Namatü ñana: “Chauqui tiñataiti tato Cristo, anati auna, o anati taha”. Tapü amecatü isiuma, tapü apicocota nurarrüma. ²⁴Itopiqui arrtü iseca tato, isecatü tacana arrone masünaca icu napese. Tütusio tone manu nanenese nisequi tato. ²⁵Pero primero tiene que ichaquisürü y chiyasuriurupümañü bama macrirrtianuca arrüna tiemporrü caüma. ²⁶Arrtü iseca tato ñana pasabo tacana arrüna pasabo tücañe nauquiche süboricotiqui Noé. ²⁷Namanaiña basoma y chaboma y pohosoma ito. Pero nauquiche tüsürotitü Noé au arca, auqui cuatü manu turri onüma, y namanaiña coiñoma. ²⁸Sane ito pasabo tücañe au nitiemporrü Lot. Basoma, chaboma, macomporarama y mapaventecanama, mancüturuma y masamunuma poca. ²⁹Pero nauquiche sürotitü Lot auqui manu pueblurrü, auqui

paquio pese y asufre auqui napese. Coiñoma namanaña uirri. ³⁰Sane ito pasabo ñana au manu nanenese arrtü iseca tato, arrüñü Ñemanauncurratoe Ñoñünrrü. Tabüicomantai macirrtianuca ui carrticurrü. ³¹Artri naqui tabüico chacu niporrti au manu nanenese, tapü süroti tatopo iyo nenarrirrti. Artri naqui tabüico au ñanaunrrü, tapü süroti tato au porrtü. ³²Apaquionsaño ümo manu pasabo ümo nicipostoti Lot. ³³Artri naqui chirranrrüpü aenso nisüboriquirrti auqui niyaca, coiñoti ñana. Tapü artri naqui coiño ichopiquiñü, süboricoti au napese ñana.

³⁴Arrümanu tobirri ñana aboma torrüma barüciüroma icu taman cürurrü. Tamanti uturuquimia camperoti au napese, pero artri quiatarrü onconoti. ³⁵Abe ito torrü paüca patubarrio chépe. Taman campero, quiatarrü oncono. ³⁶Aboma ito torrüma mañoñünca au ñanaunrrü batrabacarama. Tamanti camperoti au napese, artri quiatarrü onconoti.

³⁷Ui arrüna sane oncoimia, ñanquitioma pünanaquiti Jesús:

—¿Señor, cauta pasabo ñana arrüna sane?

Iñamutati Jesús ui machepecatarrü:

—Auna cauta abe niñucuntu ba coiño, acamanu ito apiyoberabaraño parrupaquiquia. (Auna cauta aboma bama malorrü, acamanu ito cuatü carrticurrü uiti Tuparrü.)

Machepecatarrü: Artri yacurrtacarrü y manu biurarrü

18 ¹Urapoiti Jesús arrüna machepecatarrü isucarü bama ñanunecasarrti, tapü ubata ümoma arrtü meaboma, nauqui asioma eama. Nanti:

²—Anati tücañe taman bacurrtara au manu pueblurrü. Champü ñanauncurrti ümoti Tuparrü. Champü ito ñanauncurrti ümoti quiatarrü. ³Au manuinqui pueblurrü ane ito taman paürrü biurarrü. Süroti esati maniqui yacurrtarrü, nauqui uraboi arrüna chürüri isucarüti, nauquipü acurrtati aübuti maniqui nesarrü enemigorrtü. ⁴Tübupasao naneneca champü nümoche manu paürrü uiti maniqui yacurrtarrü. Chatendebotipü ümo. Pero tone naneneca ane icuatati. Auqui mapensarati sane: Arrüñü champürrüti ane nirranauncu ümoti Tuparrü, y champü nümoche sobi genterü. ⁵Pero tapü asio isuatañü na paürrü, mejor rrocümana itacu, nauqui tapü cuatüqui yesañü. ¡Si no cuatü caüma ahi saübuñü!

⁶Auqui nanti Señor:

—Sane uiti maniqui yacurrtarrü malorrü. ⁷Manrrü te artri Tuparrü ocümanati itacu bama icocoromati. Aensapü chücontopü aiñumuti neancarrüma bama manquio pünanaquiti tobiquia y naneneca? ⁸Abu contoatai bayurarati ümoma. Pero arrüñü Nemanauncurratoe Ñoñünrrü arrtü iseca tato acü ñana, ¿aensa oncomatüqui iñemo bama mañoñünca icu na cürrü?

Artri fariseorrü y artri yacobarrü impuestorrü

⁹Urapoitito Jesús arrüna quiatarrü machepecatarrü ümo bama ñaquioncorrüma manrrü buenurrüma pünanaqui maquiataca:

¹⁰—Aboma torrüüma mañoñünca. Süromatü au niporrti Tuparrü eama. Arrti maniqui taman fariseorrti, y arrti maniqui quiatarü yacobrarrü impuestorrü.

¹¹ Arrti maniqui fariseorrü atüraitü nauqui eanti itacutiatöe. Nanti sane: “Arrücüü Tuparrü ñachampienca aemo, itopiqui champürrtü yaca tacana bama maquiataca. Arrüma rranrüüma ümo nanaiña ümomantöe, ñencañarrüma, rranrüüma ümo nicüpostoti quiatarrü. Tapü arrüñü chisamutempü sane. Champürrtü yaca tacana nacarrti naqui yacobrarrü impuestorrü auna. ¹²Arrüñü chirracapü torrü nananeca au semana ui nirraquionco ácü. Yacheca ito aemo arrüna decima parterrü nanaiña nirracanasa”. ¹³Tapü arrti maniqui yacobrarrü impuestorrü anati taha icheatai. Birrubuti asaratitü pario ape. Orronene ümoti. Meaboti sane: “Iyäu, apücüru ichacuñü, itopiqui arrüñü ane nomünantü sobi”.

¹⁴ Auqui nantito Jesús:

—Arrti maniqui yacobrarrü impuestorrü süroti tato au niporrti, chauqui tümorrmiaacana arrüba nomünantü uiti. Tapü arrti fariseorrü champüatai. Itopiqui arrübama mañentonaunca cüsoboma ñana uiti Tuparrü, tapü arrübama itaquisünüancanamacü torrio ümoma üriacaboma uiti.

Arrti Jesús ichepe bama masiomanca

¹⁵ Macanama manuma masiomanca esati Jesús, nauqui acurusüma uiti. Pero arrübama ñanunecasarrti macuansomoconoma ümo manuma macanama. ¹⁶ Auqui nanti Jesús ümoma:

—Asioma sane manuma masiomanca, tari yebamatü yesañü. Tapü abasiquia icuatama. Itopiqui arrti Tuparrü yasuriuruti ümo bama oncomatü ümoti tacana nacarrüma bama masiomanca, auna cauta üriabucati. ¹⁷Ñemanauncurratöe sucanañü aume: Arrti naqui chirranrüpü oncotitü ümoti Tuparrü tacana taman ñaüma, chüpuerürrüpü aye uiti auna cauta ane nüriacarrrti Tuparrü.

Tamanti rricurrü manitanati aübuti Jesús

¹⁸ Tamanti eanaqui manuma mayüriabuca israelitarrü ñanquitioti pünanaquiti Jesús:

—Buen maestro, ¿causane sobi nauqui aye sobi isüboriquiboñü arrüna champü nitacürrü?

¹⁹ Nanti Jesús ümoti:

—¿Causane ucanü inemo buenurrüñü? Arrti Tuparrü tonentiatü naqui buenurrü. ²⁰ Tusio nurria aemo arrüba yacüpucurrti Tuparrü: “Tapü aecatü isü quiatarrü paürrü. Tapü atabaiquia. Tapü acusüpüca. Tapü apanca apüti quiatarrü. Tari ane nanauncu ümoti aüma y ümo napacüma”.

²¹ Auqui inümutati maniqui ñoñünrrü:

—Nanaiña arrüna sane icocota auqui numo chimiañünqui.

²² Nanti Jesús ümoti:

—Pero aninqui arrüna faltaboiqui aemo. Aipiaventecasio naniña arrüba naenarri y acumana nicuarrü ümo bama pobrerrü. Auqui caüma ane nacua uiti Tuparrü au napese. Auqui caüma ariacu isiuñü.

²³Nauquiche toncoiti arrüna sane maniqui ñoñünrrü, sucheboti, itopiqui bien rricurrti. ²⁴Arri Jesús arrtaiti nisuchequirrti, nanti:

—Cuestarrü ümo bama rricurrtü aye uimia esati Tuparrü auna cauta üriabucati. ²⁵Arrümanu numuquianrrü camello manrrü chücestarrüüpü ümo, nauqui apasa auqui nirrto cümese, pünanaquiti rricurrtü, nauqui aye uiti auna cauta ane nüriacarri Tuparrü. (Arrümanu camello nisunaunrrü tacana cabayurrtü.)

²⁶Arrübama oncoi arrüna sane namatü:

—¿Ñacutimo naqui puerurrtü aye uiti esati Tuparrü?

²⁷Nanti Jesús ümoma:

—Arrübama macrirrtianuca chüpuerurrüüpü aye uimia, pero arri Tuparrü nanaiña puerurrtü urriane uiti.

²⁸Auqui nanti Pedro ümoti Señor:

—Señor, tusio aemo sopiñocota nanaiña arrüna somenarri, nauqui somenotü asiucü.

²⁹Nanti Jesús:

—Ñemanauncurratoe sucanañü aume, arri naqui iñocotati niporrti, o yaütoti, o yaruquitortti, o nicüpostoti, o aütorrti itopiqui arrüna rranrri aserebiti ümoti Tuparrü, ³⁰torrio tato ümoti manrrü itobo icu na cürü, y torrio ito isüboriquiboti arrüna champü nitacürurrtü au manu nuevurrtü cürü cuabotiqui.

Urapoiticaü tatito Jesús niconcorrti

³¹Arri Jesús batasuruti ümo bama doce ñanunecasarrti, nanti ümoma:

—Caüma oecatü au Jerusalén, nauqui acoco sobi arrüna corobo tücañe iñemo ui bama profetarri, ta arrüñü Ñemanauncurratoe Ñoñünrrü. ³²Taha itorrimianamañü mecu bama extranjerurrtü. Arrüma unumañü, uratoquioma iñemo, utureuruma iñemo. ³³Tiene que ocüsimia iñemo, y auqui itabairomañü. Pero pürücü ba trerrü naneneca isüboriquia tato eanaqui macoiñoca.

³⁴Arrübama ñanunecasarrti champürtrü iyebo uimia ñanitacarri, ni atusipü ümoma isane ümoche.

Bacurarati Jesús ümoti taman supuso

³⁵Tanati Jesús saimia manu pueblurrü nürirri Jericó. Acamanu anati taman ñoñünrrü naqui supuso. Tümonsoti isiu cutubiurrtü, ñanquiquirrti limosnarrü. ³⁶Auqui oncoiti nipiasacarrüma manuma macrirrtianuca, ñanquitioti isane arrüna pasabo. ³⁷Namatü ümoti:

—Arri Jesús auqui Nazaret pasaoti auquina.

³⁸Auqui tosibicoti fuerte, nanti:

—¡Jesús, aütorrti yüriaburrü David, apucüru ichacuñü!

³⁹Tapü arrübama cusürübo icuansomoconomati, nauqui etayoiti. Tapü arrti manrrü nitosibirrti, nanti:

—iAütorrti yüriaburrü David, apucüru ichacuñü!

⁴⁰Auqui arrti Jesús tohencoti. Bacüpuruti iyoti. Nauquiche tanati esati, arrti Jesús ñanquitioti pünanaquiti:

⁴¹—¿Isane arrüna arranca isamune aemo?

Iñumutati maniqui supuso:

—Señor, irranca nauqui acura ñemo, nauqui puerurrü yasara tato obi.

⁴²Auqui nanti Jesús ümoti:

—Rracurara aemo, nauqui urrianü tato, itopiqui aicococañü.

⁴³Au manu rrtorrrü asarati tato maniqui supuso. Auqui sürotitü isiuti Jesús, ñachampiencacarrrti ümoti Tuparrü. Namanaiña bama macrirrtianuca arrtaimia arrüna sane y ñanaunumatito Tuparrü.

Artti Zaqueo icuñunutiti Jesús

19 ¹Auqui ññataiti Jesús au manu pueblurrü nürirri Jericó. Pasaoti auqui manu. ²Acamanu pohosoti taman ñoñünrrü rricurrü, nürirrti Zaqueo, naqui üriatu bama mayacobraca impuestorrrü. ³Rranrrtipü asaratiti Jesús, pero chüpuerurrtipü, itopiqui tarucapae macrirrtianuca, y arrti chimiantiatái. ⁴Auqui sürotitü acusürüti yarucurrti isiu cutubiurrü arrüna auquiche tiene que apasati Jesús. Aüroti ape apü taman suese sicomoro. ⁵Nauquiche tiñataiti Jesús acamanu, besüro narrtarrrti ape ümoti, nanti ümoti:

—Zaqueo, ariacu tato acü apuraurrücü, itopiqui caüma ñacansaca au napo.

⁶Auqui arrti Zaqueo cuati acü apuraurrti. Yasuriurutiti Jesús au niporrrti aübu tarucu nipucünuncurrti. ⁷Ui arrüna sane arrtaimia arrübama macrirrtianuca, manitanama churriampü ümoti Jesús. Namatü:

—iCausane aürotitü acansati au niporrrti maniqui tarucu nomünantü uiti!

⁸Tapü arrti Zaqueo atüraititi esati Señor, nanti ümoti:

—Señor, yacheca ümo bama poberrü cümünta arrüna ane sobi, y arrüna isusüpütio pünanaquiti taman o rrencañaca, itorrimia tato ümoti cuatro veserrü manrrü.

⁹Auqui nanti Jesús ümoti:

—One ataesübuca eanaqui nomünantü, Zaqueo, arrücü ichepe nanaiña naesa familiarrü. Ta arrücü ito aca eanaqui nesarrrti familiarrü Abraham. ¹⁰Arrüñü Ñemanauncurratoe Ñoñünrrü isecatü nauqui yapache y ñataesümunucu eanaqui nomünantü ümo bama aboma iche pünanaquiti Tuparrü.

Machepecatarrü: Nimonirrti patrón

¹¹Arrübama macrirrtianuca arrtaimia arrüna pasabo uiti Jesús. Auqui urapoiti isucarüma arrüna machepecatarrü, itopiqui tanati saimia Jerusalén. Au ñaquioncorrüma que au manu rrtorrrü üriabucati Tuparrü icu na cürrü uiti Jesús. ¹²Nanti ümoma:

—Anati taman ñoñünrrü rricurru. Sürotitü au quiatarrü ciürrü iche, nauqui aisamunutiü yüriaburrti taha, y auquimanu rranrrti ayeti tato nauqui üriaburuti ümo bama pohoso au nicürrtiatoe. ¹³Nauquiche chüsürotitüquipü, batasuruti ümo bama diezma imostorrti. Itorrimiatati ümo cadati taman taman monedarrü oro tarucapae nicuarri. Nanti ümoma: “Apasamu negociorru aübu na monirri cheperrtü iseca tato”. ¹⁴Pero arrübama pohoso auqui nicürrti champürrti rranrrüma nauqui yüriaburrti ümoma. Bacüpuruma isiuti comisión, nauqui uraboimia isucarüti sane: “Chüsuirracapü nauqui üriaburü suiñemo”. ¹⁵Pero arrti chauqui tüyüriaburrti taha au manu quiatarrü cürrü. Auqui süroti tato au niporrti. Nauquiche tiñataiti tato, batasuruti ümo manuma diezma imostorrti bama ümoche tücañe torrio monirri. Rranrrti atusi ümoti mantucubu ñacanasarrti cadati taman. ¹⁶Arrti maniqui cusürübo itusiancanatiü isucarüti, nanti: “Señor, nani namoni. Macanana sobi diez veserrü manrrü”. ¹⁷Auqui arrti maniqui esache nanti ümoti: “Urriampae nachücoi. Arrücü buen mosorrücü. Acoconaunca aübu chimiantai monirri. Iñacü yüriaburrücü ñome diez puebluca”. ¹⁸Cuati maniqui quiatarrü, itusiancanatiü, nanti: “Señor, nani namoni, ane ñacanasarri sobi cinco veserrü manrrü”. ¹⁹Nanti yüriaburrü ümoti: “Arrücü ito yüriaburrücü sobi ñome cinco puebluca”. ²⁰Auqui cuatito maniqui quiatarrü, nanti: “Señor, carü nani namoni. Itomoenta icu nipiañuera, nauqui iñahübu. ²¹Irruca aünanacü. Itopiqui tarucu nabrutucu. Acaca auquina cauta champü isane oncono obi. Arrianca ata auna cauta chancapü cütu obi”. ²²Auqui caüma nanti Señor ümoti: “iMosorrü marriquiatarri! Ui arrüna uratoe yacheca aemo carrticurru caüma. Tusio aemo que arrüñü tarucu nibrutucu. Rracaca auquina cauta champü isane oncono sobi, y rrataca auquina cauta champürrti rrancütuca. ²³Causane chaiñatapü nimoni esa bama ipiaca atrabacama aübu, ümo arrtü tiseca tato au nipo, aitorrimiatapü tato iñemo aübu ñacanasarri”. ²⁴Auqui nanti ümo manuma amoncoma acamanu: “Apiquiaübu pünanaquiti manu monirri. Apitorrimia ümoti maniqui ane uiti diez monedarrü”. ²⁵Auqui namatü ümoti: “Arrti te tütane uiti chama monirri”. ²⁶Auqui nanti Señor: “Sucanañü aume, arrti naqui ane uiti, torrio manrrü ümoti uübo. Tapü arrti naqui champü isane ümoti carübu pünanaquiti arrüna chimiantai ane uiti. ²⁷Tapü arrübama tüboricomantai isuatañü, bama chirranrrüpüma nauqui yüriaburrüñü, apiquiasama tauna, nauqui ataborimia isucariñü.

Iñataiti Jesús au Jerusalén

²⁸Nauquiche tütacürusu arrüna nipiarrtti Jesús, pasaotito, niyücürtti au Jerusalén. ²⁹Tanati saimia manio pueblumanca nobürri Betfagé y Betania, abe cutaquiübo manu yiriturru Olivo. Auquimanu bacüpuruti ümo bama torrüma ñanunecasarri, ³⁰nanti ümoma:

—Amecosi au manio poca abe taha saimia. Arrtü apiñatai taha, tabüco aboi bururru arrüna champüti tüsüro chacu, ane tomoeno. Apisoquisüna y apiquia tauna. ³¹Arrtü anati naqui nanti aume, ¿causane apisoquisüna manu bururru? Amucanaño ümot sane: “Arrti Señor ane nümoche uiti”.

³²Auqui süromatü manuma torrü. Aiñanaimia taha. Tabüro uimia manu bururrü tacana nurarrti Jesús ümoma. ³³Nauquiche tüsoquisüro uimia, cuamatü manuma iyabuche, namatü:

—¿Causane apisoquisüna manu bururrü?

³⁴Aiñumuma:

—Arrti Señor ane nümoche uiti.

³⁵Auqui chebatai uimia. Sürotü uimia manu bururrü esati Jesús. Aiñanaimia. Iñatama naibirrimia chacu. Atobüti Jesús chacu. ³⁶Sürotitü. Isiu arrüna namenrti arrübama macirrtinuca ipiacumainquiatama naibirrimia isiu cutuburrü cümenuti. ³⁷Nauquiche tütaboma saimia nicümama manu yiriturrü Olivos, namanaiña bama icocoromati ui nipucünuncurrüma iñanaunumati Tuparrü, itopiqui tarrtaimia nanaiña arrüba milagrorrü uiti Jesús. ³⁸Namatü sane:

—Tari anaunuti naqui yüriaburrü, naqui cuati au nürirrti Tuparrü. Tari pucünüñama bama aboma au nape. ¡Gloria ümoti Bae Tuparrü!

³⁹Eana manu genterrü aboma bama fariseorrü, namatü:

—Maestro, aicuanosomocosoma bama cuamatü asiucü.

⁴⁰Tapü arrti Jesús iñumutati, nanti:

—Sucanañü aume, arrtü etayoimia bama, seguramente botosibico arrüba canca, opiñanaunuñü.

⁴¹Aiñanainti manrrü taha arrüna auquiche atusi Jerusalén. Nauquiche asaratitü ümo pueblurrü areoroti itacu bama pohoso, ⁴²nanti:

—Chentienderrüpi año bama macirrtianuca au na pueblurrü Jerusalén au na nanenese arrüna uiche urriampü caüma nabaca. Pero caüma chauqui chüpuerurrüquipü atusi aume arrüna torriobopü aume. ⁴³Cuantionqui naneneca chomirriampü aume. Arrübama aubesa enemigorrü süromatü itupecu naubesa pueblurrü, nauqui ahimia aume. ⁴⁴Nanaiña pueblurrü tiene que añarri. Namanaiña auconca bama pohoso. Ni tamampü canrrü oncono onü quiatarrü, itopiqui chütusiopü aume que arrti Tuparrü rranrti ayurati aume.

Anaunu niporrti Tuparrü uiti Jesús

⁴⁵Auqui sürotitü Jesús au niporrti Tuparrü. Penecoma uiti bama mapaventecana y bama macomporara acamanu. ⁴⁶Nanti ümoma:

—Icu Nicororrü nantü sane: “Sane nanti Tuparrü: Nipo ane ümo meancarrü”. Pero aboi caüma apiñata tacana nipo bama macusüpüca.

⁴⁷Naneneca ñanunecarrti Jesús au niporrti Tuparrü. Pero arrübama üriatu bama sacerdoterrü y bama manunecana nüriacarrü y bama mayüriabuca bapacheroma niquiubuma, causane nauqui aitabairomati Jesús. ⁴⁸Pero champürrtü tabüco uimia, itopiqui namanaiña macirrtianuca aboma onsapetioma nurria nurarrti Jesús.

Nüriacarriti Jesús

20 ¹Au manu taman nanenese anancati Jesús au niporrti Tuparrü, ñanunecacarriti ümo macrirrtianuca. Urapoiti arrüna urriampae manitacarriti. Acamanu iñataimia esati bama üriatu bama sacerdoterrü y bama manunecana nüriacarriti, ichepe bama mamayoreca. ²Namatü ümoti: —Urasoi suisucarü quiti yacüpucuche aemo, nauqui puerurrü aisamune arrüna sane. ¿Quiti uiche aitorrimia aemo üriacabocü?

³Nanti Jesús ümoma:

—Arrüñü ito irranca rranquirio amopünanaqui. Aburasoi isucarüñü ito. ⁴¿Quiti uiche aicüpurutiti Juan Bautista nauqui aunimiati, arrti Bae Tuparrü o mañoñüncatai?

⁵Auqui baparioma aübumantoe, namatü:

—¿Isane arrüna usurapoboibo? Arrtü usucana oñü que uiti Tuparrü ayeti tücañe Juan Bautista, auqui caüma arrti Jesús iñumutati: “¿Causane chapicocotapü nurarriti?” ⁶Tapürrtü usucana oñü que ui mañoñüncatai, namanaiña macrirrtianuca itabairoma oñü oboi canca, itopiqui arrüma ñaqui oncorrüma ta arrti Juan manitanati au nürirrti Tuparrü.

⁷Auqui namatü ümoti Jesús:

—Chütusiopü suiñemo quiti uiche aicüpurutiti Juan, nauqui aunimiati.

⁸Auqui nanti Jesús ümoma:

—Arrüñü ito chüpuerurrüpü suraboi ausucarü quiti uiche aitorrimia iñemo isüriacabo, nauqui puerurrü isamune arrüna sane.

Arrübama trabajadorerrü malorrü

⁹Auqui manitanati ümo genterrü ui arrüna machepecatarriti:

—Anati taman ñoñünrrü mancüturuti uva au niyorrti. Auqui torrio uiti mecu bama trabajadorerrü. Auqui sürotitü iche auquimanu ümo sürümana naneneca. ¹⁰Nauquiche tiñatai mani nitiempo nupucu uva, bacüpuruti ümoti taman mosorrü nauqui anquirioti pünanaqui manuma trabajadorerrü nüta uva, arrüna tocabo ümoti. Pero arrüma ipubairomati. Icüpurumati tato saneantai, champü torrio ümoti uimía. ¹¹Arrti maniqui iyoche bacüpuruti ümoti quiatarriti mosorrü. Isiatái uimía ümoti. Ipubairomati, unumati, icüpurumati tato saneantai. ¹²Auqui arrti maniqui iyoche bacüpuruti tatito ümoti quiatarriti mosorrü. Pero arrümanuma trabajadorerrü bahiyoma ümoti, obürio ümoti uimía. Penecoti uimía tato. ¹³Aüboqui nanti maniqui iyoche: “¿Causane caüma sobi? Mejor icüpuruti naqui isaü, naqui tarucu nicuarriti iñemo. Arrtü tasaramati, canapae ane ñanauncurrüma ümoti”. ¹⁴Pero nauquiche asaramatü manuma trabajadorerrü ümoti, namatü ümomantoe: “Tonenti naqui tiene que asuriuruti nanaiña nenarrirrti naqui iyoche. Mejor uitabairoti, nauqui asio oemo nanaiña”. ¹⁵Auqui aikuianamati auqui manu ñanaunrrü. Taborioti uimía. ¿Causane caüma uiti maniqui iyoche ümo manuma trabajadorerrü? ¹⁶Sürotitü te taha esama

nauqui ataborimia uiti, y nauqui aitorrimiatu manu ñanaunrrü ümo maquiataca. Nauquiche oncoimia arrüna sane manuma macirrtianuca namatü:

—Tapü pasabo arrüna sane.

¹⁷Artri Jesús asaratitü nurria ümoma, nanti:

—Taqi chütusiopü aume isane ümoche ane corobo icu Nicororrrü sane: Arrübama masamunuma porrü canca yarutaübutama manu taman canrrü, ñaquiioncorrüma churriampü, abu manrrü urria.

Tone baserebio tacana taman nompacüorrrü principal ümo porrü.

¹⁸Artri nauqui taübüco onü manu canrrü, iñarrioti. Tapürtrü paquio manu canrrü onüti, cütocati nurria iquiana. (Artri Jesús tacana manu canrrü. Arrübama üriatu israelitarrü tacana bama masamunu porrü.)

¿Urria bapaca impuestorrrü?

¹⁹Arrübama üriatu bama sacerdoterrü y bama manunecana nüriacarrrü rranrrüpüma aiñenomatü Jesús au manu rratorrrü, itopiqui tusiatü ümoma, ta ümoma aüro manu machepecatarrrü. Pero birrubuma ñünana genterrü. ²⁰Auqui caüma bacüpuruma ümo bama mañoñünca nauqui arrüpiama ümoti. Mapañama ane ñanauncurrüma ümoti Tuparrü, abu rranrrüma nauqui atabüti Jesús uimía arrtü manitanati arrüna churriampü, nauqui puerurrüma aitorrimianamati ümoti yüriaburrü rromanorrrü. ²¹Sane nauquiche ñanquitioma pünanaquiti:

—Maestro, tusio suiñemo arricü anunecaca arrüna urria, champü nümoche obi ñapensacarrüma bama macirrtianuca. Anunecaca causane nauqui aye osoi nosüboriqui urria ümoti Tuparrü. ²²Ucanü suiñemo, štaqui urria bapaca impuestorrrü ümoti yarusürürrü yüriaburrü César, o churriampü?

²³Pero artri Jesús tütusiatü ümoti arrüna ñacocotorrrüma ümoti. Nanti ümoma:

—¿Causane aurrianca apencaña iñemo? ²⁴Apitusianca isucarüñü taman monedarrü.

Nauquiche titusiancatama nanti:

—¿Qüiti ausüpütuche arrüna ane icu, y qüiti üriche arrüna corobo?

Arrüma iñumutama:

—Nausüpüturrti yarusürürrü yüriaburrü César, y nüirirtito.

²⁵Auqui nanti Jesús ümoma:

—Sanen te, apacoconaun ümoti yarusürürrü yüriaburrü. Apacoconaun ito ümoti Tuparrü.

²⁶Sane nauquiche chüpuerurrüpü ane causane uimía ümoti ui arrüna nanti isucarü genterrü. Cütobüsoma y etayoimia.

¿Ñemanauntu süboricoma tato bama coiño?

²⁷Aboma ito manuma saduceorrrü süromatü asaramati Jesús. Arrüma chicocotapüma arrtü süboricoma tato ñana bama coiño. Namatü ümoti Jesús:

²⁸—Maestro, ane nicororrrü uiti Moisés, nantü sane: “Artri anati taman ñoñünrrü coiñoti y oncono nicüpostoti, pero champü naübosirri uiti, auqui artri

yaruquitorrti tari posoti aïbu manu païrrü biurarrü, nauqui ane naïbosirri uiti au nïirrti maniqui coiño”. ²⁹Bueno, aboma auna suyarrüpecu bama siete mañoñünca yaruquitorrtümantoe. Arrti maniqui cusürrübo apoti aïbu manu païrrü. Coiñoti y chaübosiopü uiti. ³⁰Arrti maniqui segundo posoti aïbu manu biurarrü y coiñotito, isiatai champü naïbosirri uiti. ³¹Auqui arrti maniqui tercero posoti aïbu manu païrrü biurarrü. Coiñotito y campü naïbosirri uiti. Sane pasabo ümo manuma maquiataca. Posoma aïbu, y coiñoma. Champürrtü aïbosio uimia. ³²Auqui coiño ito manu païrrü. ³³Carü arrtü süboricomampü tato bama coiño, ¿quiti naqui icüposüche manu païrrü? Itopiqui namanaiña posoma aïbu.

³⁴Arrti Jesús iñumutati nurarrüma, nanti:

—Auna icu na cürrü arrübama mañoñünca y ba païca posoma. ³⁵Pero ñana arrtü süboricoma tato eanaqui macoiñoca, chauqui chüposopümainqui taha au napese. ³⁶Taha chauqui champüqui concorrü. Nacarrüma caïma tacana naca bama angelerrü. Arrüma caïma aïtorrti Tuparrü, itopiqui süboricoma tato. ³⁷Arrti Moisés asaratiti Tuparrü tücañe apü manu suese omo. Acamanu tusio que arrübama coiño süboricoma tato, itopiqui acamanu nanti Tuparrü que arrti Tuparrti ümoti Abraham, ümoti Isaac y ümoti Jacob. ³⁸Arrti Tuparrü champürrtü Nitupa bama coiño, ta Nitupa bama süborico. Uirri tusio oemo que arrübama trerrü antiburrü süboricoma tato esati Tuparrü.

³⁹Eanaqui manuma manunecana nüriacarrü namatü sane:

—Ñemanauncurratoe, Maestro, bien aiñumuta arrüna nura bama saduceorrü.

⁴⁰Auquimanu champürrtü asiomainqui anquirioma pünanaquiti.

¿Aütocheti Cristo?

⁴¹Auqui nanti Jesús ümoma:

—¿Causane amucanaño que arrti Cristo aïtorrti David, o sea eanaqui nesarrti familiarrü David tücañe? ⁴²Abu arrti David nanti Señor ümoti Cristo. Ane manu Salmo corobo uiti, nantü sane:

Arrti Bae Tuparrü nanti ümoti Señor:

“Atümo auna rrupetacuñü au nepanauncu niñe,

⁴³ cheperrtü bachesoiyoma sobi aesacü arrübama tüboricatai aemo”.

⁴⁴Arrtü nampü ñoñünrrtiatai Cristo eanaqui nesarrti familiarrü David, quiubupü nanti David “Señor” ümoti.

Nipünate bama manunecana nüriacarrü

⁴⁵Namanaiña macirrtianuca oncoimia arrüna nanti Jesús ümo bama ñanunecasarrti. Nanti sane ümoma:

⁴⁶—Amasasai nurria ñünana bama manunecana nüriacarrü. Arrüma urriantai ümoma amema aïbu naibirrimia abaesa. Rranrrüma nauqui apanqui nurria ümoma au plaza, y nauqui apanaun ümoma. Tümonsoma auna bien ümo nisurratoe au ba poca sinagoga. Tacane ito itacümanauncutama omirria tümoca au pierrtaca. ⁴⁷Pero arrüma

encañaoma ñome ba viuraca iyo nomenarrirri, itopiqui arrio chüpuerurrüpi amocüma yutacuapatoe. Auqui meaboma yabaiturrü, nauqui tapü tusio arrüna churriampatai isamutema. Tonema bama carrticabo nurria ñana.

Taman paürrü viurarrü macumana ümoti Tuparrü

21 ¹Anancati Jesús au niporrti Tuparrü. Asaratitü ümo bama rricurrtü bacheboma nimonirrimia au manu baurimia, ñacumanatarrüma ümoti Tuparrü. ²Asaratitito ümo taman paürrü biurarrü, bachebo torrtai monedarrü, chimiantai niyucurrü. ³Auqui nanti:

—Ñemanauncurratoe sucanañü, arrüna paürrü biurarrü pobrmrrü bachebo manrrü pünanaqui namanaiña au narrtarrti Tuparrü. ⁴Itopiqui arrüma bacheboma arrüna nisobüratu nimonirrimia. Tapü arrüna paürrü bachebo nanaiña arrüna nimonirri.

Urapoiticaü Jesús niñarriqui niporrti Tuparrü

⁵Eanaqui bama ñanunecasarrti Jesús urapoimia arrüna coñorrtai niporrti Tuparrü, y arrüba canca omirria y posürümanaca, y arrüba macumanataca. Auqui nanti Jesús ümoma:

⁶—Cuatü manu nanenese ñana anche nanaiña iñarrio arrüna amarrtai. Ni tamampü canrrü oncono onü quiatarrü, nanaiña tiene que añarri.

Causane na atusi oemo arrtü tüsai ayeti tato Jesús

⁷Auqui ñanquitioma pünanaquiti:

—Maestro, ¿auche apasa arrüna sane, isane arrüna señarrü, arrtü tüsaimia?

⁸Nanti Jesús ümoma:

—Amasasai nurria, tapü anati naqui encaño aume, itopiqui sürümanama cuamatü ñana au nisürri, namatü: “Arrüñü Cristo, chauqui tiñatai”. Tapü amecatü isiuma. ⁹Arttö apiplate nürri guerra y bahiquirri aübu mayüriabuca, tapü aupirruca uirri. Tone cusürübo apasa. Pero chütonenquipü ñapacümuncuturrti Tuparrü.

¹⁰Nantito ümoma:

—Taman nación bahiyo aübu quiatarrü. Tamanti yüriaburrü masamunuti guerra aübuti quiatarrü. ¹¹Tarucu nipiaichoconoco cürrü. Ane ito carerrtiya y norrocorrü au nanaiñantai cürrü. Tapü icu napese tusio ñana arrüba señarrü uirrucatai ñomünana.

¹²‘Pero primero autakisürüca uimia. Iquianama año au ba sinagoga nauqui acurrtama aupu. Iñanama año au preso auqui niyaca. Amecatü uimia esa bama mayüriabuca. ¹³Auqui caüma puerurrü aburaboi isucarüma nisürri. ¹⁴Tapü apapensaca iyo na apanitacabo autacuapatoe. ¹⁵Itopiqui arrüñü yache aume apanitacabo au manu horarrü ñana. Champüti naqui puerurrü aiñumu tato nabura sobi.

¹⁶'Arraño caüma tiene que autaqisürü uimía. Hasta bama aubaütaiqui y naupacütaiqui aboma ausiu. Bama aubaruqui y bama aupariente y bama aubesa amigorrü tüboricoma aume, itorrimianama año. Aboma bama abuturuqui coiñoma uimía. ¹⁷Namanaiña icu na cürrü tüboricomantai aume auqui niyaca. ¹⁸Pero chüpuerurrüpü aenso ni tamampü niqui nautanu. Arrti Tuparrü bacuirarati autacu. ¹⁹Arrtü chapatachecapü uimía, ane ñana nausüboriqui arrüna champü nitacürurrü.

²⁰'Arrtü amarrtai tütaboma bama sürümanama masortaboca itupecu na pueblurrü Jerusalén, auqui caüma tütusio aume, ta conto iñarrio. ²¹Arrübama aboma au na cürrü Judea, tari yesüburama omeana yirituca. Arrübama aboma au Jerusalén, tari yeracamatü auqui. Arrübama aboma au camporrü, tapü süroma tato au Jerusalén. ²²Itopiqui tonehio manio naneneca nesa carrticurrü, anche ñana acoco nanaiña arrümanu nantü icu Nicororrü. ²³Butaqisüratai arrüba paüca abe botochiquio, y arrüba papaiümana, itopiqui au manu nanenese tarucu taquisürücürü ümo na genterrü. Tone carrticurrü uiti Tuarrü ümoma. ²⁴Aboma bama coiño ui bahiquirri. Aboma maquiataca enoma y canama au piquiataca cüca. Tapü arrübama extranjerurrü, iñarrio uimía arrüna pueblurrü Jerusalén y iñonocotama. Querabo mecuma cheperrtü tacürusu nüriacarrüma.

Niyequirrti tato Cristo

²⁵'Auqui ane señarrü isu surrü, isu pama y omeana norrtöñeca. Tapü icu na cürrü arrübama macirrtianuca chütusiopü ümoma causane uimía. Cütöbüsoma y birrubuma ui na buyarrü ui tarucapae nipococo narubaitu turrü. ²⁶Chauqui chücüsüurupümainqui ui nirrucurrüma, ñapensacarrüma cümenu na cuabotiqui icu na cürrü, itopiqui hasta arrüba abe icu napese bupaichoconono ito. ²⁷Auqui caüma asaramañü, arrüñü Ñemanauncurratöe Ñoñünrrü, isecatü eana cüsaüiboca aübu tarucu nisüriaca y tarucu nanentacarrü sobi. ²⁸Arrtü tirranrrü apasa nanaiña arrüna sane, aupucünu, tari arucu tato aume, itopiqui tüsaimia nauqui autaesübu icuqui na cürrü.

²⁹Auqui urapoiti Jesús arrüna machepecatarrü isucarüma:

—Amasasai arrüna suese higuera, o piquiataca sueca ito. ³⁰Arrtü tamarrtai aübpae ubasu tato sueca, tütusio aume, ta tüsaimia nitiempo tanaunrrü. ³¹Sane ito arrtü amarrtai arrüba sane, tütusio aume que contoatai üriabucati Tuparrü.

³²Ñemanauncurratöe sucanañü aume, pasabo nanaiña arrüna sane antes que acoma bama macirrtianuca arrüna tiemporrü caüma. ³³Arrüna napese y na cürrü omiñarrio ñana, pero nisura ñemanauncurratöe tiene que acoco.

³⁴'Amasasai nurria. Tapü apichücaño ümo arrüna naurriantümo y nauborisüba. Tapü tarucapae napapensaca iyo arrüna ausüratai icuqui cürrü. Apacuirä nurria autacu, tapü autabücatai ui manu nanenese, arrtü iñatai. ³⁵Itopiqui arrümanu nanenese cuatü tacana metorrü, rrepenteatai iñatai ümo bama süborico icu na cürrü. ³⁶Tari abaca amarrtaiquiati, y apanqui nantarrü pünanaquiti

Tuparrü, nauqui urria nabaca au ba taquisürücüca cuabotü, y nauqui puerurrü apitusiancanaño isucariñü au nitacürurrü, arrüñü Ñemanauncurratoe Ñoñünrrü.

³⁷Manunecanati Jesús au sapesse nantarrü au niporrti Tuparü. Tapü au tobirri sürotitü onü manu yiriturrü nürirri Olivos. ³⁸Namanaiña macirrtianuca cuamatü esati au niporrti Tuparrü tansürapae, nauqui onsaperioma nurarri.

Bapacheroma causane nauqui aiñenomati Jesús

22 ¹Tüsaimia manu pierrta parrcua, auna cauta basoma pan champü levadura eana. ²Arrübama üriatu bama sacerdoterrü y bama manunecana nüriacarrü bapacheroma niquiubuma, causane nauqui aitabairomati Jesús. Pero birrubuma ñünana macirrtianuca.

³Auqui süroto choborese auti Judas, nürirrtito Iscariote, naqui eanaqui manuma doce apostolerrü. ⁴Arri naqui Judas sürotitü esa bama üriatu bama sacerdoterrü y bama mayüriabuca auqui niporrti Tuparrü. Baparioti aübuma, causane nauqui aitorrimianatiti Jesús ümoma. ⁵Arrüma bien pucünüñama. Namatü ümoti:

—Supachecha aemo monirri itobo.

⁶Urria ümoti. Auqui caüma bapacheroti niquiubuti, nauqui aitorrimianatiti Jesús ümoma anecanatai, tapü tusio ümo macirrtianuca.

Nesarri Cena Señor

⁷Iñatai manu pierrta parrcua. Au manu pierrta batabaiyoma ito nobirrama, nauqui aama, ñaqui oncorrüma iyoti Tuparrü. ⁸Arri Jesús bacüpuruti ümo bama torrü, arri Pedro y arri Juan. Nanti ümoma:

—Amecosi apapema oemo ümo na pierrta parrcua.

⁹Arrüma ñanquitioma pünanaquiti:

—¿Cauta arrianca nauqui supapema?

¹⁰Arri nanti:

—Arttö apiñatai au pueblurrü apicuñucati taman ñoñünrrü, ane baüsürrü ompacüti ataso ui turrü. Amecosi isiuti au na porrü cauta sürotitü.

¹¹Amucanaño sane ümoti maniqui ipoche acamanu: “Nanti Señor: ¿Cauta naca manu curato auna cauta irra ichepe bama nirranunecasa ümo na pierrta parrcua”? ¹²Auquimanu itusiancatati ausucarü manu cuarto sürümanarrü ane ape au primer piso, chauqui tücoñocono. Acamanu apapema.

¹³Süromatü manuma torrü. Tabüco uimia nanaiña tacana arrüna nanti Jesús ümoma. Auqui mapemanama, nauqui aama ümo manu pierrta parrcua. ¹⁴Nauquiche tütobiquia, iñataiti Jesús aübu bama maquiataca ñanunecasarri. Atümoti esa mensarü. ¹⁵Auqui nanti ümoma:

—Chäübopü nirranca irra aupu ümo na parrcua antes que ichaquisürü.

¹⁶Itopiqui sucanañü aume nurria, chüpuerurrüpü irra tatito ümo na pierrta cheperrtü cocono sobi arrüna ümoche na pierrta, arttö üriabucati Tuparrü.

¹⁷Auqui iquiampetati manu coparrü, machampiencanati ümoti Tuparri, nanti:

—Aucha nanaiña año arrüna itorrimiata aume. ¹⁸Itopiqui sucanañü aume, auquina caüma chichacaiquipü arrüna niyü uva, cheperrtü üriabucati Tuparrü.

¹⁹Auqui iñentatito pan. Machampiencanati ümoti Tuparrü.

Ichepesünatati. Itorrimiatati ümoma, nanti:

—Arrünani tone nisütüpü. Tone torrio nauqui aco autacu. Aumase pan sane, nauqui nantarrai apaquioncañü.

²⁰Sane ito isamutenti aübu manu coparrü iyau niyacarrüma, nanti ümoma:

—Tone niñoto, arapara caüma itacu sürümanama macirrtianuca, na atusi que arrti Bae Tuparrü isamutenti nuevurrü tratorrü aübuma.

²¹'Pero arrti naqui ñoñünrrü uiche aitorrimianañü anati auna ichepeñü esa na mensarrü. ²²Arrüñü Ñemanauncurratöe Ñoñünrrü tiene que ison, ta sane ñapensacarri Tuparrü iñemo. Pero taquisürütiatai naqui uiche aitorrimianañü.

²³Auqui caüma bama ñanunecasarri ñanquitioma pünanaquimiantoe quiti naqui uiche aitorrimiatiti Jesús ñana.

Uratoquioma bama ñanunecasarri Jesús

²⁴Auqui caüma bama ñanunecasarri Jesús uratoquioma ümomantoe, ñacuti naqui manrrü ane nüriacarri. ²⁵Auqui nanti Jesús ümoma:

—Arrübama ane nüriacarrüma ümo macirrtianuca icu na cürü, isamutema isiu nirrancarrüma aübuma. Y arrübama mayüriabuca namatü que urria yachücoimia ümo genterrü. ²⁶Tapü arrañö tapü apisamute sane. Artti naqui ane manrrü nüriacarri, tari ichimiancanatiyü isucarü maquiataca. Artti naqui bacüpuru, tari tonenti naqui baserebio aume.

²⁷¿Ñacuti naqui ane manrrü nüriacarri, artti naqui tümonsoti esa mensarrü nauqui aati, o artti naqui baserebio pemacarrü? Ñemanauntu te, artti naqui tümonso esa mensarrü. Tapü arrüñü isecatü nauqui yaserebi aume.

²⁸'Arrañö nantarrai amoncaño ichepeñü numo chütamampatai iñemo.

²⁹Sane nauquiche yacheca aume abüriacabo, tacanati Iyaü bacheboti isüriacaboñü, ³⁰sane nauqui auba y aucha ichepeñü ñana esa nimensa auna cauta ane nisüriaca, y nauquito autümo au tronorrü y apacurrtä ümo bama auqui ba doce familiarrü Israel.

Yapariquirrti Jesús aübuti Pedro

³¹Nantito Señor ümoti Simón Pedro:

—Simón, Simón, artti choborese ñanquiriorotiyü pünanaquiti Tuparrü, nauqui ane nüriacarri aemo. Rranrrti acheti macocotorrü aemo. ³²Pero arrüñü rranquiquia atacucü tapü tacürusu nacoconauncu iñemo. Arrtü turrian tato naquionco iñemo, ayura ümo bama aruquitaqui au nisüri, nauqui tapü oncono uimia ñacoconauncurrüma iñemo.

³³Auqui nanti Simón Pedro ümoti Jesús:

—Señor, yecatü asiucü au preso, cheperrtü isonca achepecü.

³⁴Nanti Jesús ümoti:

—Pedro, suraboira nurria asucarücü: Caüma na tobirri antes que apu pohorrü, apanca trerrü veserrü, ucanü que chasuputacapüñü.

Tüsaimia taquisürücürü

³⁵Auqui ñanquitioti Jesús pünanaquimia:

—Nauquiche icüpucaño tanu, champürrtü apacaca pusanese, ni aumonibopü ni ausapatubupü. ¿Taqi ane faltabo aume?

—Champü te —namatü.

³⁶Nanti ümoma:

—Tapü caüma apiquia naupusane y apaca ito aumonibo. Arrti naqui champü nicüserrti, tari ipiaventecanati nicüburirrti, nauqui aye uiti icüseboti. ³⁷Itopiqui sucanañü nurria aume, tiene que acoco sobi arrüna nantü icu Nicororrü. Ta ane corobo sane: “Urabomati tacanati yatabayorrü”. Nanaiña arrüna corobo iñemo tücañe, tiene que acoco sobi caüma.

³⁸Auqui namatü ümoti:

—Señor, auna abe torrü cüseca posürümanaca.

Nanti:

—Iñatai, abasio sane.

Neancarri Jesús au Getsemaní

³⁹Auqui arrti Jesús sürotitü auquimanu. Sürotitü onü manu yiriturrü nürirri Olivos, tacana arrüna nantarrai yachücoiti. Arrübama ñanunecasarri süromatü isiuti. ⁴⁰Nauquiche tiñataiti taha, nanti ümoma:

—Apean auna, tapü apatacheca arrtü cuatü aume macocotorrü.

⁴¹Auqui sürotitü manrrü tahiqui pario pünanaquimia. Nichequirri tacana arrtü baruca canrrü. Acamanu bachesoiyoti, nauqui eanti. ⁴²Nanti:

—Iyaü, arrtü arrianca, aitaesümunusuñü pünanaqui nichaquisürücü arrüna cuabotü iñemo. Pero aiña isiu narrianca, tapü aiñata isiu nirranca.

⁴³Au manu rratörri iñataiti taman ángel esaquiti Tuparrü, nauqui acheti icüsübuti Jesús. ⁴⁴Onquisioti tarucapae nisuchequirrti y nirrucurrti. Manrrü meaboti ümoti Tuparrü. Au na neancarri umüunca ümoti notorrü, rrüquo acü. ⁴⁵Nauquiche tütacürusu neancarri, süroti tato esa bama ñanunecasarri. Tabücoma uiti manumuma ui nisuchequirrimia. ⁴⁶Auqui nanti ümoma:

—¿Causane abasiquia aumpanu? Apatüesai, nauqui apean, tapü apatacheca ui macocotorrü, arrtü cuatü aume.

Enoti Jesús

⁴⁷Anancatiqui manitanati, rrepenteatai iñataimia sürümanama mañoñünca. Arrti Judas cusürüboti aübuma, abu tonenti naqui tücañe eanaqui bama doce ñanunecasarri. Sürotitü esati Jesús, nauqui anquiti nurria ümoti aübu besorrü ümoti. ⁴⁸Auqui nanti Jesús ümoti:

—iJudas, así que ui arrüna besorrü aitorrimiacañü mecuma, arrüñü Ñemanauncurratoe Ñoñünrrü!

⁴⁹Arrübama amoncoma ichepeti Jesús arrtaimia arrüna pasabobo, namatü:

—Señor, bahira ümoma aübu cütese.

⁵⁰Tamanti eanaquimia obürío uiti ümoti maniqui imostorrti yarusürürü sacerdoterrü. Oquio nepanauncu numasurrti. ⁵¹Tapü arrti Jesús nanti:

—iAsio sane, tapü ahiquia! Auqui caüma bacurarati ümoti maniqui obürío ümoti. Au manu rratorrü urriancati tato. ⁵²Auqui nanti Jesús ümo manuma üriatu bama sacerdoterrü y ümo manuma masortaboca auqui niporrti Tuparrü y ümo manuma mayüriabuca, bama cuamatü iyoti:

—Arraño abecatü iyoñü aübu cüseca y aübu sueca tacanapaepürütü cusüpürüñü. ⁵³Nauquiche anancañü abarrüpecu naneneca au niporrti Tuparrü chapiñencopüñü. Pero chauqui tiñatai arrüna horarrü aume, itopiqui arrti choborese üriabucati caüma.

Mapañati Pedro chisuputaratitipü Jesús

⁵⁴Auqui iñenomati Jesús. Sürotitü uimia au niporrti maniqui yarusürürü sacerdoterrü. Tapü arrti Pedro süroti isiuti auqui icheatai.

⁵⁵Acamanu arrübama masortaboca maunrrimianama pese türüpo au nusuara. Acamanu tümonsoma itupecu, nauqui apema, itopiqui rrimianene manu tobirri. Artti Pedro tümonsotito eanama. ⁵⁶Auquimanu cuatü taman cumanacarrü, besüro narrtarrü ümoti Pedro. Anati tümonsoti esa manu pese. Ane caüma narrtarrü ümoti, auqui nantü:

—Arrüna ñoñünrrü ananca ito ichepe Jesús.

⁵⁷Pero arrti Pedro mapañati ümo, nanti:

—Champürütü isuputacati maniqui ñoñünrrü.

⁵⁸Coboï pario tamantito asaratitü ümoti Pedro, nantito ümoti:

—Arrücü ito anancü ichepeti Jesús.

Nanti Pedro:

—No, champürütü anancañü.

⁵⁹Tupasao taman horarrü cuati quiatarrü, nanti:

—Ñemanauncurratoe artti naqui ñoñünrrü anancatito ichepeti Jesús, itopiqui chanecanapatai galileorrtito.

⁶⁰Pero arrti Pedro mapañati tatito, nanti:

—Chütusiopü iñemo isane arrüna anitaca.

Au manu rratorrü puuru pohorrü. ⁶¹Auqui arrti Señor pebücoti, asaratitü ümoti Pedro. Tapü arrti Pedro aquionotiyü iyo nipiarirrti tücañe Señor ümoti sane: “Antes que apu pohorrü apanca trerrü veserrü que chasuputacapüñü”.

⁶²Auqui sürotitü türüpo. Orronene nurria ümoti, y tarucu nareorrti.

Unumati Jesús

⁶³Arrümanuma mañoñünca bacuirara itacuti Jesús unumati, bacheboma ümoti. ⁶⁴Itamurriancatama nisurrti. Bacheboma isuti. Ñanquitioma pünanaquiti: —¿Tusio aemo qiti bachebo aemo? Urasoi, arrtü arrücü profetarrücü. ⁶⁵Aruqui nanaiñantai ñanitacarrüma churriampü ümoti.

Anati Jesús esa bama mayüriabuca

⁶⁶Nauquiche tütaneneca arrübama mamayoreca israelitarrü y bama üriatu bama sacerdoterrü y bama manunecana nüriacarrü iyoberabaramacü. Itasurumati Jesús. Iñanamati esama. Acamanu ñanquitioma pünanaquiti:

⁶⁷—Urasoi nurria suisucarü, ¿arrücü Cristo?

Auqui iñumutati nurarrüma:

—Arrtü sucanañü aume que arrüñü, chapicocotapü. ⁶⁸Arrtü rranquiti amopünanaqui, chüpuerurrüpü apiñumu, y chaurriancapü apiñemecanañü. ⁶⁹Arrüñü Ñemanauncurratoe Ñoñünrrü ichümoca ñana au nepanauncu neherri Tuparrü, naqui tarucu nüriacarrü.

⁷⁰Auqui ñanquitioma pünanaquiti:

—¿Así que arrücü Aütörri Tuparrü?

Iñumutati:

—Arrüñü te.

⁷¹Auqui namatü:

—Champü nümochetiqui terrticurrü. Chauqui toñoncoi nurarri ui propoirrü nuñumasu.

Arri Jesús esati Pilato

23 ¹Auqui namanaiña atüraimía. Aüromatü aübuti Jesús esati Pilato, naqui yüriaburrü rromanorrü. ²Aiñanaimía esa niporrti. Acamanu urabomati Jesús isucarüti Pilato. Namatü:

—Tabücoti soboi naqui ñoñünrrü ausüratai uiti ümo macirrtianuca. Nanti qu churriampü bapaca impuestorrü ümoti yarusürürrü yüriaburrü César. Nantito que tonenti Cristo, tacana yüriaburrü.

³Auqui arri Pilato ñanquitioti pünanaquiti Jesús:

—¿Arrücü yüriaburrücü ümo bama israelitarrü?

Iñumutati Jesús:

—Arrüñü te.

⁴Auqui nanti Pilato ümo bama üriatu bama sacerdoterrü y ümo bama macirrtianuca:

—Champü nipünatenti naqui ñoñünrrü.

⁵Pero arrübama macirrtianuca manrrü nitosibirrimía fuerte nurria, namatü:

—Itümoniancatati genterrü ui arrüna ñanunecacarrü. Cusürübo uiti au Galilea, y caüma iñataiti auna Judea, nauqui aisamunenti isiu.

Artri Jesús esati Herodes

⁶Nauquiche oncoiti Pilato arrüna sane, ñanquitioti pünanaquimia, arrtü ñëmanauntu auqui Galileati. ⁷Namatü ümoti que auqui tahati. Auqui icüpurutiti Jesús esati Herodes naqui yüriaburrü au Galilea, itopiqui au manio naneneca anancatito Herodes au Jerusalén. ⁸Nauquiche tasaratitü Herodes ümoti Jesús, bien pucünuñati, itopiqui chaübopü nirrancarrti asaratiti. Oncoitiatai nürirrti. Rranrrti nauqui asamuti milagrorrri isucarütü. ⁹Ausüratai ñanquitioti pünanaquiti Jesús. Pero artri Jesús champürri iñumutati nurarrti. ¹⁰Acamanu amoncoma ito bama üriatu bama sacerdoterrü ichepe bama manunecana nüriacarrü, urabomati Jesús. ¹¹Auqui artri Herodes ichepe bama nesarrti masortaboca unumati Jesús. Nauqui atusi nurria nuncurrüma ümoti, süro aibiboti uimia coñorrtai tacana naibirrti yüriaburrü. Auqui artri Herodes icüpurutiti tato esati Pilato. ¹²Arrümanu nanenese artri Pilato ichepeti Herodes isamunumacü amigorrü aübumantoe. Abu tücañe enemigorrüma.

Tiene que aconti Jesús

¹³Auqui artri Pilato oberabarama uiti bama üriatu bama sacerdoterrü, bama mayüriabuca y bama macrirrtianuca. ¹⁴Auqui nanti ümoma:
—Arraño apiquiacati tauna yesañü naqui ñoñünrrü. Amucanaño que ausüratai uiti ümo macrirrtianuca. Türranquitio pünanaquiti ausucarü, pero chütusiopü arrtü ñëmanauntu arrüna amucanaño ümoti. Canapae champü nipünatenti. ¹⁵Ni arrtipü Herodes tabücopü nipünatenti. Sane nauquiche icüpurutiti tato iñemo, chauqui tamarrtai. Champü arrüna nipünatenti nauqui aconti sobi. ¹⁶Rracüpora nauqui acüboriti, y auqui iñemecacati.
¹⁷Ümo manu pierrta nantarrtai anati naqui emecana auqui preso. Tone arrüna yacheatarrti Pilato. ¹⁸Namanaiña tosibicoma manu genterrü, namatü:
—iTari comati maniqui Jesús, aitaesümunurrti Barrabás!
¹⁹Taipü artri maniqui Barrabás anancati au preso, itopiqui yatabayorrti au manu pueblurrü. Bahiyoti aübu bama masortaboca rromanorrtü.
²⁰Tapü artri Pilato rranrrti aiñemecanatiti Jesús. Manitanatiqui ümoma.
²¹Pero arrüma tosibicoma manrrü fuerte nurria, namatü:
—iAiñarrti apü curusürrü!
²²Tütabe trerrü ñanquiquirrti Pilato pünanaquimia sane:
—¿Sane arrüna nomünantü uiti naqui ñoñünrrü? Champürtrü tabüco sobi nipünatenti nauqui acontipü. Rracüpora na acüboriti, auqui caüma iñemecacati.
²³Pero arrüma manrrü nitosibirrimia, nauqui aiñanatiti apü curusürrü.
²⁴Ui na tarucapae nitosibirrimia chebatai uiti Pilato aisamunentiatai arrüna ñanquitioma pünanaquiti. ²⁵Sane nauquiche emecanati maniqui ñoñünrrü, naqui ñanquirioromati, naqui anancati au preso itopiqui yahiquirrti y itopiquito arrüna yatabaiquirrti. Tapüti Jesús torrioti mecuma, tari isamutema aübuti isiu nirrancarrüma.

Iñanamati Jesús apü curusürrü

²⁶Nauquiche tanancati Jesús mecu masortaboca, süromatü aübuti, nauqui aiñanamati apü curusürrü. Isiu cutubiurru icuñunumati maniqui ñoñunrrü auqui Cirene, nürirrti Simón. Aübo cuati tato auqui camporrü. Iñenomati nauqui aiqianti ompacüti curusürrü isiuti Jesús.

²⁷Süromatito isiuti Jesús sürümanama macirrtianuca y sürümana paüca. Bareoro y botosiboco ui niyusuchequirri itacuti. ²⁸Pero arrti asaratitü ñome, nanti: —Arraño paüca auqui Jerusalén, tapü abareoca ichacuñü. Abareo autacuapateo y itacu bama abaübositaiqui. ²⁹Itopiqui cuantionqui naneneca auna anche amucanaño: “Urriampae nubaca ba paüca champürrtü ubaübosio”. ³⁰Auquimanu caüma namatü bama macirrtianuca ñome ba yirituca: “Aupaqui somonü”, y ñome ba yiritumanca namatü: “Apiñanecasa somü”. ³¹Isamutema arrüna tarucu nomünantü iñemo. Pero abaübü isamutema arrüna manrrü tarucu nomünantü ñana.

³²Süromatito uimia torrü mañoñünca macusüpüca, nauqui ataborimia ichepeti Jesús. ³³Aiñanaimia au manu nürirri “Nipiai nitanu macoiñoca”. Acamanu crabuti Jesús uimia apü curusürrü. Arrübama torrüma macusüpüca crabuma ito apü nicurusürrüma, tamanti au nepanauncurrti Jesús, arrti quiatarrü au nepaurrü. ³⁴Arrti Jesús nanti:

—Iyau, tari airrimiaca nomünantü ui bama macirrtianuca, itopiqui chütusiopü ümoma arrüna isamutema. Tapü bama masortaboca suerteabo uimia naibirrti Jesús. ³⁵Arrübama macirrtianuca amoncoma acamanu arrtayomatü. Arrübama ito mayüriabuca aboma acamanu aübu nuncurüma ümoti Jesús. Namatü:

—Mataesümunucunuti ümoti quiatarrü. Caüma tari itaesümunutiüyü uirrtiatoe, arrtü ñemanauncurratoe Cristo ti, naqui Aütörri Tuparrü.

³⁶Arrübama masortaboca unumatito Jesús. Süromatü esati, aichamanamati vinorrü ocoro. ³⁷Namatü ümoti:

—Arrtü yüriaburrücü ümo bama israelitarrü, aitaesümunusü obiatoe.

³⁸Iñatama ito taurarrü apü curusürrü onü nitanurrti ape pario. Ane corobo icu auqui manio trerrü manitacaca griego, latín y hebreo, nantü sane: “Tonenti Jesús, naqui üriatu bama israelitarrü”. ³⁹Tamanti uturuqui manuma torrü macusüpüca otorrio ichepeti Jesús nanti:

—Arrtü arrücü Cristo, aitaesümunusü obiatoe, y aitaesümunusü somü ito.

⁴⁰Tapüti maniqui quiatarrü icumpañeruturrti icuansomoconotiti, nanti ümoti:

—Champü nanauncu ümoti Tuparrü. Arrücü aca ito aübu na carrticurrü. ⁴¹Arroñü te ane nomünantü osoi. Utaquisürüca itopiqui na churriampü uisamute. Tapüti naqui ñoñunrrü champü nipünatenti.

⁴²Auqui nanti ümoti Jesús:

—Arrtü taca auna cauta ane nüriaca, aquionsü iyoñü.

⁴³Auqui arrti Jesús inumutati nurarrti, nanti:

—Ñemanauncurratoe sucanañü aemo, caüma aiñatai ichepeñü au paraiso.

Niconcorrti Jesús

⁴⁴Tiñatai tose. Auqui tomiquianene au nanaiña cürri. Nururacarrü manu nitomiquianenequirri hasta las trerrü isiu nimümürri. ⁴⁵Arrüna surrü otochebo. Arrümanu cortinarrü au niporrti Tuparrü quiopüro cümüntaqui. ⁴⁶Auqui arrti Jesús tosibicoti, nanti:

—Iyaü, amecucü itorrimiata niyausüpü.

Iyau manu nurarrti coiñoti.

⁴⁷Nauquiche tarrtaiti maniqui capitán rromanorri arrüna pasabo, iñanaunutiti Tuparrü. Nanti sane:

—Ñemanauncurratoe, arrti naqui ñoñünrrü champü nipünatenti.

⁴⁸Namanaiña manuma macrirrtianuca arrtaimia arrüna pasabo. Süromatü auquimanu, mapensarama, orronene ümoma. ⁴⁹Arrübama isuputaramati Jesús y arrüba paüca cuantio auqui Galilea isiuti Jesús abe umarrtayotü ümo arrüna sane pasabo auqui icheatai.

Iñanamati cütu Jesús

⁵⁰Anati taman ñoñünrrü bien buenurrti, y urria nisüboriurrü, nürirrti José. Arrti auqui manu pueblurri nürirri Arimatea, ane au manu cürri Judea. Tonenti tamanti eana manuma mamayoreca israelitarri. ⁵¹Artri naqui José barrüperarati na üriaburati Tuparrü. Champürtrü urria ümoti arrüna isamutema aübuti Jesús. ⁵²Artri sürotitü esati Pilato, nauqui anquirioti nicunturrti Jesús pünanaquiti. Torrio uiti Pilato ümoti. ⁵³Nauquiche tücaüburuti Jesús apüqui curusürri uiti José, cüburrioti uiti. Süroti cütu au manu nusutu canrrü, auna cauta champüti tüsüro cütu. ⁵⁴Arrümnü nanenese tüniyücürri ümo manu nanenese nesa macansacarrü.

⁵⁵Arrümanio paüca cuantio tücañe ichepeti Jesús auqui Galilea omenotü apasabori auna cauta aiñama nicunturrti Jesús. ⁵⁶Auqui omeno tato au niyopürri. Nauquiche topiñatai taha, acomorabo oboi perfume, arrüba omirriantai norimía. Au manu nanenese nesa macansacarü pacansara tacana arrüna nantü nüriacarrü.

Süboricoti tato Jesús

24 ¹Arrümanu tominco tansürapae omenotü manio paüca esa manu nusuturrü. Opiquiata manu perfume. ²Nauquiche topiñatai esa nusuturrü, umarrtai manu canrrü uiche ataburri tücañe, carübo. ³Omenotüpo, pero champürtrü tabüco oboi nicunturrti Señor Jesús. ⁴Bocütobüso acamanupo, chütusiopü ñome causane oboi. Rrepenteatai amasaratü ümo torrüma mañoñünca aboma atürayoma yobesa. Cuara nurria naibirrimia. ⁵Arrümanuma mañoñünca namatü ñome:

—¿Causane abasiquia apapacheriuruti eanaqui bama macoiñoco naqui süborico tato? ⁶Champüti auna. Chauqui tüsüboricoti tato. Apaquionsaño ümo arrümanu nurarrti tücañe aume au Galilea. ⁷Nantipütoche aume: “Arrüñü

Ñemanauncurratoe Ñoñünrrü tiene que ichorri ümo bama ane nomünantü uimia, y itabairomañü apü curusürri. Y pürücü ba trerrü naneneca isüboriquia tato”.

⁸Auqui upaquionaño manio paica iyo nurarrti Jesús tücañe. ⁹Auqui manu omeno tato au pueblurrü, aburaboi isucarü manuma once ñanunecasarrti Jesús y isucarü bama maquiataca. ¹⁰Tonehio manio paica: María Magdalena, Juanarri, Mariarrü nipiäütoti Jacobo, y arrüba piquiataca paica. Oboi aburaboi isucarü bama apostolerrü arrüna pasabo ñome. ¹¹Pero nauquiche toncoimia bama apostolerrü tacanarrtü piaracarrtai ümoma. Chicocotapüma.

¹²Tapü arrti Pedro sürotitü türüpo, yarucurrti esa nusuturrü. Nauquiche ññataiti taha, sürotitüpo. Arrñaiti manio cüburriquia, abe au taman narücüquirri. Auquimanu süroti tato au porrü, cütobüsoti.

Arrüna pasabo isiu cutubiurrü au Emaús

¹³Arrümanuinqui nanenese tücañe torrüma bama ñanunecasarrti Jesús süromatü au manu pueblurrü nürirri Emaús. Nichequirri taqui once kilómetros auqui Jerusalén. ¹⁴Amoncoma baparioma ümo arrüna pasabo au Jerusalén, niyücürüma. ¹⁵Numo baparioma sane y mapensarama, arrti Jesús sürotitü esama, amencoti ichepema. ¹⁶Arrüma asaramati, pero tacana taburrio nartarrüma, chisuputaramatipü. ¹⁷Auqui arrti Jesús ñanquitioti pünanaquimia: —¿Isane arrüna abasiquia apapari isiu cutubiurrü? ¿Causane ausuchecatai?

¹⁸Tamanti eanaquimia nürirrti Cleofás ññumutati nurarrti Jesús: —Au nanaiñantai tusio arrüna pasabo au Jerusalén arrüba naneneca túbupasao. Arrücü anancü taha, ¿causane chütusiopü aemo?

¹⁹Nanti:

—Isane arrüna pasabo?

Namatü ümoti:

—Arrüna pasabo ümoti Jesús auqui Nazaret. Tonenti profetarrti tücañe, tarucu nüriacarrti. Tusio ui arrüna isamutenti y ui arrüna nurarrti isucarüti Tuparrü y isucarü bama macrirrtianuca. ²⁰Arrübama üriatu sacerdoterrü y bama mayüriabuca itorrimianamati, nauqui aconti apü curusürri. ²¹Tapü arrüsomü supapensaca que uiti taesüburu tato arrüna genterrü Israel. Chauqui túbupasao trerrü naneneca arrüna sane. ²²Abe ito manio paica amonquio suichepe. Opicütömünana somü, itopiqui obebotü cuatü nanenese au nicürri. ²³Champürrtü tabüco oboi nicunturrti. Auqui manu cuantio tato aburaboi suisucarü arrüna umarrtai manuma angelerrü. Namatü ñome, süboricoti tato. ²⁴Auqui arrübama suisumpañeru süromatü asaborimia au manu nusutu canrrü. Tabüco uimia tacana arrüna munantü manio paica, tapü arrti Jesús champürrtü asaramati.

²⁵Auqui nanti Jesús ümoma:

—¿Causanempü chüpuerurrüpü apicoco arrüna turapoimiacaü bama profetarri. Canapae tairri nautanu. ²⁶Arrti Cristo tiene que atakisürüti primero, y auqui caüma atorri üriacaboti y nanentacaboti au napese.

²⁷ Auqui urapoiti nurria arrüna nantü icu Nicororrü, arrüna manitanama ümoti tücañe. Cusürübo uraboiti arrüna ane corobo uiti Moisés, y auqui nicororrü ui bama profetarrü.

²⁸ Ññataimia au manu pueblurrü Emaús. Arrti Jesús isamutenti tacanarrtü pasaotiatai. ²⁹ Arrüma rranrrüma nauqui asiote ichepema, namatü:

—Asiquia suichepe, itopiqui chauqui tütümümüca.

Así que sürotipo ichepema. ³⁰ Nauquiche tanancati tümonsoti ichepema esa mensarrü, iñentati manu pan. Icnusüiancatati y chepesüro uiti. Itorrimiatati ümoma. ³¹ Au manu rratörriü tacanarrtü rrütöpücoma. Aüboqui isuputaramati. Pero arrti Jesús ensoroti tatito esaquimia au manu rratörriü. ³² Auqui namatü ümomantoe:


—Taitacu oñonquisio tacana uürara utusi ui nupucünuncu, nosequi ichepeti, numo manitanati oemo isiu cutubiurrü, urapoiti usucarü icuqui Nicororrü.

³³ Auqui champürrtü barrüperaramainqui. Basücübücoma tato au Jerusalén au manu tobirri. Nauquiche tiñataimia tato, tabücoma uimia bama once apostolerrü oberabarama aübu bama icumpañeruturrüma.

³⁴ Arrüma namatü ümo manuma torrü:

—Ñnemauncurratoe süboricoti tato Señor. Arrti Simón Pedro asaratiti.

³⁵ Auqui arrümanuma torrü urapoimia arrüna pasabo ümoma isiu cutubiurrü, y causane nauquiche aisuputaramati Jesús, nauquiche ichepesünatati pan.



(Lc. 23.37)

**Itusiancanatiyü Jesús isucarü
bama ñanunecasarrti**

³⁶Nauquiche amoncomainqui baparioma arrüna sane, arrti Jesús paecüburuti eanama. Manquitioti nurria ümoma, nanti:

—Taiquiana urria nabaca.

³⁷Auqui cütobüsoma bama ñanunecasarrti, y birrubuma, ñaquiioncorrüma asaramati taman yausüpürrü. ³⁸Auqui nanti Jesús ümoma:

—¿Causane tarucu naucütobü? ¿Causane apapensaca ui naupirrucu? ³⁹Amasasai ñiñe y nipope, ta arrüñü. Ausiapata tauna nauqui apiñenoñü. Arrti yausüpürrü champü nañeturrti ni anempito nipiarrti. Tapü arrüñü ane nirrañetu y nipiái.

⁴⁰Auqui itusiancatati neherrti y nipoperrti isucarüma, nauqui asaraimia. ⁴¹Pero arrüma champürrtü icocotamainqui nurria ui na nipucünuncurrüma y ui na nicütobürrüma. Auqui nanti Jesús ümoma:



(Lc. 24.53)

—¿Ane auna aboi nauqui irra?

⁴²Torrio ümoti peasorrü nopiocorrü cünucunu. ⁴³Yasutioti y basoti isucarüma. ⁴⁴Auqui nanti ümoma:

—Arrüna pasabo iñemo, tone arrümanu tüsurapoi tücañe ausucarü, nauquiche anancañünqui anchepe. Nanaiña tiene que acoco arrüna ane corobo isütüpüñü uiti Moisés y ui bama profetarrü y au manu liburrü salmo.

⁴⁵Auqui caüma manunecanati ümoma, nauqui aye uimia Nicororrü. ⁴⁶Nanti tatito ümoma:

—Sane ane corobo. Arrti Cristo tiene que ataquisürüti y aconti y pürücü ba trerrü naneneca süboricoti tato eanaqui macoiñoa. Sane pasao iñemo. ⁴⁷Arrüna nisüri tiene que aburabo isucarü namanaiña macirrtianuca auna Jerusalén y au nanaiña icu na cürrü, nauqui atusi ümoma, y nauqui amorrümiaca tato nomünantü uimia, arrtü iñorronconomacü. ⁴⁸Arraño terrticurrü año ümo arrüna sane, itopiqui amarrtai. ⁴⁹Icüpucati Espíritu Santo aume, ta sane turapoiticaü Tuparrü, rranrti aicüpurutiti aume. Pero abasiquiaiqui auna pueblurrü Jerusalén cheperrtü apasuquiucati auqui napese. Arrtü cuati, torrio aume abüriacabo auqui ape.

Niyücürri tato Jesús au napese

⁵⁰Auqui arrti Jesús sürotitü aübuma auqui pueblurrü. Iñataimia au manu nürirri Betania. Acamanu iquiamperotiño ape nipiarrti. Macunusüancanati ümoma. ⁵¹Isiu manu ñacunusüancacarri ümoma, sürotitü ape pünanaquimia au napese. ⁵²Arrüma asaramatü isiuti aübu ñanauncurrüma ümoti. Auqui süroma tato au Jerusalén aübu tarucu nipucünuncurrüma. ⁵³Nantarrtai aboma au niporrti Tuparrü, ñanauncurrüma ümoti Tuparrü. Amén.